

ELEMBO



Bokoki kofanda. Mbote na bino nyonso! Ezali esengo kozala lisusu na mosala na Nkolo na ntongo oyo, na . . . Nayebaki te soki tokozonga awa to te, kasi Nkolo afungolaki nzela, pe tozongaki mpo na liyangani ya lelo. Sikawa, tozali kolikia kolekisa ntango kitoko lelo, na ntongo oyo, na liteya ya eteyelo ya lomingo oyo, kati na Liloba. Pe na mpokwa, ekozala lisusu mabondeli ya lobiko na nzoto, ekolandana na elambo.

² Sikawa to—tokobulisa bebé moko, nakanisi . . . Ndeko Neville auti koyebisa ngai ete ezali na bebé moko mpo na kobulisa. Na bongo, bakoki koya na bebé yango sikawa. Pe ndeko na biso atikalala, to moko na bango babetaka orgue to piano, moto moko. Na bongo, boya na bebé yango. Tokosala mosala ya kobulisa; mpo tokoka kokota mbala moko na Liloba, na lombangu mpenza.

³ Mpamba te, tolingaka ko—kopesa ntango mingi na Liloba. Yango—yango nde likambo ya motuya, kopesa mpenza ntango na biso na Liloba ya Nkolo. Na bongo tozongisi matondi mingi mpo na libaku ya kokutana na bino nyonso awa lelo, pe ya . . . pe na—na liyangani oyo.

⁴ Ekoki kozala libunga na ngai. Ezali malamumu, ndeko mwasi. Na—na—nakanisaki ezalaki bongo. Ezali ntango mosusu libunga. Malamumu. Sikawa, natondi bino mingi, ndenge moko. Ntango mosusu likambo oyo, nakanisi esalami na moto mosusu, na nzela ya moto mosusu, pe ekómisi yango kokoso boye.

⁵ Sikawa moto nyonso azali komiyoka malamumu? [Losambo balobi: “Amen.”—N.D.E.] . . . ? . . . Nzambe akumisama!

⁶ [Ndeko Neville alobi: “Bango oyo bazali koya.”—N.D.E.] Sikawa, oh, iyo, bana yango bango oyo. Bolimbisa ngai. Bolimbisa ngai. Malamumu, okoki koya, mpaka. [“Iyo, misie.”]

⁷ Ee, bazali mibale, bana basi kitoko, bana basi na miso kitoko! Boye te? Azali kitoko. Nkombo na ye nani? Tala awa! [Mama alobi: “Jennifer Lee.”—N.D.E.] Jenny? [“Jennifer Lee.”] Jennifer Lee. Nkombo ya libota nde nini? [“Serept.”] Serept. Bouti wapi, Ndeko mwasi Lee? [“Versailles, Illinois.”] Versailles, Illinois. Ezali malamumu!

⁸ Sikawa, kati na Biblia. Sikawa, na momesano, ba—bazalaka na libatizi ya bana mike; biso tondimaka libatizi ya bana mike te, mpo basali naino lisumu te, mpo bazali mike mingi. Kasi tondimaka kobulisama ya bana epai na Nkolo. Sikawa mpaka ná ngai tokotiela bebé yango maboko. Olobaki, Jenny? [Ndeko Neville alobi: “Jennifer.”—N.D.E.] Jennifer. Malamumu.

Togumba mitó.

⁹ Tata na Likolo, wana tomemeli Yo mwana mwasi oyo na ntongo ya lelo, na nkombo Jennifer, mama ná balingami batamboli na ye ntaka molai, mpo abulisama na Nkolo. Toyebi ete, na eleko na Yo, Otiaki maboko na Yo likolo na bana mike lokola ye, pe—pe olobaki: “Botika bana mike baya epai na Ngai, bopekisa bango te, mpamba te Bokonzi na Likolo ezali mpo na bato ya motindo na bango.” Sikawa topesi ye epai na Yo, mpo na bomoi ya mosala, na Nkombo na Yesu Klisto. Amen.

¹⁰ Nkombo ya mwana mwasi oyo mosusu nani? [Mama alobi: “Connie Lynn.”—N.D.E.] Connie Lynn. Malamu, bebé Connie, nazali, nazali komiyoka lokola mwana moke. Boni, obangi? Oh, namoni ekosimba te, mama. Malamu.

Togumba mitó.

¹¹ Nkolo Yesu, mama oyo amemeli biso Connie moke na ntongo ya lelo, mpo abulisama na Oyo-na-nguya-nyonso. Opesaki ye mwana oyo, mpo abokola ye, pe amemeli Yo ye, elongo na leki na ye ya mwasi. Nabondeli Yo, Tata na Likolo, ete Ozala na mawa. Pambola libota oyo. Pambola mwana mwasi oyo. Wana totieli ye maboko na Nkombo na Yesu Klisto, topesi ye epai na Yo mpo na bomoi ya mosala. Amen.

Nzambe apambola yo, ná bana na yo.

Oh! la la!, tozali na babebé ebele sikawa!

¹² Nkombo ya bebé mobali oyo nani? [Mama alobi: “Joel Lee Watson.”—N.D.E.] Joel Watson. [“Joel Lee.”] Joel Lee Watson. Elenge mobali moko kitoko, na miso minene ya bule! Oh! la la! Bouti wapi? [“Eastman, na Georgie.”] Na Georgie. [“Iyo.”] Nakanisaki bouti na Súdi. Nayebaki te. . . [“Ee, mama na ngai afandaka pene na Tifton. Ezali kuna.”] Oh, iyo. Oh! Mbote! Tala élangé mobali kitoko ya Georgie, ezali boye te? Malamu, misie. Iyo, misie, ezali mpenza malamumu. Ayebi pe koloba. Boye te?

Togumba mitó.

¹³ Tata na Likolo, toyei na mwana mobali kitoko oyo, wana mama pe tata batelemi awa mpo na—kotalisa bolongani na bango. Opesi bango mwana mobali oyo mpo babokola ye, pe bango bayei lisusu na ye epai na Yo. Oyo e—ezali likambo moko kitoko, lokola Ana, ya kalakala, oyo abondelaki mpo azua mwana; pe—pe Nzambe apesaki ye mwana, pe ayaki na ye lisusu na tempelo na Nzambe, mpo na kobulisama. Nkolo, sala ete mwana mobali oyo ázala mosali na Yo, ete tata pe mama na ye bapambolama, bazala na nzoto kolongonu pe makasi mpo na kobokola ye. Pe tika ázala na bomoi molai, ya esengo, pe ázala mosali na Yo, wana topesi ye epai na Yo, na Nkombo na Yesu Klisto. Amen. (Bopambolama!) Pe bosala ete ázala mobali malamumu, ntango mosusu azala mosakoli ya moke lokola Samuele.

14 Sikawa botala bana mibali kitoko mibale. Oh! la la! Bazali nde misato? Ee, ezali libota mobimba. Nkombo na yo nani? [Mwana mobali alobi: “Michael.”] Michael. Bongo ya yo? [Mwana mobali mosusu alobi: “Paul.”] Paul. Oyo bankombo kitoko! Bongo ya yo? [Mwana mwasi alobi: “Debbie.”] Debra. Ezali mpenza kitoko. Michael, Paul, ná Debra. Nkombo ya libota na bino nde nini? [Tata alobi: “Ellis.”] Ellis? [“Iyo.”] Ee, ezali mpenza libota moko makasi, nalobi na bino.

15 Boyebi, ntango namonaka bana mike boye, ezongisaka ngai ntango nyonso eleko nazaláká mwana moke. Boyebi, liseye ya kala elobaka: “Lelo bazali komatela yo na makolo, lobi bakomatela yo na motema,” kasi nandimi te ete ekozala bongo ntango tokobulisa bango mpo na Nkolo. Tozali na mokumba moko awa, pe Nzambe atiaki yango na maboko na bino. Abimisa motei uta na bino. Nalobaka ntango nyonso na ntina na basi batei, boyebi, kasi mama nyonso azali motei; losambo na ye yango oyo, bomoni, kobokola bana oyo malamumu, ntango papa azali na mosala. Pe bozali na mokumba. Nzambe apambola bino nyonso mibale. Bozali na libota moko malamumu.

16 Tata na biso na Likolo, toyei na Michael moke, azali lokola mwana ya liboso. Pe totii maboko na biso likolo na ye, mpo na kobulisa ye, mpo na Yesu Klisto. Libota na ye bamemi bana na bango mpo Otiaki bango na—na nse ya kobatelama na bango, pe bayebi bakokoka te, kozanga lisungi na Yo, yango wana bamemi libota na bango, mpo na kobulisa bango.

17 Sikawa napesi Michael moke oyo epai na Yo, mpo na bomoi ya mosala, na Nkombo na Yesu Klisto. Ndenge moko, totii maboko likolo na Paul moke, pe tozali kobulisa bomoi na ye mpo na Yesu Klisto, mpo na bomoi ya mosala mpo na nkembo na Nzambe. Pe likolo na Debra moke, totii maboko likolo na ye, Tata, mpo na kobulisa ye, na ekaniseli ya Yesu Klisto, Oyo Atiaki maboko na Ye likolo ya bana mike, pe Alobaki: “Botika bana mike baya epai na Ngai; bopekisa bango te.” Tika ete bomoi na mwana mwasi moke oyo epambolama kati na Bokonzi na Nzambe.

18 Pambola tata ná mama, pe tika ete babika bomoi molai ya esengo, pe bamona bana na bango kosalela Nzambe. Tosengi lipamboli oyo mpo na nkembo na Nzambe, wana tobulisi bango na Nkombo na Yesu Klisto. Amen.

Nzambe apambola bino! Nzambe apambola bino! Bozali libota moko malamumu. Iyo.

19 Oyo nde . . . Boyebi likambo nazali kokanisa? Bana mike ya basi bakómi, bazali kitoko mingi sikawa koleka ndenge bazaláká ntango nazaláká elenge. Iyo, misie. Miso minene kitoko! Nkombo na ye nani? [Mama alobi: “Joanna.”—N.D.E.] Joanna. Bongo nkombo na bino ya libota ezali . . . [Tata alobi: “Blair.”] Blair, Joanna Blair. Bino bozali kotala kuna na sima, azali kitoko,

boye te? Iyo, misie. Bongo nsango nini, Joanna? Azali lokola mwana ya nsoni-nsoni, Joanna, azali mwana ya nsoni-nsoni. Mwana kitoko.

Togumba mitó.

²⁰ Tata na biso na Likolo, libota oyo Blair bazuaki likabo oyo na bolóngani na bango, Joanna moke oyo. Pe toyebi ete mikolo ezali mabe, ntango Satana azali bisika nyonso, kobundisa, koleka mingi bana basi ya mike boye. Pe bayebi ete bakoki bango moko te mpo—mpo na kobokola ye malamumu. Pe balingi abokolama malamumu, pe asalela Yo. Pe bazali kobokola mwana mwasi oyo mpo na lokumu na Yo. Pe sikawa bayebi na ye, mpo na kobulisa ye, mpo na Yo. Totii maboko na biso likolo na ye, na Nkombo na Yesu Klisto, wana tobulisi Joanna Blair moke na Bokonzi na Nzambe, mpo na nkembo na Nzambe. Amen.

Nzambe apambola yo, Ndeko Blair. Nkolo azala na bino.

²¹ Mbote, misie! [Tata alobi: “Mbote!”—N.D.E.] Oyo mwana mobali kitoko mpenza! Hé, nsango nini? Ee, Oh! la la!, ekozala malamumu koleka soki obongwani ngambo *oyo*. Iyo, misie. Azali na motó moke kitoko mpenza, na elongi ebongi na yango. Boye te? Nkombo na ye nani? [“Daniel Mark.”] Daniel Mark. Bongo nkombo ya libota? [“Mark Kardum.”] Kardum. [“Kardum.”] Kardum, Daniel Mark Kardum.

²² Bozalaka pene na awa, Ndeko Kardum? [Ndeko Kardum alobi: “Ezali, na Engumba ya Melkerk.”—N.D.E.] Iyo, misie. Ozali moto ya wapi? [“Nazali moto ya Etuka ya New York.”] Etuka ya New York, ozali Yankee, malamumu. [“Iyo.”] Ee, ezali etuka moko monene. Bandeko na ngai mosusu bafandaka kuna. Noko na ngai afandaka na Plattsburgh. Oh, Nasila kolekísá ntango kitoko mingi na New York. Nakokende kuna mpo na mayangani na ngai ekolanda, Engumba ya New York, na losambo The Stone Church. Malamumu.

²³ Sikawa, olobaki nkombo na ye Mark? [Tata alobi: “Daniel Mark.”—N.D.E.] Daniel Mark, oyo mwana mobali kitoko!

Togumba mitó.

²⁴ Nkolo Yesu, tomemeli Yo Daniel Mark moke, mpo na kobulisa bomoi na ye. Mokumba epesami na maboko ya tata ná mama, kobokola mwana moke oyo na kobanga Nzambe. Pe bayebi ete bakoki bango moke te, yango bamemi ye epai na Yo, Nkolo, ete Ópambola bomoi na ye. Pe, sikawa, toyebi ete mikolo tozali kobika na yango, ezali mabe. Tozali komona bana mike oyo, pe toyebi te eloko nini lobi ebombeli biso, kasi, ata bongo, topesi bango na maboko na Yo. Totii maboko na biso likolo na elenge mobali oyo, pe topesi bomoi na ye epai na Yo, mpo na bomoi ya mosala kati na Bokonzi na Nzambe, tobondeli na Nkombo na Yesu. Amen.

25 Nzambe apambola yo, ndeko. Azali mwana mobali kitoko. Pe Nzambe apambola yo, Mark moke.

Oh . . . bango kati, bomema bango,
Bomema bango mosika na bisika ya masumu;
Oh, bomema bango, bomema bango,
Bomema bana mike epai na Yesu.

Ezali kitoko mingi! Matondi, ndeko mwasi.

26 Bato boni bazalaki awa na lomingo, baoyo babondelaki mpo na bango lomingo eleki, baoyo bazui eyano pe bayoki ete babikisami? Botombola maboko, baoyo babondelaki mpo na bango. Oh! la la! botala awa, pene na bango nyonso.

27 [Ndeko Neville alobi: “Aleluya! Ezali kitoko mingi, boye te! Nzambe asanzolama! Nayokaki bato kolobela yango, póso mobimba.”—N.D.E.] Iyo, misie. Ngai pe. Nakosepela kofanda mpo na koyoka, bomoni.

28 Bomoni, likambo moko ezali kosalema, nakolobela bino yango sima. Bongo, sikawa, bomoni, ezali—ezali likambo ya nkembo pe ya kitoko mingi. Pe soki to . . . Tokolobela yango, na liyangani mosusu, boyebi, moko na mikolo oyo. Ebandi kosalema, pe tozongisi matondi mingi mpo na yango.

29 Nazalaki na Kentucky, ndenge nasalaka mbula na mbula, nakendeke kuna. Nazalaki kuna elongo na banninga na ngai mosusu. Pe nakendeke kuna mpenza mpo na bokila ya bisende te, pe boyebi yango, bomoni.

30 Bongo tozali mpenza kolekisa ntango ya nkembo, pe tozongisi matondi epai na Nkolo!

31 Nasengeli kokende sikawa, nasengeli kozonga na ndako sima na liyangani oyo. Na sima, biso pe . . . Na sima nakozonga, sima na ntango moke, mpo na kokende na liyangani moko na New York. Pe soki tokozua libaku ya kotelema awa mwa moke, ee, to—tokosepela kozala na liyangani mosusu awa na losambo.

32 Na sima nasengeli kozonga, mpo na kokende na Shreveport. Na sima tokozonga na ndako pe tolingi kozala awa na ntango ya bafeti, soki Nkolo alingi, nakozongisa libota awa. Na sima—na sima nalingi ko . . .

33 Na sima mayangani na ngai ekokoba na Phoenix, na sanza ya yambo. Ezali mayangani ya mbula na mbula kuna mpo na Bato na Mombongo Baklisto. Pe pene na pso moko to mikolo zomi liboso na yango, nakomeka ko—kofutela esika monene . . . Bato ya Nkombo na Yesu; ezaláká Ndeko Garcia ná—ná ndeko wana ya espagnol, bazaláká na esika monene pe kitoko kuna. Bauti kotonga yango. Ezali na bisika ya kofanda mpo na bankoto ya bato, ya sika mpenza, pe losambo na bango ezali na bato moke. Bayebisaki ngai nakoki kofutela yango ntango nyonso nakolinga. Esika ya ko—kotambola-tambola, koleka-leka na lobwaku, losambo na losambo, nakanisi nakosangisa makambo

nyonso na liyangani kaka moko ya monene, bomoni, pe kosala yango wana.

³⁴ Na bongo tokoki kofutela tempelo yango. Tokotala sikawa soki tokokoka, pe na sima tokosala Likita ya Bato na Mombongo Baklisto. Bongo, liboso nyonso ebonga mpo na mibembo ya mosika, tokomeka kosala mayangani na ngambo ya Sudi, na sanza ya yambo, pe ya mibale, pe ya misato, na bituka ya Sudi. Na sima—na sima kokende. . . mpo ete, soki tomilengeli sikawa kokende na Afrika. . . Bomoni, eleko oyo ya Noël, mpo na bango, ezali mokolo ya minei na sanza ya nsambo. Bomoni, ezali—ezali eleko ya mbula pe ntango mabe, pe okoki kokende kuna te na ntango ya boye, na bongo ntango malamau ya kokende kuna ekoya sima. Na bongo tolingi kobanda, soki tokokoka, na Norvège, tokokita kosala mobembo na mokili mobimba, pe tokokota moke-moke na Afrika, mpo na kosukisa kuna, soki Nkolo alingi.

³⁵ Kasi bobondela mpo na biso sikawa. Tolingi bino, pe boyebi yango. Na bongo tozali kolikia komona makambo mingi ya minene, koleka nyonso tokoki kosala, to kokanisa ete Nkolo akoki kosala.

³⁶ Pe tondimi, na mpokwa oyo, ekozala liyangani monene ya lobiko na nzoto. Nandimi ete ekozala. . . Nakoteya bobele mwa moke, mpo tozali na elambo na mpokwa oyo. Na bongo, pene na miniti ntuku mibale to ntuku misato, na sima tokosala molongo ya mabondeli, pe—pe bobele sima na yango, to—tokolia elambo. Pe tosengi botikala elongo na biso; ekozala esengo mpo na biso. Bisu tosalaka e—elambo mpo na biso moko te. Ezali mpo na mondimi nyonso, mondimi nyonso.

³⁷ Bongo liboso nátanga Makomi, nayebi te soki tokoki kogumba motó mwa moke. Nakosenga na moninga malamau na ngai, Ndeko Lee Vayle, akamba biso na libondeli, ete Nzambe apambola Liloba na Ye. Ndeko Vayle, bondela mpo na biso?

[Ndeko Lee Vayle abondeli sikawa.—N.D.E.] Amen. Kokisa yango, Nkolo. Kokisa yango, Nkolo. Kokisa yango, Nkolo. Iyo, Nkolo. Amen.

³⁸ Sikawa, na botosi pe limemia, tobelema na Liloba. Sikawa nalingi kotanga, na ntongo oyo, na Esode mokapo ya 12, kobanda na molongo ya 12, molongo ya 12 kino na 13. Pe boyoka sikawa na bokebi. Bongo liboso ya elambo na mpokwa oyo, botanga mokapo ya 12 ya—ya Esode, mokapo mobimba; mpamba te na molongo ya 11 awa ezali komilengela mpo na mobembo, pe elambo liboso na mobembo. Tolingi kobelema na yango sikawa na limemia nyonso. Sikawa molongo ya 12 ya mokapo ya 12.

Mpo ete ngai nakoleka kati na mokili na Ezipito na butu yango pe nakoboma bana ya liboso nyonso na Ezipito, ná ya bato ná ya bibwele; Ngai Yawe nakosambisa banzambe nyonso na Ezipito.

Makila ekozala elembo mpo na bino, na ndako esika bozali: pe ntango nakomona makila nakoleka likolo na bino, pe etumbu ekokitela bino te mpo na koboma bino, wana nakobeta mokili na Ezipito.

39 Tika Nkolo apambola Liloba na Ye Mosantu!

40 Sikawa nalingi kozua liteya moko uta na yango, bobele liloba moko ya letele mitano: *Elembo*. Elembo! Nalingi koloba likolo na liloba yango, to koteya liteya ya eteyelo ya lomingo oyo, likolo na liloba oyo “elembo.” Biblia elobi awa: “Makila ekozala elembo mpo na bino.” Pe tolingi kosalela liloba oyo “elembo.”

41 Sikawa toyebi te; ntango nazali kotala saa, pe ntango ngonga ekokoka, ee, oyo ezali. . . Nakomaki biteni ya Makomi ebele, ebele awa. Bongo. . . Pe nayebi nakozala elongo na bino te po na mwa ntango. Pe toyebi te soki ekozala mbala ya suka mpo na bamosusu kati na biso kokútana, na bongo tomeke kobelema na Yango na limemia nyonso. Nayebi ezali makambo makasi. Nkolo apesi biso pe—pe ntongo moko kitoko sikawa, mpo na liyangani, kitoko mpenza. Pe tomeke sikawa kotia makanisi na biso nyonso likolo na makambo to—tokolobela, mpo ete. . . soki eloko moko ezali na kati oyo Nkolo alingi boyeba yango, yango ékopesamela bino.

42 Pe totelemi awa te kaka mpo bato bamona biso. Toyaka awa te bobele mpo bato mosusu bamona bilamba tolati. To. . . Bisu, toyaka awa mpo na likambo moko, ndenge ndeko na biso alobaki na libondeli: “Tozali awa mpo na koyoka Liloba, Liloba koya epai na biso.” Tolingi Yango, mpamba te yango nde eloko moko eezali na motuya mpo na biso, eloko moko oyo ezali na motuya monene, eloko oyo—oyo ekosunga biso.

43 Pe tozali libota ezali kokufa. Bato nyonso bazali kokende na ngambo ya Seko na Seko. Na bongo ntango oyo epesameli biso mpo tozua mokano na lolenge nini tokokende kuna. Pe nzela ezali liboso na biso; tokoki kolanda nzela moko to mosusu tolingi kopona. Yango lolenge Atiáki Adama ná Ewa, yango pe lolenge Atii biso.

44 Tosengeli kobosana yango te, ata tosali nini, to boni tozali na elonga, na bomoi oyo, kozanga Klisto, tobungisi mpenza nyonso. Na bongo soki Ye, sima na. . . Soki Azali nyonso tokoki kotiela motema, na bongo tokozala bato na bolema koleka soki toyambi Ye te, tozali, pe—pe tolingi Ye te. Bobele koyamba Ye te, kasi kokóma na likambo monene koleka wana. Sima na yo kozua Ye, kozua Ye te mpo ótia Ye na motalaka. Esengeli kotia Ye na mosala.

45 Ezali lokola okei koluka nkisi epai na monganga, bongo na sima otii yango na motalaka. Soki okei koluka nkisi, mela nkisi yango. Soki bokono ezali kotungisa yo, pe nkisi songolo ekoki kosunga yo, mela nkisi ye apesi yo; pe na lolenge ye alobi ópesa yango, mpo ete, mbala mosusu, mwa miníti moke,

ekopesa bokeseni monene na lolenge opesi yango. Pe tokoyeba ndenge nini . . .

⁴⁶ Kasi na likambo oyo ya lelo, bobele ntango moke ya mokano na yo ekoki kotalisa esika okokende mpo na Seko na Seko. Kamata Yango na lolenge Apesi yo Yango.

Elembo, “Makila ekozala elembo mpo na bino.”

⁴⁷ Sikawa, mpo na kobanda, elembo ezali nini? Ezali liloba moko tosalelaka mingi kati na biso bato tolobaka lokota ya Ngelesa, koleka mingi awa na Amerika. Elembo ezali . . . Solo, buku ya ndimbola elobi ete elembo ezali etaliseli, ezali kotalisa ete ntalo ya tiké efutami, bomoni; ete ti—tiké, to ntalo, ntalo esengamaki esili kofutama.

⁴⁸ Ndakisa tiké na nzela ya engunduka to tiké na nzela ya motuka. Okoti pe osombi ti—tiké na yo, na sima bapesi yo elembo moko, pe elembo yango okoki kosalela yango na eloko mosusu te, bobele na nzela yango ya engunduka. Pe ezali elembo, mpo na kompani ya engunduka, ete ofutaki tiké na yo. Ezali elembo, pe okoki kosalela yango na eloko mosusu te. Ekobonga te mpo na nzela mosusu. Ekobonga bobele mpo na nzela wana. Pe ezali—ezali elembo.

⁴⁹ Sikawa, awa, likambo tozali kolobela, epai tobandi, ezali Nzambe kolobela Yisalaele: “Makila ya mwana na mpate ezali elembo mpo na bino.” Mwana na mpate ya Yisalaele, oyo abomamaki, azalaki elembo Yawe asengaki. Esengeli kozala makila. Nzambe asalaki elembo pe apesaki yango na Yisalaele. Pe elembo mosusu ekobonga te, bomoni, ekondimama te.

⁵⁰ Mpo na mokili, Ezali bobele bolema. Kasi, mpo na Nzambe, Ezali nzela bobele moko. Eloko bobele moko Asengi ezali Elembo wana. Esengeli kozala wana. Pe okoki kozua Elembo te kino ntalo efutama, na ntango wana okómi nkóló ya Elembo oyo epesi yo li—litomba ya koleka na kimia. “Nakomona Makila, Nakoleka likolo na bino.” Ntango nini oyo, ete, litomba nini oyo, koyeba ete, kati na yo, ozali na Mokanda ya Nzela. “Ntango Nakomona Makila, Nakoleka likolo na bino.” Eloko bobele moko Ye akoyeba. Eloko mosusu te ekoki kozua esika na Yango; eloko ya kokitana te, ebongiseli moko te, eloko mosusu te. Osengeli na Yango. Nzambe alobaki: “Nakomona bobele Yango.”

⁵¹ Ata bazalaki bayengebeni ndenge nini, ata bazalaki malamumu ndenge nini, ata batangaki kelasi ndenge nini, ndenge nini balataki, esengelaki bobele na elembo. “Ntango Nakomona elembo, Nakoleka likolo na bino.” Makila ezalaki elembo kotalisa ete e—eloko Yawe asengaki ekokisamaki, ete esalamaki. Makila ezalaki kotalisa elembo. Makila ezalaki elembo. Bomoni? Bomoi oyo . . .

⁵² Nzambe alobáki yango: “Mokolo bokolia yango, mokolo yango bokokufa.” Pe bomoi moko ezuamaki na esika ya bomoi ya mondimi. Nzambe, na mawa na Ye, andimaki eloko moko

kozua esika ya bomoi ya moto na mbindo. Ntango mwana na Ye amiyekisaki mbindo na lisumu, kozanga kondima Liloba, bongo Nzambe, oyo atondi na mawa, azuaki eloko mosusu; pe, ezalaki été, eloko moko esengelaki kokufa esika na ye. Eloko mosusu te ekokaki kosimba.

⁵³ Yango wana mbuma ya pêche pe ba-pome ya Kaina, pe bongo na bongo, esimbaki te. Esengelaki bomoi oyo ezalaki na makila kati na yango, pe esengelaki bomoi ébima na mbeka, pe na ntango wana makila ezalaki elembo ete mobeko na Nzambe etosamaki. Sikawa, Nzambe asengaki nini? Bomoi; pe makila ezalaki kotalisa ete bomoi moko ekufaki. Na bongo makila ezalaki elembo kotalisa ete bomoi moko epesamaki, ete eloko moko ekufaki, eloko Nzambe asengaki; ete bomoi moko epesamaki, pe makila esopanaki. Pe makila ezalaki kotalisa elembo, ete bomoi esilaki. Bomoi ya nyama oyo Nzambe alobaki esengelaki kokamatama, ezalaki makila oyo etiamaki lokola elembo. Bomoni?

⁵⁴ Mo—mo—mosambeli mondimi amikokanisaki na mbeka na ye, na nzela ya elembo. Nalingi koumela mingi te likolo na biteni ya maloba oyo, kasi, bokoki kosala liyangani mobimba likolo na moko na biteni yango, kasi nalingi kotelema awa moke mpo námonisa yango malamú. Mo—mo—mondimi asengelaki komikokanisa na mbeka na ye. Bomoni? Soki ezali bobele mbeka moko oyo—oyo apesaki esika moko, apesaki yango; kasi asengelaki komikokanisa na yango. Ya solo, asengelaki liboso kotia maboko na ye likolo na yango, mpo na komikokanisa na mbeka na ye. Na sima makila etiamaki esika moko ye ákokaki kozala na nse ya makila. Makila esengelaki kozala likolo na ye. Pe ezalaki elembo kotalisa ete amikokanisaki, akweyaki na likambo, pe atalisaki ete eloko ezangi ekweli ezuaki esika na ye.

⁵⁵ Oyo nde etaliseli kitoko! Oh, mosikolami! Bomoni, boyengebene ekokisamaki, pe bosenga ya boyengebene bosantu ya Nzambe ekokisamaki. Pe Nzambe alobaki: “Sikawa Nakosenga bomoi na bino,” ezalaki, ntango bo—bo—bomoi yango esalaki lisumu. Na sima eloko ezangi ekweli ezuaki esika na ye. Pe ezalaki nyama ya makila; mbuma ya pêche to pome te. Yango esengeli mpenza kotalisa momboto na nyoka polele na moto nyonso, ete ezalaki makila. Pe makila yango, ekokaki kouta na mbuma te, eutaki na eloko ezangi ekweli. Bomoi na yango pe—pe ebimaki, esika na ye, pe makila ezalaki elembo kotalisa ete nyama ekufaki pe makila ebimaki.

⁵⁶ Pe mosambeli oyo apakolaki makila mpo na ye moko, atalisaki ete amikokanisaki na lisiko, mpo amikokanisaki na . . . na mbeka, amisangisaki na mbeka, pe makila ezalaki lokola elembo.

⁵⁷ Oyo—oyo likambo kitoko! Oyo etaliseli kitoko! Ezali elilingi ebongi be ya Klisto, yango mpenza, mondimi ya lelo oyo

atelemi na nse ya Makila esopanaki, amikokanisi na Mbeka. Ebongi mpenza be na—na ndenge ekoki! Pe lolenge Klisto, oyo—oyo azalaki nyama te . . . Bomoni, nya—nyama ekufaki, kasi ezalaki . . .

⁵⁸ Eloko ezangi ekweli koleka, oyo tozali na yango, nakanisi, ezali nya-nyama, mwa—mwana na mpate. Ntango Nzambe alingaki kokokanisa Yesu Klisto, Akokanisaki Ye na Mwana na mpate. Pe ntango Alingaki komikokanisa Ye moko, Amikokanisaki na ndeke, Ebenga. Pe ebenga ezali ndeke oyo eleki na boboto pe na bopeto kati na bandeke, pe mwa—mwana na mpate ezali nyama oyo eleki na boboto pe na bopeto kati na banyama. Na bongo bomoni ntango . . .

⁵⁹ Yesu abatisamaki na Yoane, pe Biblia elobi: “Pe—pe amonaki Molimo na Nzambe, lokola ebenga, kokita likolo na Ye.” Yango wana soki ezalaki . . . Soki ézalaka nkoi, to soki ezalaki nyama mosusu, lo—lolenge ya ebenga ekokaki kosangana na lolenge na nkoi te, ndenge moko pe lo—lolenge ya ebenga ekokaki kosangana na lolenge ya nyama mosusu te bobele mwana na mpate. Pe lolenge mibale wana esanganaki, na bongo bakokaki koyokana moko na mosusu.

⁶⁰ Sikawa bomoni kobongisama liboso? Ntango ezalaki wana ezalaki mwana na mpate. Bomoni? Bomoni? Mwa . . . Ezalaki mwana na mpate ntango—ntango ebotamaki. Ezalaki mwana na mpate. Ebotamaki mwana na mpate. Ebokolamaki, mwana na mpate. Bomoni?

⁶¹ Pe, na bongo, ezali lolenge bobele moko ya Molimo ya solo oyo ekoki koyamba Liloba, oyo ekoki koyamba Klisto. Bamosusu bakomeka, bamekaki kozua Yango, pe kotia Molimo na Nzambe likolo na nkoi, bomoni, ya nkanda, ya mabe, ya nkanja. Akofanda wana te. Molimo Mosantu akopimbwa mbala moko. Akosala yango te.

⁶² Boni boni soki Ebenga ékitaki, pe, esika ya Mwana na mpate, ezalaki nde nyama mosusu? Alingaki kopimbwa mbala moko pe kozonga na ye. Bomoni? Kasi ntango akutaki lolenge, oyo Akokaki kosangana na yango, Bakómaki Eloko moko.

⁶³ Na bongo e—e—Ebenga akambaki Mwana na mpate, pe, botala, Akambaki Mwana na mpate kino na ebomelo. Sikawa, Mwana na mpate atosaki Ebenga. Bomoni? Ata Akambaki Ye wapi, Abelemaki kokende.

⁶⁴ Nazali komituna, lelo, ntango Nzambe azali kokamba biso na bo—bomoi ya komipesa mobimba pe kosalela Ye, nazali komituna soki milimo na biso etombokaka te ntango mosusu, kotalisa lolenge moko, nazali komituna soki tozali bana na mpate? Bomoni? Bomoni? Mwana na mpate atosaka.

⁶⁵ Mwana na mpate amikabaka mbeka. Ye—ye a—ye amilongisaka te, amilobelaka te. Okoki kolalisa ye na nse pe kolongola leni na ye. Yango eloko moko azalaka na yango. Ye—

ye alobaka eloko moko te mpo na yango; akabaka nyonso azali na yango. Wana nde mwana na mpate. Apesaka nyonso na . . . akakaba nyonso, ye moko ná nyonso ye azali.

⁶⁶ Yango nde lolenge ya Moklisto ya solosolo, soki bango . . . bamikabaka mbeka, bamitungisaka te mpo na mokili oyo, kasi bapesaka nyonso bazali na yango na Nzambe. Bomoni?

⁶⁷ Na boye nde Klisto azalaki Mwana na mpate oyo abongi be. Na bongo, na nzela ya kosopama makila ya mwana na mpate oyo, mwana na mpate na Ezipito, bapokolaki makila, pe, ntango basalaki yango, ezalaki elembo, bongo Makila ya Mwana na mpate oyo ekotalisa nini? Bomoni? Elembo ete tokufi na biso moko pe tomikokanisi na Mbeka na biso. Bomoni? Bongo, Mwana na mpate pe—pe—pe Makila ná moto yango bakokanisami elongo, Mbeka ná mondimi. Bomoni, omikokanisi na bomoi na yo, na nzela ya Mbeka na yo. Yango ekomisi yo oyo ozali.

⁶⁸ Na bongo makila ezalaki elembo, to etaliseli. Makila etalisaki ete mosambeli abomaki mwana na mpate, pe andimaki mwana na mpate, pe atiaki elembo mpo na ye moko, kotalisa ete ayokaki nsoni te. Azalaki na ntina te na bato bamonaki yango. Alingaki bato nyonso bamona yango, pe etiamaki na lolenge ete moleki nzela nyonso ákoka komona elembo yango.

⁶⁹ Bomoni, bato mingi balingaka kozala Baklisto, pe ba—ba—balingaka kosala yango na kobombama, mpo bato ba—bayeba te ete bazali Baklisto. To, ba—baninga batambolaka na bango, bamosusu na bango bakanisaka: “Ee, sikawa, tala, na—na—nalingi kozala Moklisto, kasi nalingi te *Songolo* ayeba likambo yango.” Bomoni? Ee, sikawa, bomoni, wana ezali Boklisto te.

⁷⁰ Boklisto esengeli kotalisa Elembo na yango, bomoni, polele, na miso na bato nyonso, na biró, na balabala, na ntango ya mpasi, na likambo nyonso, na losambo, bipai nyonso mosusu. Makila ezali Elembo, pe Elembo esengeli kotiamama, bomoni, to (ezali te) boyokani yango ezali ata na ntina te.

⁷¹ Makila ezalaki elembo, to etaliseli, kotalisa ete moto oyo asikolami. Sikawa, ee, botala, bazalaki, basikolamaki liboso makambo nyonso esalema. Na nzela na kondima batiaki makila. Bomoni, liboso makambo esalema, batiaki makila na nzela na kondima, kondima ete likambo ekosalema. Bomoni? Liboso nkanda na Nzambe eleka na mokili, makila esengelaki liboso kotiamama. Ngonga elekaki sima na nkanda na Nzambe kokita.

⁷² Sikawa, tozali wana na liteya tokoki mpenza, ntango mosusu, kokanisela bino, mwa moke. Botala, *liboso* likambo yango esalema, mpo ekozala na ntango moko, oyo bokozala lisusu na makoki ya kotia Makila te.

⁷³ Mwana na mpate abomamaki na ntango na mpokwa, sima na kobatelama mikolo zomi na minei. Na sima mwana na mpate abomamaki pe makila etiamaki na ntango na mpokwa. Bososoli

yango? Elembo emonanaki ata moke te kino na ntango na mpokwa.

⁷⁴ Pe oyo nde ntango na mpokwa ya eleko tozali kobika na yango. Oyo nde ntango na mpokwa mpo na—mpo na Lingomba. Oyo nde ntango na mpokwa mpo na ngai. Oyo nde ntango na mpokwa mpo na Nsango na ngai. Nazali kokufa. Nazali kokende. Nazali kolongwa, na ntango na mpokwa ya Nsango Malamu. Pe tolekaki na kolongisama, pe bongo na bongo, kasi oyo nde ntango Elembo esengeli kotiana. Nayebisaki bino lomingo eleki ete nazalaki na likambo moko nalingaki kolobela bino; yango oyo. Ezali ntango oyo bo—bokoki lisusu kosakana na Yango te. Esengeli kotiana. Soki esengeli mpenza kotiana, esengeli kotiana sikawa. Mpamba te, tokoki komona ete etikali moke nkanda yango eleka kati na mokili, pe nyonso ekozala libanda ya Elembo ekokufa. Makila, ekotalisa yo polele. Botala.

⁷⁵ Mpamba te, bomoi ya nyama ekokaki kozonga likolo ya moto te. Ntango makila esopanaki, bomoi ebimaki, na ntembe te, mpo ezalaki eloko moko. Pe ntango makila ya bomoi ebimaki, lokola bomoi ekesani na makila. . . Sikawa, makila ezali etaliseli ya bomoi, kasi bomoi ekesani na makila, kasi bomoi ezalaka kati na makila. Pe bomoi ya nyama ekokaki kozonga likolo ya mosambeli te. Ntango asopaki makila oyo ya mwana na mpate, asengelaki kopakola yango mpo ete bo—bomoi ebimaki pe ekokaki kozonga te.

⁷⁶ Mpamba te, ekokaki kozonga likolo na moto te, mpo bomoi ya nyama ezali na molimo te. Nyama ayebaka te ete azali bolumbu, pe ye—ye. . . Ayebi likambo ya lisumu te. Eyebi yango te, na bongo ezali ekelamu na bomoi kasi molimo na bomoi te. Yango wana, bomoi yango ya nyama ekokaki kozonga likolo na bomoi ya moto te, mpo ezalaki na molimo te kati na bomoi yango. Sikawa, ezali na bomoi moko, makila; bomoi, pe molimo kati na bomoi; molimo ezali lolenge ya bomoi. Na bongo, ezalaki na lolenge moko te, ezalaki nyama, yango wana makila ezalaki elembo kotalisa ete bomoi moko epesamaki.

⁷⁷ Kasi na esika oyo ya nkembo, na nse ya boyokani oyo, bokeseni ezali kati na Makila pe Bomoi. Elembo mpo na mondimi lelo ezali Molimo Mosantu; makila te, etaliseli, kasi Ezali Molimo Mosantu ya Nzambe. Yango nde Elembo Nzambe azali kosenga na Lingomba lelo. Nzambe asengeli komona Elembo yango. Asengeli komona Yango kati na moko na moko na biso.

⁷⁸ Yango wana, lokola bililingi ya mpokwa ezali komonana, pe etikali moke nkanda esopama uta na Likolo, likolo na bikólo ya mbindo, pe likolo na bazangi kondima ya mbindo, likolo na ba—bato bayambolaka kasi bazali na eloko te, likolo na makambo oyo! Pe na—namekaki komifungola pe kobika sembo kati na yango, mpo nayeba yango malamumu, liboso naloba makambo oyo.

Sikawa tozali kobika na bililingi, pe etikali moke nkanda ebeta, pe Nzambe azali kosenga Elembo ete yo moko oyambaki Elembo na Ye, Molimo Mosantu. Ezali nzela bobele moko, pe elembo bobele moko, oyo Nzambe akoleka likolo na yango, mpo Yango ezali mpenza Bomoi ya Yesu Klisto, oyo ezongi kati na mondimi.

⁷⁹ Bomoi ya nyama ekokaki kozonga te, yango wana basengelaki kotia makila na ekuke, likolo na libaya ya ekuke pe likolo na makonzi ya ekuke; mpo ete moleki nzela nyonso, bato nyonso, moto nyonso azalaki koleka liboso ya ndako, bayeba ete e—elembo moko, ya makila, ezalaki na ekuke, kotalisa ete bomoi moko ekufaki na ekuke wana. Amen!

⁸⁰ Lolenge yango moko nde esengeli kozala na mondimi nyonso lelo, oyo atondi na Molimo Mosantu; Elembo kotalisa ete Makila ya Mwana na Mpate esopanaki, pe Bomoi oyo ezalaki kati na Mwana na mpate, ezongi pe ekangami na elembo polele kuna na kati, pe baleki nzela nyonso, oyo bazali kosolola na yo, pe bazalani na yo, bazali komona ete Makila etiamaki, pe Elembo ya Bomoi oyo ezalaki kati na Makila ezali likolo na yo. Obatelami na nkanda. Bobele yango; kalati ya mondimi te. Te, misie!

⁸¹ Bomoi ya nyama ekokaki kozonga likolo na mondimi te, mpo ezalaki nyama, pe ezalaki bobele kolobela lisosoli, kotalisa ete Mbeka ebongi be ekoya.

⁸² Pe, sikawa, ndenge nini Mbeka mosusu ebongi be ekokaki kozala koleka Nzambe Ye moko, oyo Akómaki Mboni, Ye moko? Ntango Nzambe akómaki mosuni, uta na Makila Ye moko akelaki, ete yango... ezalaki lolenge bobele moko Bomoi na Nzambe ekokaki kozonga.

⁸³ Mpamba te, biso nyonso tobotama na nzela ya koyebana nzoto, yango bomoi kati na biso ezali ya mokili, pe bomoi yango ekoumela te. Yango nde eloko esambisama pe ekweisama. Okoki kobamba yango te. Lolenge ya kobamba yango ezali te. Lolenge ya—ya kosembola yango ezali te. Lolenge ya kobongisa yango ezali te. Esengeli kokufa! Likambo bobele moko esengami ezali yango wana. Esengeli kokufa.

⁸⁴ Pe Eloko ya kozua esika, Bomoi ya Yesu Klisto, esengeli kokota kati na yo, yango nde Molimo Mosantu, Elembo ya Nzambe; kotalisa ete ondimi Makila ya Mwana na Ye, Yesu Klisto.

⁸⁵ Yango wana, na mikolo ya Wesley to... Na mikolo ya Luther, bakanisaki “kondima.” Na mikolo ya Wesley, “bilembo ya Makila.” Kasi oyo nde mikolo ya suka, epai e—Elembo esengami. Pe nyonso wana, elongo, ezali kosala lisanga mobimba mpo na Konetolama. Bomoni yango? [Losambo balobi: “Amen.”—N.D.E.]

⁸⁶ Mai, makila, pe molimo ebimaka ntango mama abotaka mwana. Eloko ya liboso ebimaka, na mbotama nyonso, ezali mai, ya mibale ezali makila, pe eloko elandi ezali bomoi.

⁸⁷ Ebimaki na nzoto ya Nkolo na biso Yesu Klisto : mai, Makila, pe Bomoi. Pe Lingomba mobimba, Mwasi na libala, elongo, atongámí na nzela ya kolongisama, kobulisama, pe libatisi ya Molimo Mosantu, oyo ezali Elembo.

⁸⁸ Lokola Baebele 11 elobi: “Baoyo nyonso wana bazalaki kotelengana, kolata mposo na mpate pe mposo na ntaba, bazalaki kokélela, pe makambo nyonso oyo basalaki, ata bongo bakómaki na kobonga te soki bobele elongo na biso.”

⁸⁹ Pe Lingomba, na mikolo oyo, oyo ezui Elembo, ya libatisi ya Molimo Mosantu, kotalisa ete Makila esopanaki pe Molimo Mosantu azali na Lingomba; kozanga biso, bakoki pe kosekwa te. Kasi bazali kotalela biso, mpo Nzambe alakaki Akozua Yango, pe moto moko akozala wana. Nayebi te soki ekozala nani, kasi moto moko akoyamba Yango. Bobele likambo moko ezali mokumba na ngai, ezali koteya Yango. Ezali mosala na Nzambe koluka momboto oyo ebongisamá liboso. Ata ndenge nini, ekozala wana. Mpamba te, bakozala wana, moko na moko na bango, moko na moko; eleko ya mai, eleko ya Makila, pe sikawa eleko ya Elembo ya Molimo Mosantu.

⁹⁰ Pe, bomikanisela, Yisalaele alekaki na makambo ebele, kasi ezalaki na ntango ya mpokwa nde elembo esengamaki; na ntongo te, na ntango ya komilengela te, mikolo zomi na minei oyo bazaláká kobatela mwana na mpate. Yisalaele ayebaki ete likambo moko ekosalema.

⁹¹ Luther pe ayebaki yango, Wesley pe ayebaki yango, Finney, Knox, Calvin pe bayebaki yango. Yango oyo! Bayebaki ete ntango moko ekoya, oyo Likonzi na Móto ekozonga lisusu na Lingomba. Bayebaki ete ntango moko ekoya, oyo makambo oyo ekosalema, kasi babikaki ntango molai te mpo na komona yango, kasi bazelaki yango na mitema likolo.

⁹² Yisalaele ayebaki eloko moko ekosalema, kasi ezalaki na ntango na mpokwa nde makila na mwana na mpate, elembo, etiamaki na ekuke. Kasi, mwana na mpate asilaki kobatelama.

⁹³ Ezalaki Mwana na mpate ntango nyonso wana. Ezalaki Mwana na mpate na ntango ya Luther, ezalaki Mwana—Mwana na mpate na ntango ya Wesley, kasi sikawa ezali ntango ya Elembo, esengeli na ndako moko moko kozipama na Elembo. Ndako na Nzambe moko moko esengeli kozipama na Elembo. Nyonso ezali kati na yango esengeli kozipama na Elembo. Pe Ndako na Nzambe ezali Nzoto ya Yesu Klisto, pe na nzela ya Molimo moko biso nyonso tobatisami kati na Elembo oyo pe tokómi eteni na Yango, oyo Nzambe alobaki: “Ntango Nakomona ete Elembo yango etiami, Nakoleka likolo na bino.” Ngonga nini tozali kobika sikawa! Oh!

⁹⁴ Makila ezalaki kotalisa, kotalisa mondimi, mpo bomoi ebimaki pe ekokaki lisusu kozonga te, na bongo asengelaki kozala na—na etaliseli. Asengelaki kozala na eloko lokola

langi, makila, etaliseli, oyo ezalaki kotalisa ete bomoi ebimaki na yango.

⁹⁵ Sikawa Molimo Ye moko azali Elembo. Molimo Mosantu Ye moko azali Elembo, Makila te. Makila esopanaki na Kalvario, ezali solo. Kasi Makila, na ndenge ezalaka, ezongaki biteni na yango ya ebandeli, na bilei oyo Yango eliaka. Kasi, bomoni, na kati kati ya Makila, ezali na Bomoi oyo esalaka ete Makila ezala kobika pe koningana. Soki ezalaki . . . Makila yango moko ezalaka na Bomoi te kati na yango, yango wana ekoki pe koningana te. Kasi ntango Bomoi ekotaki kati kati na makila, Esalaki cellule. Esalaki cellule na Yango moko, na sima cellule moko eboto mosusu, kino ekómaki Moto. Pe Moto yango azalaki Nzambe, Emanuele, kati na mosuni. Kasi ntango Bomoi yango ezongaki, makila yango ekendeki kuna, kasi Elembo ezali Molimo Mosantu likolo na Lingomba, mpo bato bamona Klisto.

⁹⁶ Esengeli kozala bongo, mpo mwasi ná mobali na ye bakómi moto moko. Bakómi moto moko. Ndenge moko pe Mwasi na libala ná Klisto bakómi Moto Moko. Mosala ya Mwasi na libala, ná mosala ya Klisto, ezali ndenge moko. Pe bomikanisela: “E Teofili, nakomelaki yo, na buku na ngai ya liboso, na ntina na makambo oyo Yesu abandaki kosala pe Azali kokoba kosala.” Kufa na Ye etelemisaki Ye te. Te, misie! Azongaki lisusu. Moto na misato te, kasi Moto yango moko azongaki lisusu na lolenge ya Molimo Mosantu, mpo na kokoba mosala; pe kokoba, ndenge Buku ya Misala elobi. “Yesu Klisto azali ndenge moko, lobi, lelo, pe libela.” Yango nde Elembo. Yango nde etaliseli.

⁹⁷ Ntango Petelo ná Yoane balekaki liboso ya ekuke ebengami Kitoko, moto moko azalaki wana akufa makolo, ebosono longwa libumu ya mama na ye, pe alobaki: “Mosolo na wolo nazali na yango te; kasi nakopesa yo oyo nazali na yango. Na Nkombo na Yesu Klisto ya Nazaréte, telema pe tambola.” Bomoni? Pe basololaki na bango, pe bayebaki ete bazali bayinga pe bato bayekoli te, kasi basosolaki ete bazalaki na Yesu elongo. Bomoni, Elembo ezalaki wana, polele. Bomoni: “Oyo nazali na yango!” Emonaki bango mobola, ndeko oyo akwei, alali wana, akufa makolo pe mawa na elongi, pe nyonso wana. Pe Bomoi moko oyo ezalaki kati na Klisto, ezalaki pe kati na bango: “Oyo nazali na yango!”

⁹⁸ “Na Nkombo na Ngai bokobengana milimo mabe.” Ezali te, “Ngai.” “Bino!” “Soki bolobi na ngomba oyo!” Ezali te ete, “Soki Ngai nalobi.” “Soki bino bolobi na ngomba oyo!”

⁹⁹ Oh! ndeko, ntango Elembo yango esengeli kotalisama polele ebelemi. Tokoki komona yango. Toyebi ete tobelemi na suka sikawa. Toteyaki mateya ndenge na ndenge, mpo na kotalisa bilembo pe bikamwa, pe tala sikawa tokómi na oyo Lingomba esengeli kosala. Elembo esengeli kotalisama polele. “Ntango Nakomona makila, Nakoleka likolo na bino.” Eloko mosusu te

ekotambola. Esengeli bobele Makila. Sikawa, Molimo Mosantu nde Elembo na biso, uta na Nzambe.

¹⁰⁰ Lokola moto monene ya likindo, a—ayekolá mingi, ndeko moko Batiste, moto malamau, na ezaleli malamau, ayaki epai na ngai mokolo moko, pe alobaki: “Ndeko Branham,” alobaki, “ozali koloba mpo na Molimo Mosantu,” alobaki, “ee, ezali likambo ya sika te.” Alobaki: “Toteya Yango, bileko na bileko.” Pe na—nalobaki, ee, nako. . . Alobaki: “Tosila kozua Molimo Mosantu.”

¹⁰¹ Nalobaki: “Ozuaki Yango ntango nini?”

¹⁰² Alobaki: “Ntango nandimaki.” Mpo ete, nayebaki yango ezali likindo ya ba-Batiste, elobaka ete, ntango moto andimi, azui Molimo Mosantu.

¹⁰³ Nalobaki: “Bongo Polo alobaki, na Misala 19, na etonga, na lisanga ya ba-Batiste, baoyo, motei moko Batiste, azaláká moko na bandimi ya Yoane, azalaki kotalisa na nzela na Biblia ete Yesu azalaki Klisto.”

¹⁰⁴ “Elekaki ye likolo na ngomba na mokili ya Efese, azui bayekoli mosusu wana, pe alobi na bango ete: ‘Wana endimaki bino, bozui Molimo Mosantu?’ Balobaki: ‘Biso toyebi te soki Molimo Mosantu azali.’” Na bongo atunaki bango lolenge nini babatisamaki. Bango babatisamaki naino na Nkombo na Yesu Klisto te, Mwana na mpate ya mbeka. Bamikokanisaki na Ye ata moke te. Bandimelaki bobele yango; lokola nkisi oyo etiami wana, kasi bameli yango te. Polo atindaki bango bazua lisusu libatisi, na Nkombo na Yesu Klisto.

¹⁰⁵ Pe ntango bazuaki yango, na bongo Elembo eyaki likolo na bango. Bamikokanisaki na misala pe bilembo ya Molimo Mosantu, na koloba minoko na sika na nzela na bango, kosakola, pe kokumisa Nzambe. Bamikokanisaki na—na Mbeka na bango.

¹⁰⁶ Pe Molimo Mosantu ezali etaliseli na biso. Yango nde etalisaka biso lokola Baklisto. Ezali te kozala moto na biso ya lingomba, ezali te lisosoli na biso ya Biblia, ezali te koyeba Biblia mingi. Ezali nde koyeba malamau Mokóló na yango, bomoni, lolenge Mokóló na yango azali kobika kati na yo. Ezali—ezali ngai-ngai na yo nde elongwe. Yo ozali lisusu te. Ozali komimona mokufi, pe Elembo nde ezali kobika kati na yo. Ezali lisusu bomoi na yo te; Ezali Ye.

¹⁰⁷ Polo alobaki: “Bomoi nazali kobika sikawa.” Azalaki kobika bomoi ekeseni na oyo azaláká liboso. “Ezali ngai te, kasi Klisto azali kobika kati na ngai.” Yango nde Elembo etalisemi oyo Nzambe azalaki kosenga. Tomikokanisi na . . . Komikokanisa na Mbeka na biso, Bomoi ya Mobikisi na biso kati na biso, Molimo Mosantu.

¹⁰⁸ Oh, Oyo nde—oyo nde Elembo ya malamau! Elembo mosusu ya koleka ezala te. Oh! la la!, soki bokokaki mpenza kososola

li—likanisi yango. Soki nazalaki na—na makoki na ntongo oyo, na maloba, ya kolimbola pe kokotisa yango na molimo na bino ya kati kati; na matoi na bino te, kasi milimo na bino, bo—bokokaki komona ndanga Yango. E—esengeli, Ekokitisa mpenza mitema na bino.

¹⁰⁹ Nini elingaki kosalema soki ozalaki, soki obomaki moto, pe esengelaki osambisama na esambiselo ya léta. Pe oyebi ete soki bamoni ete okweisami na likambo, okokufa, okobomama na kiti ya lotilíki, to na ndako ya gaze, to kobomama na lolenge nyonso bakozua mokano, ntango mosusu na nsinga na nkingo, to eloko mosusu, kobwakama mabanga, to etumbu nini mosusu. Pe oyebi ete ozali na . . . Okweisami na likambo. Oyebi ete okwei na likambo, pe osengeli kokufa soki ozui avoká te mpo na kosamba mpo na yo, oyo akoki kobimisa yo na likambo yango. Na bongo okoluka kozua avoká ya malamau koleka.

¹¹⁰ Pe wana ozui avoká ya malamau, avoká ya mayele mingi, okomiyoka lokola likambo na yo ezali moke . . . okokoka kokitisa motema mwa moke, mpo ozui avoká. Ata bongo, okomituna soki avoká yango akokoka kobongola likanisi ya zuzi, to kobongola likanisi ya basambisi; soki avoká yango, na maloba na ye ya mayele pe boyebi na ye mibeko, akokoka kobongola yango, soki akokoka kolobela likambo na yo pe kotalisa polele ete—ete okokufa te. Ata bongo, na bo—bokonzi nyonso na ye monene pe elobeli na ye kitoko pe lolenge malamau ye akoki kotalisa liboso ya basambisi to liboso na zuzi, yo—yo oko—oko . . . Ntango mosusu okoki kokitisa motema miniti moke, ata bongo okozala bobele komituna: “Akolonga solo?”

¹¹¹ Kasi mpo na likambo oyo, Zuzi Ye moko akómi Avoká na biso. Nzambe akómaki moto. Avoká moko te akokaki kosala yango. Tokokaki kozua ata moko te. Mose, ná Mibeko, basakoli, eloko moko te ekokaki kosala yango. Na bongo Zuzi akómaki ye moko Mosambisi, Avoká, pe Zuzi, Ye moko; pe Azuaki boyengebene ya Mobeko na Ye na maboko na Ye Moko, pe Afutaki motuya na yango, Ye moko. Tokoleka kobatelama ya boye boni boni? Pe Azongiselaki biso Bomoi na Ye Moko, lokola litatoli ete Andimi yango. Oyo nde kobatelema!

¹¹² “Ata natamboli na libulu na molili na kufa, nakobanga mabe te, mpo ‘te Yo ozali na ngai elongo.”

¹¹³ Ntango Akómaki ye moko Zuzi, Mosambisi, pe—pe Avoká, Asambaki likambo na biso. Bisó, tokweisamaki na Mobeko na Ye Moko; pe Ayaki kozua esika ya moto oyo akweisamaki, ezalaki na esika ya bulee. Akamataki lisumu na ye. Amemaki yango Ye moko, pe Akufaki, Afutaki motuya, pe Asopaki Makila na Ye, pe Azongisaki Elembo na Ye moko, Bomoi na Ye moko.

¹¹⁴ Na boye nde, tobongi be. Likambo esili. Lisumu ezali lisusu te mpo na mondimi. E Nzambe, yokela biso mawa, soki bato bakoki komona yango te, ete likambo ezali lisusu te. “Ye oyo

akoyoka Maloba na Ngai pe akondima Motindi na Ngai, azali na Bomoi na Seko, pe akokóma na Esambiseli te, asili kolongwa na kufa pe koingela na Bomoi.” Likambo nde yango. Likambo esili! Likambo ezali lisusu te. Amen! Na bongo obatelami, obatelami ná Elembo oyo etiami, ntango liwa ekobanda kobeta na ekuke, ezali ata na nguya te. Bomoni? Iyo.

¹¹⁵ Elembo etiami. Eloko eyebani sikawa ezali bobele Elembo. Bomoni, Asalaki bongo mpo Elembo ekoka koya. Elembo ezalaki Bomoi na Nzambe.

¹¹⁶ Pe ntango Nzambe asalaki moto ya liboso, Amisalelaki mwana mobali. Pe mwana yango amibebisaki mingi kino ayokaki mwasi na ye na esika ya Nzambe, pe mwasi ayokaki zabolo na esika ya mobali na ye, pe, na ntango wana, bamibebisaki mpenza bango mibale, kino yango ememaki mbindo. Pe Ye ayebaki ete, lokola basalaki bongo, bakosengela kobota bana na mokili. Mbuma oyo ezalaki katikati ya nzete ekokaki kosimbama te, pe, na bongo, ntango esalamaki, bamibendelaki lisumu yango bango moko. Pe yango wana libota mobimba ya bato, oyo babotama, babotama na lisumu. Kuna, nzela ya kobima ezali te.

¹¹⁷ Na nsima Nzambe akitaki. Nzela ya kozongisa ye ezali bobele moko; ezali Amisalela lisusu mwana mobali. Pe ndenge nini Akoki kosala yango, ntango oyo Mobeko na Ye Moko ezalaki wana pe elobaki ye “akweisami”? Na bongo Tata Ye moko akómaki moko na biso. Ye nde Mwana na mpate ya solo. Yango nde mwango na Ye ezalaki na Ye na makanisi.

¹¹⁸ Tala ntina Mwana na mpate atalisamaki polele na Elanga na Edene, koyeba ete Mwana na mpate pe Ebenga bakokutana na ntango moko, ntango Mwana na mpate pe Ebenga bakozala elongo. Na ntango wana nde Ayebaki, na nzela na yango, été biso nyonso tokoki elongo. Pe Andimaki kosala mbeka ya lolenge oyo, sikawa, mpo Elembo ekoka kotiyama, ete tozali lisusu bato ya libanda te, tozali lisusu bapaya te, kasi tokómi bana mibali pe bana basi ya Nzambe. Adama ná Ewa bango mibale, mwasi ná mobali, basangani elongo, bakómi bana mibali pe bana basi na Nzambe, kati na Klisto Yesu, na nzela ya mbeka na Ye monene.

¹¹⁹ Pe, na sima, mpo libunga moko ezala te! Momboto ya bomoi oyo, oyo esengeli kolonama na mabele, ya nzoto oyo, oyo ezali mo—momboto ekufaka; pe bomoi, soki ezali na bomoi ya kobeba kati na momboto, ekokufa elongo na momboto. Kasi Atiaki Bomoi na Seko kati na yango pe Akokanisi yango oyo ya Ye moko, mpo Asekwise yango na lisekwa, pe ekobunga te. Bomoni nini nalingi koloba? [Losambo balobi: “Amen.”—N.D.E.]

¹²⁰ Yango oyo, ekoki lisusu kokufa te. Bomoi ezipi yango. Ezali Elembo, ezipi nzoto yango ya moke, ezipi molimo ya moto yango. Ezali na Elembo moko wana, Molimo Mosantu, kotalisa ete azali ya Nzambe. Azali ya Ye. “Ntango Nakomona Elembo,

Nakoleka likolo na bino.” Elembo ya malamau, Molimo Mosantu azali Elembo na biso. Yango wana, ntango ozui Molimo Mosantu, olongwe na kufa pe oingeli na Bomoi. Ezali nde nyonso wana, mpo ete Bomoi ezali kati na yo. Okoki lisusu kokufa te.

¹²¹ Biblia elobi: “Ye oyo abotami na Nzambe asalaka lisumu te, mpamba te akoki kosala lisumu te, mpo ete Momboto na Nzambe,” amen, “Momboto na Nzambe efandi kati na ye.” Pe ndenge nini akoki kosala lisumu ntango Nzambe oyo azangi lisumu azali kati na ye? Ntango azali kati na Nzambe oyo azangi lisumu, ndenge nini akoki kosala lisumu? Ata asalaki nini, Makila ezipaki ye. Bomoni? Akómi sikawa ekelamu ya sika. Mposa pe elikia na ye ezali ya Lola, mpo abongwani longwa na matiti ya nzube akómi lisangu. Bamposa na ye ekesani na lolenge ya kalakala, pe azali kotalisa yango polele.

¹²² Bokoloba: “Oh, nandimaka Yango.” Pe ozali kokoba kosala masumu? Te! Opengwisami. Bomoni? Ekoki kotalisa bobele Elembo.

¹²³ Yisalaele atindamaki kotikala na nse ya makila wana kino mitindo ya kotambola epesama. “Bolongwa na nse na yango te!” Bobele ntango bakotaki na nse ya elembo, bakangamaki wana na elembo. “Bolongwa wana te!” Batikalaki wana kino minuit ebetaki pe bakelelo eyulaki. Pe ntango bakelelo eyulaki, pe maséké ya bampate mibali ebandaki kobeta, moto na moto abimaki na biloko na ye, mpo na kokende na mboka na elaka.

¹²⁴ Ezali pe bongo na mobali to mwasi oyo atondisami na Molimo Mosantu, atiami elembo, pe abatelami mosika na mabe pe likama nyonso. Bomoi na ye mobimba ezali kotalisa oyo ye azali, ata akei wapi, ata asalaka mosala nini, ata asololi na nani. Ntango akutani na basi, ntango akutani na baninga, ntango akutani na likambo nini, Elembo yango ezali wana. Amen! Na ntango ya liwa: “Nakobanga mabe te, mpo Yo ozali na ngai elongo,” Elembo yango ezali wana. Na ntango ya lisekwa, ekozala wana, mpo ete Nzambe akosekwisa ye na mokolo ya suka. Yesu alobaki bongo! “Ntango Nakomona Makila, Elembo, Nakoleka likolo na bino.” Oh!

¹²⁵ Bomikanisela, soki elembo yango etiamaki te, boyokani pe ezalaki na ntina te. Ya solo. Boyokani ezalaki na ntina te. Boyokani ezalaki te—ezalaki te na ntango nyonso oyo elembo ezalaki te. Elembo ezalaki kotalisa boyokani. Nzambe asalaki boyokani na bango, iyo misie, kasi esengelaki elembo ezala. Boyokani ezalaki na ntina te, ezalaki na ntina te, bobele kino elembo etiamaki wana.

¹²⁶ Ntango mosusu Bayuda mingi bakokaki koloba: “Yaka awa! Ngai nazali na makila na ekuke na ngai te, kasi nalingi kolakisa yo eloko moko, nazali Moyuda oyo akatama ngenga. Nakatama ngenga.” Ezalaki likambo *wana* te. [Ndeko Branham alelisi

misapi na ye—N.D.E.] “Ntango Nakomona makila! Ntango Nakomona elembo!”

¹²⁷ Ntango mosusu okoloba: “Nazali Batiste, Presbiterien, Metodiste,” to nyonso olingi kozala.

Kasi: “Ntango Nakomona Elembo!”

¹²⁸ Okoloba: “Nazali mondimi. Mama na ngai azaláki mondimi ya lingomba oyo. Papa na ngai azaláki mondimi ya lingomba oyo. Nazali mondimi na yango banda bomwana.” Ezali likambo *wana* te. [Ndeko Branham alélisi misapi na ye—N.D.E.] “Ngai nakosaka te, nayibaka te. Nasalaka likambo *boye* te. Ngai. . .” Ezali *yangó* te. [Ndeko Branham alélisi misapi na ye.] “Nazali moto ya Branham Tabernacle. Nasalaka *boye na boye to boye*. Nandimaka Liloba nyonso.”

¹²⁹ Bayuda bakokaki koloba: “Nandimaka Yawe!” Ayokaki Nsango ya ntango, soki andimaka Ye. Na ntembe te.

Bazuáká ba-nsango ebele, kasi Oyo wana ezalaki Nsango ya ntango. Bomoni? Nandimaka Nsango ya ntango. Iyo. Makila etiamaki na ntango ya mpokwa.

Ntango mosusu bakokaki koloba: “Ngai, nazali Moyuda.”

¹³⁰ Lelo oyo bato balobaka: “Nazali Moklisto. Nakoki kotalisa bino ete nazali mondimi ya kala. Nalingi bolakisa ngai esika nayiba eloko moko, esika nasamba na tribinale moko. Bolakisa ngai esika nasala ekobo. Nasala naino makambo nyonso wana te, to likambo ya ndenge wana. Lakisa ngai esika moko mpamba.” Yango ezali na ntina te sikawa. Te, te. Bomoni, ata azalaki na boyokani boni, boyokani yango ezali na ntina te. Ezali na ntina te.

Bokoloba: “Ee, ngai nazali moyekoli ya Biblia.”

¹³¹ Oyo ozali etali ngai te. Libanda na boyokani yango, nkanda na Nzambe ezali likolo na yo. Bomoni? Ya solo. Yango ekangaki yo. Iyo. “Masumu na yo ekokanga yo lisusu.” Lisumu ezali nini? Kozanga kondima. Yo ondimaki Nsango te. Ondimaki Liloba te. Ondimaki litatoli ya Elembo Yango moko te, ntango Emitalisaki Yango moko kati na biso. Pe ondimaki Yango te? Ata ondimaki Yango te, Yango esengelaki kotiana.

¹³² Ntango mosusu okoloba: “Nandimi Yango. Nandimi Yango. Nandimi Ezali Solo. Nayambi Yango lokola Solo.” Nyonso wana ezali malamú, kasi ata bongo Esengeli kotiana.

¹³³ Ee, tala Moyuda oyo ateleme kuna, azali kobalola makila, ntango mwana na mpate azali kotangisa makila, azali koloba: “Oyo nde Yawe.”

¹³⁴ Pe nganganzambe moko azalaki wana, koloba: “Iyo, misie, nandimi ezali solo,” kasi na ndako na ye moko, etiamaki te. Alingi komikokanisa te na etonga wana; te misie, bilandá-landa oyo na makila na ekuke. Aboyi kotalisama wana. Ata azalaki

nganganzambe, ata ayebaki Liloba boni, ata abókolamaki malamumu, ata asala misala nini, ata akabela babola boni, ata amipesa mbeka boni!

¹³⁵ Polo alobaki: “Soki nakopesa nzoto na ngai mpo na kotumbama, lokola mbeka; soki nakopesa biloko na ngai nyonso mpo na koleisa babola; soki nazali na kondima mpo na kolongola bangomba, pe bongo na bongo; pe koloba nkóta, lokola bato pe banje; pe makambo nyonso mosusu wana,” pe alobaki, “nazali mpamba kino Elembo ekotiana. Kino Elembo oyo!” Yango likambo nazali kolobela na mpokwa oyo, bolingo. Bomoni? “Bongo, soki yango ekotiana, nazali mpamba.” Bomoni?

¹³⁶ Etali ngai te, okoki kobengana milimo mabe. Okoki kobikisa babeli na libondeli na yo ya kondima. Okoki kosala makambo nyonso oyo. Kasi soki Elembo yango ezali te, ozali na nse ya nkanda na Nzambe. Okoki kozala mondimi. Okoki kotelema na etumbelo pe koteya Nsango Malamumu. “Mingi bakoya epai na Ngai na mokolo wana, pe bakoloba: ‘Nkolo, Nkolo, nasakolaki na Nkombo na Yo te, nateyaki na Nkombo na Yo te? Nabenganaki milimo mabe na Nkombo na Yo te?’” Ezali nde ba-Methodiste, ba-Batiste, pe ba-Pantekotiste. Yesu alobaki: “Bolongwa na Ngai, bino bato na misala na lofundo. Nayebi bino soko moke te.”

¹³⁷ “Kasi ntango Nakomona Elembo, Nakoleka likolo na bino.” Ezali eloko Nzambe asengi na ntango oyo. Nsango ya ntango na mpokwa, ezali kotia Elembo.

¹³⁸ Satana aloni lolenge nyonso ya komekola, kopesana mbote ya loboko, bandanga, pe makambo nyonso ya motindo wana. Bobosana yango! Ngonga ekoki mpo na Elembo, Yango moko; komekola te, kokosa kondima te, kokitana te, nyonso wana te.

¹³⁹ Ngonga ekoki oyo Elembo Ye moko amikokanisi kati na biso, pe atalisi ete Azali Yesu yango moko, lobi, lelo, pe libela, pe Azali sembo na Liloba. Esengeli kotiana. Moto oyo alobi ete azali na Elembo, pe aboyi Liloba oyo, bongo toloba nini? Bomoni, bokoki kosala yango te. Elembo esengeli kozala wana. “Ntango Na . . . Makila ekozala elembo mpo na bino.” Sikawa Molimo Mosantu, Bomoi oyo ezalaki na Makila, ezali Elembo mpo na bino. Tokokóma na yango sima na ntango moke, bomoni. Molimo Mosantu ezali Elembo. Likambo esili. Iyo, misie. Sikawa, bomikanisela. Pe ngai . . .

¹⁴⁰ Ezali na ntina te nani yo ozali, boni ozali malamumu, mbala boni opímbwá *likoló*, mangomba boni okótá, bolamumu boni osálá, ezali na ntina moko te mpo na yo soki Elembo etiami te. Oyo ezali ntango ya mpokwa. Makambo wana etambolaki malamumu na ntango ya Luther, etambolaki malamumu na ntango ya Wesley, kasi lelo ekotambola te. Te.

¹⁴¹ Iyo, kobatela mwana na mpate ezalaki malamumu ntango wana. Baoyo bakufaki ntango wana, liboso mwana na mpate, makila

etiama, ezalaki ndenge mosusu. Iyo, misie. Bakendeki na mitema na bango malamumu. Bakosambisama soki ba—bazalaki . . .

¹⁴² Soki babongisámáká liboso, esimbaka bango. Soki bongo te, mpamba. Esili. Etali bobele Nzambe. “A—Alongisaka nani Alingi, Ayokelaka mawa nani Alingi, pe Akweisaka nani Alingi.” Azali Nzambe. Esili. “Ayokelaka mawa nani Alingi koyokela mawa, pe Akweisaka nani Alingi kokweisa.”

¹⁴³ Moyuda akokaki kotalisa polele, na kokatema ngenga, ete azali mondimi.

¹⁴⁴ Ezali na bato mingi, ba-fondamataliste, oyo bakoki kozua Biblia pe koloba: “Nazali mondimi, pe Yesu alobaki ete tobikisami ‘na nzela ya kondima.’ Pe nazali mondimi, kasi libatisi ya Molimo Mosantu ezali bolema.” Na bongo Elembo etiami te. Ata boni, ata andimi ndenge nini, ezali na ntina te.

¹⁴⁵ Ezali lokola kokatema ngenga ya Bayuda. Akoloba: “Nazali Moyuda. Mpo na nini nasengeli kokende kuna kosala lokola etonga wana ya bilanda-landa?”

¹⁴⁶ Mose azalaki kotambola na ba-balabala, pe koloba: “Nsango ya mpokwa yango oyo! Ekosalema ete, na suka ya mikolo zomi na minei, bokoyangana esika moko pe bokoboma mwana na mpate. Lisanga mobimba ya Yisalaele bakoboma yango, bakotia maboko likolo na yango, bakomikokanisa na yango. Pe makila ekopakolama likolo na makonzi ya ekuke pe likolo na ekuke, pe, ‘Ntango Nakomona makila, Nakoleka likolo na bino, mpamba te ezali elembo kotalisa ete bondimi liwa ya mwana na mpate oyo Napesaki bino.’” Makila ezalaki elembo.

¹⁴⁷ Sikawa Molimo ezali Elembo. “Bokotondisama na Molimo Mosantu sima na mikolo moke.” Pe ntango Makila esopanaki, Elembo etindamaki awa Mokolo ya Pantekote, lokola mopepe moko ya makasi.

¹⁴⁸ Yango ezalaki mamá na likambo mpo na bantoma nyonso. Ezalaki: “Bozuaki Molimo Mosantu wana endimaki bino? Bobongola mitema moko na moko, pe bobatisama na Nkombo na Yesu Klisto mpo na bolimbisi ya masumu na bino, pe bokozua likabo ya Molimo Mosantu, mpo ezali Elembo, amen, ete bosili kolongwa na kufa pe kovingela na Bomoi.” Yango mpenza. Ntango lingomba ya Mabo- . . . Bayuda ebandaki kolimwa, Bato na Mabota bazuaki esika, pe libebi ya ndenge wana; sikawa abimaki, mpo na kozua litika ya Bato na Mabota, mpo na Nkombo na Ye, Mwasi na libala.

¹⁴⁹ Bomoni nini nalingi koloba? Bomoni nini Makomi elobeli awa? Soki Elembo etalisamaki te, na bongo boyokani ezalaki na ntina te. Bomoni? Esengeli Ezala. Mpamba te, soki olobi ondimi, kasi ozali kolanda malako ya Liloba te, na bongo ondimi te. Bomoni? Ata okatama ngenga, ata okota na lingomba, pe ata obatisama, osala makambo nyonso wana; nyonso wana ezali naino Elembo te, Molimo Mosantu.

¹⁵⁰ Moto na mayele wana, ndenge nalobaki yango kala mingi te, akobaki kosolola na ngai. Alobaki: “Billy,” alobaki, “Abalayama andimaki Nzambe, pe yango etangamelaki ye mpo na boyengebene. Nini mosusu moto akoki kosala libanda na kondima?”

¹⁵¹ Nalobaki: “Ezali solo, molakisi. Ya solo. Andimaki Nzambe solo. Biblia elobi bongo. Ozali na elonga. Kino esika okomi wana, olobi solo.”

¹⁵² Na ntango nyonso ba—ba—banóngi zomi na mibale, oyo batindamaki mpo na kokende kononga mokili na Kanana, na ntango nyonso bakendeke liboso na Kanana, bazalaki kobotola mabele; kasi ntango bakómaki na ndelo, wana nde baboyaki.

¹⁵³ Nalobaki: “Bino ba-Batiste bolobaka solo, kino esika bokomi, kasi bozuaki Molimo Mosantu wana endimaki bino?” Nalobaki: “Omikanisela, Nzambe amonaki kondima ya Abalayama. A—andimaki Nzambe, pe etangamelaki ye mpo na boyengebene, ezali ya solo, kasi na sima Nzambe apesaki ye elembo ya kokatama ngenga, lokola elembo, elembo mpo na ye.” Elingi koloba te ete kokatama ngenga, na nzoto na ye, ezalaki na litomba mpo na molimo na ye, kasi ezalaki elembo kotalisa ete Ye (Nzambe) andimaki kondima na ye.

¹⁵⁴ Pe Apesi biso elembo, ya Molimo Mosantu, mpo na kotalisa ete Andimi biso lokola bandimi. Mpo ete: “Bobongola mitema, pe bobatisama moko moko na Nkombo na Yesu Klisto mpo na kolimbisama ya masumu na bino, pe bokozua likabo ya Molimo Mosantu. Mpo elaka yango ezali mpo na bino!”

¹⁵⁵ Bososoli sikawa. Bayuda, ata bakokaki kotalisa polele ete bakatamaki ngenga, kasi esengelaki na bango kotalisa elembo. Soki te, boyokani ezalaki na ntina te. Ezalaki te.

¹⁵⁶ Ezali pe bongo lelo, ndenge moko. Ata osali nini, ata okoki—okoki kolimbola Biblia ndenge nini. Okoki pe kozala moyekoli ya Biblia. Oh! la la! Okoki—okoki koloba: “Nazali mondimi, pe nyonso wana.” Ata bongo esengami kozala na Elembo. Moyekoli ya Biblia, okoloba: “Nazalaka moto malamau, Ndeko Branham.”

¹⁵⁷ “Oyo moto alobi ezali na ntina te, moto malamau koleka moto oyo azali te. Bomoi na ngai mobimba, naino namona ye kosala likambo ya mabe te.” Oyo *wana* ezali ata na ntina te epai na Nzambe. [Ndeko Branham alelisi misapi na ye—N.D.E.] Esengeli na eloko moko, pe bobele moko!

¹⁵⁸ Pe okoki kosala yango te. Okoki kopakola makila na ekuke te, elembo ekokaki kotiyama bobele soki mwana na mpate akufaki. Pe makila ezalaki elembo ya solo kotalisa ete mwana na mpate akufaki. Likambo ya kokosa te; mwana na mpate akufaki!

¹⁵⁹ Pe Molimo Mosantu ezali Elembo ya solo kotalisa ete Mwana na mpate na yo akufaki pe ozuaki Elembo mpo na yo moko, mpo

ete Bomoï na Ye moko ezali kati na yo. Bomoni? Ezali likambo ya kokosa te. Ezali maseki te. Ezali komekola te. Ezali wana! Boyebi yango. Boyebi yango. Mokili eyebi yango. Elembo ezali wana.

¹⁶⁰ Ata moto yango azalaki malamû ndenge nini. Akokaki kozala moyekoli ya Biblia. Akoki kozala... Akoki kozala mondimi malamû ya—ya lingomba moko. Akoki kozala moto malamû. Akoki kozala mo—mokonzi ya ebongiseli moko. Akoki kozala mo—moko na bokitani ya Roma. Na—nayebi te nani ye azali, yango—yango ekobongola likambo te.

¹⁶¹ Kasi, Yisalaele, moyekoli nyonso ya Biblia ayebi ete Yisalaele azalaki elilingi ya Lingomba, ndenge moko, na nzela ya mboka na elaka. Pe kuna nde Ezali kokende.

¹⁶² Kasi ntango mpokwa ekómaki, pe mobembo ebandaki, eloko esengamaki ezalaki bobele moko. Ata moto azalaki Moyuda ndenge nini, ata azaláká kobatela milona na ye malamû, ata afandaka na boyokani na bazalani na ye, ata azaláká kosala mingi, ata azaláká mondimi malamû, ata azaláká kofuta moko na zomi mingi. Makambo nyonso wana ezalaki malamû. Ezalaki na molongo. Azalaki moto malamû, ayebanaki kati na bato na ye, lokola moto malamû. Kasi kozanga elembo ya makila, alingaki kokufa.

¹⁶³ Oh, tika Nzambe asunga ngai, mpo na kososolisa yango malamû, na bato bazali awa ná baoyo bakoyoka bande!

¹⁶⁴ Ezali na ntina te, okoki koteya Nsango Malamû, okoki kobengana milimo mabe, okoki koloba minoko na sika, okoki koganga, kobina na Molimo, kasi ozangi Elembo.

Bokoloba: “Nakoki kozala bongo?”

¹⁶⁵ Polo alobaki ekoki kozala bongo na yo. “Ata nakoloba minoko na bato pe na banje, ata nakopesa biloko na ngai nyonso mpo na koleisa babola, nzoto na ngai ete etumbama lokola mbeka, ata nazali na kondima ya kolongola bangomba, pe nyonso wana, ata bongo nazali mpamba.” Botia motema na yango te. Ezali Elembo! Ata osálá makambo boni, ata ozali moto malamû ndenge nini; ntango nkanda na Nzambe ekobeta, ekoyeba bobele Elembo.

¹⁶⁶ Ezali Elembo kotalisa ete motuya oyo esengamaki efutamaki. Pe motuya oyo efutamaki ezalaki Bomoï ya Yesu Klisto, pe Apesaki Bomoï na Ye. Pe Molimo na Ye ezongi likolo na yo, lokola Elembo ete ondimami. Pe ozali na Elembo likolo na yo, butu pe moi, bobele mokolo ya lomingo te. Ezali ntango nyonso, ozali na Elembo. “Ntango Na... Makila ekozala elembo mpo na bino.”

¹⁶⁷ Bolobaka: “Nazali kokoba kondima. Nazali mondimi.” Ezali malamû. Kasi soki oboi Elembo, na bongo, okozala mondimi ndenge nini? Ezali kofunda yo. Bomoni, ezali kotelemela litatoli na yo, oyo ozali kosala.

168 Moyekoli ya Biblia, moto malamumu, mondimi ya lingomba, ozala ata nani, ezali na ntina moko te. Iyo misie. Ntango mosusu tata na yo azali motei. Ntango mosusu ma—mama na yo azalaki mosantu. Ntango. . . Yango ezali—yango ezali malamumu, bakosamba mpo na bango moko. Ndenge nalobaki, komeka. . .

169 Bato bamekaka kokómisa Nzambe mobange ya nkoko moko, ya libumu monene, bomoni, oyo azali na etonga ya bankoko mike-mike, bilenge lokola ba-Ricky ná ba-Elvis, pe, “Basalaka na bango mabe te.”

170 Nzambe te! Azali na bankoko te. Azali Tata. Esengeli na kobotama mbala mibale! Azali na ebakata ya libumu monene pe alemba te.

171 Azali Nzambe ya kosambisa. Biblia elobi Azali bongo. Nkanda na Ye ezali makasi. Bomeka kotiola Yango te pe na sima bolikia ete mokolo boboto na Nzambe ekokamata bino, na masumu na bino, mpo na komema bino na Lola. Soki Asalaki bongo, Alingaki kolimbisa nyonso oyo, pe kozua Ewa. Bosengeli kondima Liloba na Ye, to bo. . . bokokufa. Pe ntango ondimi Liloba na Ye, Elembo ekozala likolo na yo. Iyo.

172 Kufa ebelemaki mpo na kobeta Ezipito butu wana, na ntango nyonso. Ezalaki ntango moko ya nsomo; milulu na bango nyonso, mikolo na bango nyonso ya bafeti, pe mikolo ya kokila.

173 Nzambe ayaki kotala bango. Nzambe atalisaki bilembo pe bikamwa na Ye minene kati na bango. Ezali nini? Sikawa botelema miniti moke. Nzambe atalisaki bango ngolu na Ye. Apesaki bango libaku malamumu.

174 Bakokaki koboya Yango te, pe balobaki: “Oh, nyonso wana ezali mpamba. Ezali bolema. Ezali eloko moko, esalemi kuna na ba-boéta, potopoto moko ya—ya motane ezali kobima kuna, yango nde ekómisi mbu motane.” Na sima matandala eyaki. Na sima magbololo eyaki. Nzambe abongisaki esika moko, pe Atiaki Liloba na Ye na monoko ya mosakoli. Pe oyo azalaki koloba, ezalaki kosalema, pe bamonaki yango. Bakokaki koangana yango te.

175 Oyo Mose azalaki kosenga, yango nde Mose azalaki kozua, uta na Nzambe, mpo azalaki koloba bobele Liloba na Nzambe. Alobaki: “Nakokómisa yo nzambe.” Mose azalaki nzambe mpo na bango. Bomoni? Bayebaki kosala bokeseni te, na bongo Alobaki: “Yo okozala nzambe, pe Alona akozala mosakoli na yo. Bomoni, okozala lokola nzambe, mpo ete Nakozua yo, mongongo na yo, pe Nakokela na nzela na yo. Pe Nakoloba, pe bato bakoangana yango te, mpo ekozala mpenza wana. Oyo okoloba, ekosalema.” Oh! la la! Yango mpenza. “Nakolakisa makambo yango.” Oh! la la! Pe Ezipito amonaki yango. Bamonaki yango liboso na ntango ya mpokwa, to na ntango ya mpokwa mpenza.

176 Alakisaki bango bolamu na Ye. Alakisaki ete Akokaki kolongola yango, kobikisa.

177 Bato na soloka bamekaki kosala likambo yango moko, bamekoli. Bazalaka ntango nyonso. Yane pe Yambele bazalaki wana, batelemaki wana. Kasi ntango ekómaki na likambo ya solo, bazalaki na yango te. Ya solo. Balandaki na ntango moko, ntango moke. Kasi, sima na ntango moke, bolema na bango emonisamaki polele.

178 Pe Biblia elobi te ete likambo yango moko ekosalema na mikolo na suka, “lokola Yane pe Yambele batemelaki Mose”? Kasi bolema na bango emonisamaki, ekosalema pe bongo lisusu. Bomoni? Yango wana, bato na makanisi epola, bazangi bosembo na oyo etali Solo, Bosolo. Bakoki kozala na mayangani pe makambo minene, biloko ya minene koleka oyo babongisa yango kitoko, kasi suka na yango ekokóma.

179 Botelema ngwi na Elembo! Yango nde Nzambe alingi tosala. Bokangama na Liloba na Ye. Botangwa na Yango te. Botikala sembo na Yango. Biblia elobi bongo.

180 Kufa ezalaki kobeta. Nzambe atalisaki bango mawa, atalisaki nguya pe bilembo.

181 Sikawa totelemisa naino saa wana mwa moke. Tozongisa naino makanisi sima, pe tokanisa oyo Ye alakaki ekosalema na mikolo na suka. Nazali komituna soki ntango ekoki te mpo na biso komitala lokola, bomoni?

182 Asalaki makambo oyo nyonso, kasi ata bongo balingaki na bango kobongola mitema te, to kondima nsango ya mokolo te. Balingaki na bango kosala yango te, ata yango emonisamaki polele liboso na bango, pe etalisamaki polele.

183 Pe ntango bomoni makambo ya boye kosalema, ezali elembo ete kosambisama ebelemi. Kosambisama ekolanda makambo yango. Esalemaka ntango nyonso bongo, pe oyo ekozanga te. Bomoni? Kosambisama elandaka ngolu. Soki mawa eboyami, eloko mosusu etikali te bobele kosambisama. Na bongo ekolanda yango ntango nyonso.

184 Sikawa, likambo yango. Likambo nyonso ya molimo ezali elembo kouta na Nzambe. Bozala na bokebi. Botala yango malam, bomoni. Bosenzela, likambo nyonso ya molimo, nyonso oyo esalemaka, ezali elembo. Tozali awa na pwasa te. Makambo oyo esalemaka na pwasa te. Ezali elembo. Ezali elembo, mpo tokota—mpo tokota na ebombelo na lombangu. Nowa azalaki elembo mpo na ekeke na ye; Eliya azalaki elembo mpo na oyo ya ye; Yoane azalaki elembo mpo na oyo ya ye. Bomoni? Nyonso, Nsango ya ntango, ezali elembo. Bosenzela Yango, botala nini Yango ekosala. Bomoni? Ezali elembo. Nyonso ezalaka na ntina.

185 Pe Nsango ya motindo oyo ekokaki koya na eleko mosusu te. Ekokaki koya na ntango ya Luther te, ekokaki koya na ntango ya Wesley te, ekokaki pe koya te na ntango ya ba-Pantekotiste. Ekokaki kosalema te. Bomoni? Likambo. . . ya bongo esalémá te, ata bongo tolakamaki kati na Biblia. Bomoni? Tokómi na suka.

Eloko moko ekoalema te, ekokaki kosalema te kino eleko oyo. Pe ezali kosalema lokola elembo. Nazali komituna soki elembo ezali nini?

¹⁸⁶ Oh, libota moke, ndeko na ngai mobali, ndeko mwasi, kota na nse na Elembo oyo, na lombangu. Bomoni? Te, kozua eloko mosusu te. Te, te, te, kosala yango te. Bomoni? Kobanjabanja Yango kaka te. Tikala wana kino oyeba ete Elembo etiami, kino (mobimba na yo) makanisi oyo ezalaki kati na Klisto ezala kati na yo, kino bolema nyonso ya mokili esila, bomoni, kino mposa nyonso ya motema ezala Ye. Bomoni? Bongo, na ntango wana, okoyeba, bongo nde okoyeba ete likambo moko esalemi. Yesu alobaki: “Bilembo oyo ekolanda bango bakondima,” bandimi ya maloba te, kasi bandimi. Bomoni? Bongo, toboi kotatabana likolo na yango; bosengeli kosala bongo te.

¹⁸⁷ Nsango ya ntango ezali elembo mpo na mangomba. Ezali elembo mpo na bato. Te...bozali, bozali kososola yango? [Losambo balobi: “Amen.”—N.D.E.] Elika na ngai, mpo na balandi bande, ezali ndenge moko, bomoni, pe na bisika mosusu ya mokili. Bomoni, elembo ya ntango yango oyo. Elembo moko esengeli kotiyama, pe Ekokaki koya na eleko mosusu te.

¹⁸⁸ Botala makambo Nzambe alengelaki mpo na eleko wana. Sikawa, ndenge toyebi ete Biblia elobi: “Makambo nyonso wana esalemaki mpo na kopesa biso ndakisa, bomoni.” Botala, ntango Nzambe abelemaki mpo na kosambisa Ezipito, liboso Alengelaki makambo. Asalaki nini mbala ya liboso? Abongolaka lolenge na Ye ya kosala te.

¹⁸⁹ Mbala ya liboso, ntango Asalaki yango, ntango Alengelaki makambo na Ye, Atindaki mosakoli moko ná nsango. Likambo ya liboso Asalaki mpo na bato na Ye, ezalaki kotinda mosakoli moko ná nsango.

¹⁹⁰ Likambo ya mibale Asalaki, mpo na kotalisa mosakoli yango, Atindaki Likonzi na Móto lokola etaliseli, mpo na kotalisa yango.

¹⁹¹ Pe eloko ya misato Atindaki ezalaki elembo. Ezali mpenza solo. Elembo, elembo yango ezalaki kotalisa nini? Ndanga!

¹⁹² Liboso, mosakoli na Ye ná nsango; Amitalisaki Ye moko kati na... na nzela na—na nzela ya Likonzi na Móto ná mosakoli na Ye; na sima Atindaki elembo, mpo bamitua na nse ya makila yango, kotalisa ete Andimaki kufa ya eloko mosusu esika na yo. Na bongo, makila ezalaki elembo Azalaki kotala, kotalisa ete oyokaki nsango, ondimeleki Likonzi na Móto, pe ondimeleki kufa ya eloko mosusu oyo Ye apesaki mpo na yo, pe ozalaki na nse ya makila mpenza ya bomoi oyo esopanaki mpo na yo. Oh! la la! Kobonga wana, ezali mpenza kobonga be, bomoni, ozali na nse ya makila.

¹⁹³ Sikawa bozali na nse ya Molimo, na nse ya Molimo Mosantu. Bomoni? Bomoni? Bondimi Nsango ya ntango, bomoni,

bondimeli ngu—ngu—ngu—ngu—nguya, li—li—Likonzi na Móto. Bondimi yango, bomoni, pe bosaleli.

¹⁹⁴ Bongo, sikawa botala, kondima bobele Yango ekoki te. Ezali te ko—ko . . . Kotambola zongazonga na esika Yango ezali, ekoki te. Bomoni, yango ezali komibebisa koleka: “Mpo ete ye oyo ayebi kosala malamumu, nde akosala boye te, ezali lisumu mpo na ye.” Bomoni, bazali bandimi ya ndelo, Yesu alobelaki likambo yango moko.

¹⁹⁵ Baebele, mokapo ya 6: “Mpamba te mpo na bango basili kongengelama moi pe kosangana na Molimo Mosantu, pe bayoki elengi ya Liloba na Nzambe, pe ya ekeke ekoya, soko na sima basili kopengwa, nzela na bango ya kobongola lisusu mitema ezali te, bazali kobakisa Mwana na Nzambe na ekulusu bango mpenza; pe bazali kotuka boyokani ya Makila, oyo babulisamaki na nzela na yango . . .” Makila wana mpenza ebulisaka. Ezali Elembo te. Lelo, Makila ezali Elembo te. Bomoi ezali Elembo.

¹⁹⁶ Bomoi ekokaki kozala wana te, mpo ezalaki nyama. Makila yango mpenza ezalaki elembo, esengelaki kopakola makila yango mpenza na ekuke. Kasi lelo ezali Molimo Mosantu. Tokokóma wana, sima na ntango moke, mpo na kotalisa yango polele, bomoni. Bomoi nde ezali Elembo.

¹⁹⁷ Bomoi na yo esili, pe okufi, pe bomoi na yo ekufi. Obombami kati na Nzambe, na nzela ya Klisto, pe okangami na elembo kuna na nzela ya Molimo Mosantu. Makanisi oyo ezalaki kati na Klisto ezali kati na yo. Pe Klisto, ná Biblia, ná Liloba, bazali eloko moko. “Na ebandeli Liloba azalaki, pe Liloba azalaki mboka na Nzambe, Liloba azalaki pe Nzambe.” Na bongo yo, ná Liloba, ná Nzambe, ná Klisto, bokómi eloko moko. “Soko bokoumela kati na Ngai, pe Liloba na Ngai ekoumela kati na bino, bosenga likambo nini bolingi pe ekosalemela bino.” Bomoni?

¹⁹⁸ Atiaki nguya na bibebu ya Mose, mpo ákende kuna ná Liloba na Ye pe áloba, pe magbololo eyaki; alobaki, magbololo ekendeke; alobaki, nsili eyaki; alobaki bomoi—nsili ekendeke. Amen!

¹⁹⁹ Kasi na sima elembo esengamaki mpo na Yisalaele mobimba. Elembo esengamaki mpo na Yisalaele mobimba. “Ntango Nakomona elembo, Nakoleka likolo na bino.” Oh! la la! la lá! Oyo nde ndanga!

²⁰⁰ Kobima ya Yisalaele na Ezipito, ezalaki elilingi, na bosolo lelo. Ezipito ezalaki lingomba, pe Yisalaele ezalaki kotalisa Mwasi na libala. Pe lokola Yisalaele abimaki na Ezipito, Mwasi na libala pe abimi na lingomba. Bomoni? Mpamba te, esengeli na eloko moko, mpo Ye abima na yango, pe Asengeli kobima, mpo, soki ezalaki elilingi. Li—lingomba ezali kuna na Ezipito, kati na mokili pe kati na masumu, pe ezali kotala li—li—likambo ya Elembo na bino wana te. Bandimaka ata Yango te. Kasi Yisalaele balingaki yango, mpo ezali lobiko mpo na bango. Oh!

Oh! Esengelaki kopesa biso esengo, esengelaki kopesa mitema na biso. . . Oh!

²⁰¹ Lingomba, botia Yango! Bozanga kosala yango te. Bokosepela bongo te? Te, te, botika moi elala te. Te, te, te, bopema te, moi to butu. Bokwela likama mabe te. Ekotambola te, bana. Ekotambola te. Bosengeli kozala na Elembo!

²⁰² Olobi: “Nandimi. Iyo, nakei. Ngai, iyo, nandimi Nsango oyo. Ngai. . .” Ezali malamumu mingi, kasi, ezali—ezali malamumu.

²⁰³ Kasi bosengeli kozala na Elembo! Branham Tabernacle, bozali koyoka? Bosengeli kozala na Elembo oyo ekotalisama polele! Kozanga Yango, kondima na bino nyonso ezali mpamba. Bomoni? Bokobika bomoi malamumu; boyokaka oyo Liloba elobi; bokendeke na losambo; bomekaka kobika sembo; ezali malamumu, kasi ezali Yango te. “Ntango Nakomona makila,” yango nde Elembo. Pe Elembo oyo ezali te. . .

²⁰⁴ Mpamba te, oyo, Ye—Ye asengeleki mpenza komona makila mpenza, mpo ete bomoi elongwaki, ye. . . ebimaki na yango, ezalaki nyama.

²⁰⁵ Kasi awa Ezali Bomoi na Ye moko oyo ezalaki kati na Makila. Pe makila yango mpenza ezalaki bobele etaliseli to elembo ya kobulisama, kasi Bomoi Yango moko ezali Elembo; mpo ete kozanga kokatama ngenga, kozanga Elembo, ozali na yo kati na boyokani te. Nyonso wana etambolaka elongo. Soki olobi okatémá ngenga na Liloba, pe bobele Yango, na bongo okondima Liloba; soki ondimi Liloba, na bongo Elembo esengeli koya, mpo alobaki: “Bobongola mitema, pe bobatisama moko moko na Nkombo na Yesu Klisto mpo na kolimbisama na masumu na bino, pe bokozua likabo ya Molimo Mosantu.” Yango nde. Oh! la la!

²⁰⁶ Na bongo botala kolengelama mpo na bato na Ye ya mboka na elaka. Botala nini Asalaki. Liboso, Azalaki na libota oyo Abongiselaki bango mboka moko. Alengelaki mboka moko mpo na bango. Na sima Atindaki oyo esengelaki kobongisa bango, mpo na bato ya mboka na elaka. Ezalaki bobele mpo na baoyo babongisámáká liboso mpo na mboka ya elaka, mokolo ya Mwasi na libala. Pe Asalaki yango ndenge nini, Atindaki mosakoli ná nsango, atalisaki yango na Likonzi na Mító, pe apesaki elembo mpo bakoka kozala na ndanga ete ezalaki sembo. Ya solo. Ezalaki kobondisama na bango.

²⁰⁷ Yisalaele, oyo ebimaki na Ezipito na ntango wana, ezalaki e—elilingi. Oyo nde bosolo, Lingomba kobima na bibongiseli. Bongo, bango nyonso bibongiseli te. Nalingi koloba Mwasi na libala. Bomoni? Bamosusu, bato mosusu kati na baoyo bazali nsomi, bazali mpenza mabe lokola bato na bibongiseli, ntango mosusu mabe koleka.

²⁰⁸ Nazali koloba na ntina na Elembo oyo etiami. Elembo eyokanaka na Liloba moko na moko. Bomoni? Esengeli kozala

bongo, mpo Ezali Liloba. Ezali Bomoi oyo ezalaki kati na Liloba. “Maloba na Ngai ezali ya Molimo; Ezali Bomoi,” elobaki Yesu. Bomoni?

²⁰⁹ Ntango Mose abandaki mosala na Ye na Yisalaele, ná bilembo minene oyo bomoni, Yisalaele basanganaki uta na Ezipito mobimba, bayaki nokinoki na Gosene, bazalaki kozonga na esika na bango, mpo bayebaki likambo moko elingaki kosalema. Oh, oyo nde elilingi!

Oh, bauti na Esti pe na Westi,
 Bauti na bamboka mosika, (ya solo, bosila
 koyoka nzembo yango)
 Kosepela elongo na Mokonzi, kolia na mesa na
 Ye,
 Boni baleki nzela oyo bapámbólámí!
 Bazali kotala elongi na Ye ya bulee
 Kongenga na bolingo na Nzambe;
 Bapámbolami oyo basangani na ngolu na Ye,
 Lokola mabanga ya motuya mpo na kongenga
 na motóle na Ye.

Oh, Yesu akozonga nsima na ntango moke,
 Na bongo mpasi na biso ekosila.
 Oh, soki Nkolo na biso ayei sikawa
 Mpo na baoyo bazangi masumu?
 Oh, bongo ekopesa yo esengo,
 To mawa pe kozanga monene ya elikia?
 Ntango Nkolo na biso akoya na nkembo,
 Tokokutana na Ye kuna na mipepe.

²¹⁰ Kotalisa Elembo! “Pe Nakosekwisa ye na mikolo na suka.”
 Ya solo! Tokómi na mikolo yango.

²¹¹ Bato basanganaki na Gosene. Babelemaki. Bayebaki ete likambo moko elingaki kosalema. Bazalaki lokola . . .

²¹² Kamata ndakisa ya mabata, soki ntango na bango ya mobembo ekoki, bango nyonso basanganaka nokinoki. Ntango nzoi, pe nyonso mosusu, bamilengelaka, ezali na eloko moko ebendaka bango.

Molimo Mosantu abendaka bato!

²¹³ Oh, ntango ngonga ekokaki mpo nkanda monene na Nzambe ékita, moko moko . . . Mabata mibale eyaki, mwasi ná mobali. Mabata ya mai mibale eyaki, mwasi ná mobali; mpunda mibale eyaki, mwasi na mobali; eloko moko ezalaki kobenda bango, baoyo babongisamaki liboso. Bamosusu bakufaki. Oh! Bamosusu na bango bakufaki! Kasi baoyo bayokaki kobendama wana mpo na kokota, bayebaki ete masuwa elengelamaki. Ezalaki elembo ete mbula ezali koya. Bayebaki ete mbula ezali koya, ezalaki na ntina te oyo bazalaki komona pe nini bato mosusu bazalaki kokanisa. Bango bayebaki.

214 Eloko moko ezalaki kati na bango, koloba: “Kota na kati, nokinoki! Kota na kati, mpo yango nde esika bobele moko ya kobatelama.” Mpamba te, Nzambe alengelaki mosakoli moko, Atindaki masuwa lokola elembo, alobaki: “Bokota na kati,” pe mbula ezalaki koya. Pe bakotaki na kati, mibale na mibale. Nyama nyonso ekotaki, mibale na mibale, kati na masuwa, mpo bakotaki na nse na yango. Ezali na ntina te oyo bamosusu. . .

215 Pe baoyo nyonso bazalaki libanda ya masuwa bakufaki. Baoyo nyonso bazalaki libanda ya elembo, ya makila, bakufaki, bango nyonso. Pe baoyo nyonso bakozala libanda ya Elembo, ya Molimo Mosantu, bakokufa.

216 Ata bazali bato malamau, ata bazali bandimi ya lingomba! Bazalaki ebele na ntango ya Nowa. Bazalaki ebele na ntango ya Mose; kasi moto oyo azangaki kopakola makila, lokola elembo, akufaki. Baoyo bazangaki kokota na masuwa, bakufaki. Baoyo bakozanga kokota kati na Klisto, mpo Ye azali Masuwa!

217 Bakolinti ya Liboso 12, elobi: “Biso nyonso tobatisami na Nzoto moko kati na Molimo moko.” Oyo emonanaka te, lingomba te; kasi oyo emonanaka te, bibongiseli te; Nzoto oyo emonanaka te ya Yesu Klisto! “Kati na Molimo moko,” M-o-l-i-m-o, Molimo, “biso nyonso tobatisami kati na Nzoto moko oyo.” Na bongo Elembo ezali na ekuke, mpo ozali kati na Klisto. Pe ezalaki nde Ye, Mbeka na bino, Oyo amemaki kosambisama. Pe ntango Nzambe atali yango, Akoki kosala eloko moko te. Obatelami mpenza na ndenge ekoki, mpo ete Nzambe ná Klisto bazali bobele Moto moko, Molimo akómaki mosuni pe Afandaki kati na biso. Pe tala Nzambe elongo na Ye moko, pe bino, bana na Ye Moko, kati na Nzoto. Yango nde, makila mpenza te, kasi Molimo! “Nakoleka likolo na bino.”

218 Bautaki na Ezipito mobimba, mpo na kosangana na esika moko wana, mpo bakoka kozala na nse na elembo yango.

219 Pe bauti na ba-Methodiste, ba-Batiste, ba-Presbiterien, ba-Lutherien, ba-Pantekotiste, pe mangomba mosusu, mpo na kokota na nse ya Elembo. Ezali mpenza ndenge ezaláká ntango wana!

220 Likonzi na Móto nde etalisamáká kuna. Pe moto moko ayebisaki moto mosusu, moto yango ayebisaki moto mosusu, moto yango ayebisi moto mosusu, pe, na mbala moko, boyebi, bango nyonso babandaki koya. Babandaki koya, pe batalaki na bokebi elembo na Nzambe. Balobaki: “Kosambisama ebelemi.”

221 Bongo mosakoli alobaki: “Nzambe asololi na ngai. Elembo moko ekozala. Bokopakola makila na ekuke. Bokoboma mwana na mpate, bokopakola makila na ekuke, pe yango ekozala elembo, mpo kufa ebelemi mpo na kobeta.”

222 Botika nayevisa bino lelo oyo, lokola mosali na Ye, soki Elembo ezali likolo na ekuke te, kufa ya molimo ekobeta. Pe mangomba nyonso ezali kozonga na—na lisanga, Lisanga

ya Mangomba ya Mokili. Bango nyonso bazali kozonga na Bokatoliko. Pe bobele baoyo babotami mbala na mibale na lolenge ya solosolo, nde bakotikala libanda!

²²³ Bomikanisela, bibongiseli na bino ya ba-Pantekotiste te, mpo bamikotisa kati na yango. Elakisi ete bakufi! Babebi. Bamíkabá. Bazonga sima. Babimisa Ye libanda na ekuke, kasi Ye azali koluka Elembo. Mpamba te, eloko bobele moko batielaki motema, ezali minoko na sika.

²²⁴ Botiaka motema na minoko na sika moko te, ata eloko mosusu te. Kasi botika Elembo Yango moko ezala wana, Bomoto ya Yesu Klisto, Bomoï na Ye moko kati na yo. Bokatema ngenga bobele *oyo*, to *oyo kuna* te; kasi bokata bomoto na bino nyonso ngenga, kino yo ná Klisto bokóma Moko. Klisto kati na yo, pe Bomoï na Ye ezala komonisama na nzela na yo.

²²⁵ Bongo, sikawa, uta na Ezipito nyonso! Pe botala sikawa, ezali biso komona oyo basalaki, wana tozali komona ndenge ntango ezali komonana, totindami kosala ndenge moko. Boyebaki yango? Botala malamû oyo mosakoli alobaki.

²²⁶ Pe tolingi kotanga sikawa, soki bolingi kotanga, na Baebele mokapo ya 10. Pe soki bolingi kotanga elongo na ngai, nalingi kotanga molongo moko to mibale sikawa liboso tokoba. Baebele mokapo ya 10, pe tobanda na molongo ya 26 ya mokapo ya 10 ya Baebele. Te, ngai . . . Totala. Iyo. Iyo, misie! Baebele, mokapo ya 10, pe molongo ya 26, bomoni.

Mpamba te soko tokosalaka masumu na nko nsima na kozua . . .

²²⁷ Totala, nazui yango malamû? Iyo. Ezali yango. Iyo.

. . . soko tokosalaka masumu na nko nsima na . . . biso kozua boyebi na solo, mbeka mpo na lisumu ezali lisusu te.

Etikali bobele kokatela esambiseli na nsomo pe móto na nkanda oyo ekozíkisa motelemeli.

Botala oyo! Moto oyo apengwi mibeko na Mose akokufa na kozanga mawa mpo na litatoli na batatoli mibale to misato.

. . . Bokanisi nini? Soko moto anyateli Mwana na Nzambe na nse na makolo na ye, atioli Boyokani ya makila na mbindo oyo abulisami na yango, pe . . . atioli Molimo na ngolu oyo euti na Makila, ye akokwea na etumbu eleki makasi mingi te?

²²⁸ Motei, mondimi, moto malamû, moto ya bizaleli malamû, ózala nani, pe oyebi Nzambe akangólá yo na makaya. Basi, boyebi Akangólá bino na bakupe, pe—pe kokata suki, pe nyonso wana. Boyebi ete Ye asala yango. Kasi na sima soki bobongwani, botioli pe botangi Makila wana ya boyokani, Lokola, “eloko na mbindo,” Eloko oyo ebulisi bino pe ekómisi bino mosika!

229 Lokola banóngi, soki bakómaki kino na ndelo ya mboka, pe batalaki na ngambo, pe balobaki: “Ee, nayebi ezali wana, kasi kokoso eleki monene. Tozali lokola makélélé,” bakufaki na lisobe. Bandimi ya ndelo ya mboka!

230 Kosuka bebele *awa* te, kolobaka: “Nandimi Nsango oyo.” Tosa nde motindami. Kota kati na Klisto! Olobaka: “Ee, nandimaka Liloba moko moko elobamaka, Ndeko Branham.” Ezali malamamu, kasi wana ezali kaka—wana ezali kaka koyeba kotanga.

231 Kamata Nsango, kotisa Yango na motema na yo, osengeli kozua Elembo, Bomoi moko oyo ezalaki kati na Klisto ézala kati na yo. “Ntango Nakomona Yango, Nakoleka likolo na bino.”

232 Wana tozali komona lelo bilembo minene ya ntango na suka na mokili, toyebi ezali solo. Sikawa botala, nazelaki likambo oyo, Liteya oyo mpo na bino, ntango molai, molai mpenza. Bomoni? Pe bosili komoni bilembo ya ntango na suka. Nateyaki bino Yango, pe natalisaki bino Yango, na nyonso Klisto alobaki. Ezali bongo? [Losambo balobi: “Amen.”—N.D.E.] Bondimi yango? [“Amen.”] Tokómi na ntango ya suka. Namoni eloko mosusu etikali te.

233 Bokoloba: “Olobi nini mpo na elembo na nyama?” Baoyo baboi Molimo Mosantu basili kozua elembo na nyama. Etumbu ekoya sima. Bomoni?

234 Na Yisalaele, soki kelelo eyuli na mobu na Yubilé, moto nyonso. . . Bomoni Klisto, ntango atangaki yango? Atangaki yango ndambo na yango, mpo bebele ndambo yango nde ezalaki mpo na ntango wana. Bomoni? “Atindaki Ngai kobongisa batutami na motema, kosakola ekangweli epai na bakangami, pe bongo na bongo, bomoni,” kasi, Ye, “pe mbula na ngolu na Nkolo.” Oyo etikali, Atangaki—Atangaki yango soko moke te; Akitisaki Mokanda, mpamba te yango ezalaki mpo na ntango oyo. Bomoni? Atangaki bebele eteni na yango, eteni ya ntango na Ye.

235 Sikawa botala nini Akosala lelo. Yango nde Azali kolobela lingomba lelo, na nzela ya Molimo na Ye epakolami. Sikawa nde ngonga yango. Sikawa nde ntango yango. Bino, boyamba yango. Boyamba Yango!

236 Ezali nini! Tozali komona bantango minene ya suka, minda mitane ezali kopela, bipai nyonso. Likolo na bikelamu, tozali komona bikelamu kopelisa mwinda, “Ntango ekómi pene.” Tozali komona yango likolo na lingomba, kopelisa mwinda. Ekweisami. “Ntango ekómi pene.” Ezali kati na mokili. Tozali komona yango na—na likolo, na mbu, na bikólo, bisika nyonso; na moi, na sanza, na minzoto. Bilembo!

237 Tomoni bilembo ya ntango na suka, ya Molimo Mosantu, kozonga likolo na bato. Lokola ezalaki na mikolo na Lota, ndenge Molimo Mosantu asalaki na nzela ya nzoto ya moto

kuna, ezalaki Nzambe amimonisaki na nzoto. Lolenge Nzambe Akomikomisa moto, Ye moko kati na Mwasi na Libala na Ye na ntango wana, pe Akotalisa elemba moko wana, Yesu alobaki ekozala ndenge moko na ntango ya suka. Tomoni yango. Tomoni Likonzi na Mító yango moko. Ata bato na sciences bakangaki Yango bafotó, pe bongo na bongo. Tomoni bilemba ya ntango na suka kobelema. Toyebi ezali awa.

²³⁸ Na bongo, komona makambo oyo, soki bondimi ngai! Soki bondimi ngai te; bondima bilemba, bondima Liloba, mpo yango ezali kotatola makambo nazali kolobela bino. Soki nalobeli bino Solo te, makambo yango ekokaki kotatola yango te. Nzambe akotatola lokuta ata moke te. Nzambe atalolaka nde Solo. Pe Maloba oyo ezali kotatola ete nalobeli bino Solo. Yango nde ezali kotatola Nsango oyo nazali koteya. Ezali te bobele makambo Mwanje alobaki kuna na ebale mokolo wana, ete “Nsango na yo ekolengela Boyei na Klisto ya mibale,” kasi misala yango moko! Soki bokoki kondima te ete Mwanje wana alobaki Solo; bondima misala, mpo Biblia elobaki ete makambo oyo ekosalema na ntango na suka. Yango nde ezali kotatola. Yango nde ezali koloba makasi koleka maloba na ngai to ya moto mosusu. Ezali Liloba na Ye. Ezali kotatola na ntina na ntango.

²³⁹ Pe tozali komona bilemba minene pe ya nsomo ya suka, likolo na bato, pe bilemba ya ntango, na mokili, kobanga kati na bikólo.

²⁴⁰ Tomoni Yisalaele kozonga na ekólo na ye. Bendele na ye, ya monzoto motoba, ezali kopepa, Monzoto ya Dawidi, bendele ya kala koleka na mokili, dalapó ya kala koleka na mokili. Bazali ekólo. Bazali na bakonzi ya ekólo. Bazali na bato na bango moko. Bazali kati na lisanga ya bikólo. Bango, bazali, bazali nyonso wana. Bazali kati na O.N.U. Pe bazali na misolo na bango moko, nyonso. Yesu alobaki; “Libota oyo ekoleka te kino makambo nyonso ekokisama.” Pe, bomikanisela, butu yango moko oyo Yisalaele akómaki ekólo, butu yango nde Mwanje na Nkolo abimelaki ngai kuna. Ya solo. Tala epai banso tokómi.

²⁴¹ Makambo nyonso etalisami polele ete ezali mpenza Solo. Nakosi bino te. Nalobeli bino Solo, pe Nzambe ataloli ete nalobeli bino Solo. Sikawa, bomikanisela, nazali ndeko na bino. Nazali moto, bomoni. Nazali bobele moto lokola bino nyonso, kasi esengeli moto moko ateya Yango, esengeli moto moko aloba Yango. Ezali kopona na ngai te; ezali kopona na Ye. Pe ngai nalobeli bino Solo, pe Ye ataloli mbala moko ete Ezali Solo. [Losambo balobi: “Amen.”—N.D.E.]

²⁴² Ntango tozali komona makambo oyo na mokili lelo, oh, baninga, oyo ezali ngonga ya suka. Botia Elembo yango likolo na bino, na lombangu nyonso; to, bokota kati na Elembo, bokota kati na Elembo. Wana tozali komona elemba monene ya suka, pe ntango ebelemi, ezali kokebisa biso: “Ntango ebelemi.”

243 Oh, bozua yango na eyongi! Tosengeli kolingana kati na biso. Oh! la la! Tosengeli kotonda na bolingo! Bolobanaka mabe kati na bino soko moke te. Soko moto moko asali libunga, bondela mpo na ye mbala moko. Likambo oyo etali biso nyonso, na Nzambe. Tozali bandeko mibali pe basi. Oh, bobika bomoi ya bulee. Bobika, bobika lokola bana basi ya Nzambe, bobika lokola bana mibali ya Nzambe. Bobika na bopolo, na bolamu, na komikitisa.

244 Kotika mabe kokota na mabanzo na yo te, na makanisi na yo. Bengana yango mbala moko. Soki ebeti na ekuke, bengana yango. Loba, lakisa bobele Elembo na yo, koba kokende liboso: “Nazali na nse ya Makila!”

245 Bomikanisela, mingi na bato yango bayaki epai na basi wana na butu yango, koloba: “Hé, Gertie, Lillie, bilenge basi, bobima naino, tozali na feti na mpokwa oyo.”

246 “Te-te! Ngai nazali na nse ya makila. Nazali na nse ya elembo, nakotikala awa. Bolingo na ngai ezali mpo na Mokeli na ngai. Kufa ezali na mboka na mpokwa oyo.”

247 Pe kufa ezali na mboka lelo. Kosambisama ebelemi, eteleme likolo na biso. Ba-bombe atomike pe hydrogene, pe malozi ndenge na ndenge, ebelemi mpo na bikólo.

248 Pe Nzambe azali kotambwisa Lingomba na Ye, pe Alakisi yango nyonso. Tobatelaki Mwana na mpate ntango molai, kotalela, kotala makambo Azali kosala, kotalela bikelamu na Ye pe nyonso, kasi sikawa esengeli Elembo etياما. Esengeli etياما. Ezali bobele yango. “Soko moto akobotama na Molimo, pe na mai te, akokota ata moke te.” Pe bosengeli kolingana kati na bino. Bandimi basengeli kokabwana na mokili. Sikawa bozua yango na liseki te.

249 Sikawa, bino baoyo bozali koyoka Liteya oyo, na bande, bino basi, bino mibali, boyoka miniti moke. Soki bondimelaka ngai, bondima Yango sikawa.

250 Ntango ekoki mpo na kotika kowelana. Bondimela Nsango ya Biblia! Bondimela Yesu Klisto! Pe bolingana, bopesana lokumu, bomemisana. Mibali bomemia basi na bino. Bomemia mabota na bino. Bosangisa mabota na bino, mpo ete, bomikanisela, Mwana na mpate yango azalaki mpo na libota, bobele mpo na moto moko te; esengelaki bamema yango pe mpo na libota mobimba. Esengelaki bamema yango nyonso na kati. Tosengeli kolingana kati na biso. Pe bandimi basengeli kokabwana na mokili.

251 Botala, basanganaki te bobele mpo na kosolola na ntina na nsango. Basanganaki mpo na kopakola makila, mpo na kopakola elembo.

252 Yango nde bosengeli kosala. Mokengeli Neville, pe losambo oyo, bayangeli misolo, basungi, bino bandeko, ntango ekoki mpo

na kotia bolema nyonso ya mokili pembeni, ezali ntango ya kotia makambo mosusu nyonso pembeni. Tosili komona makambo mingi mpenza pe tondimi ezali mpenza solo. Sikawa Elembo esengeli kotياما. Kozanga Yango, bokokufa solo, bosengeli kokufa, ezali bobele yango.

²⁵³ Oh, bosanganaka te mpo na koloba: “Nandimaka Yango.” Yaka na nse na Yango, kota kati na Yango! [Makelele ya radio eyokani awa.—N.D.E.] Ekosalema ndenge nini? “Na nzela ya Molimo moko tobatisami na Nzoto na Yesu Klisto.” Bino nyonso, bondima na motema mobimba. Bomoni? Azalaki na mokumba te ya moto oyo azalaki libanda na Yango.

²⁵⁴ Nani azalaki koloba? [Moto moko alobi: “Ezalaki radio ya ba-onde ya mikuse, Ndeko Branham.”—N.D.E.] Ba-onde ya mikuse euti likolo? [“Elekaki na ba-baffles.”] Na ba-baffles. Bakotisaki yango? Nayokaki mongongo ya moto. [“Ndeko Branham, nakanisi ezalaki ba-onde ya mikuse eutaki na sima.”] Ba-onde ya mikuse, iyo. Oh, ba—basangisi yango na telefóné. Nakanisi bazali kozua... Oh, na mituka? Bolimbisa ngai. Nayebi moto moko alobaki likambo. Pe nakanisaki moto moko alingaki kolobela ngai likambo, oyo asosolaki te, bomoni, pe yango wana na—nalobaki bongo. Namonaki bino kotala-tala. Nayokaki mongongo moko. Nakanisaki moto moko atelemaki mpo na koloba likambo, pe nayebaki likambo yango te. Bongo, sikawa, melesi.

Kasi, bondima, bomitia na nse ya Yango!

²⁵⁵ Yisalaele basanganaki te mpo na koloba: “Biso nyonso tokende na Gosene lelo. Tokotambola kino na Gosene. Bino bomata na bakamela na bino, bongo biso tokomata na makalo ya ngombe. Tokomema libota Jones, oyo, pe bongo na bongo, ná—ná libota Goldberg, pe biso nyonso tokokende na—na Gosene. Pe boyebi? Mose akoloba lelo.” Ezalaki bongo te. Te, misie, ndeko! Ezalaki nde, bomitia na nse ya makila! Iyo, yango wana.

Ezali te kosolola na ntina na Yango; kokota kati na Yango!

²⁵⁶ Moko na bango alobaki: “Oyebi, M. Goldberg, nayebi mpenza ete ezali Solo.”

²⁵⁷ “Iyo, ndeko, nandimi ete ezali Solo. Nayebi ete ezali Solo.”

“Mr. Lavinski, yo okanisi nini mpo na yango?”

²⁵⁸ “Ezali mpenza Solo! Namonaki nguya na Yawe Nzambe kotatola yango. Namonaki magbololo kobima na mokili wana. Nayebi ete esalemaki te kino ye alobaki yango, pe nayebi ete oyo wana ezali Yawe Nzambe.” Bongo, nyonso ezali malamú.

“Okatema ngenga?”

“Iyo, misie!”

“Ozali mondimi?”

“Iyo, misie.”

259 Na sima ntango ayokaki Mokengeli Mose koloba, mokolo wana, alobaki: “Kasi esengeli bomitia na nse ya makila, mpo Nzambe alobi: ‘Makila ezali elembo.’ Ezali elembo! Ata ozali kondima ndenge nini, ata okatami ngenga ndenge nini; yango ezali boyokani Nzambe apesaki na Abalayama, pe bongo na bongo, ezali boyokani. Kasi bosengeli komitia na nse ya makila, yango nde elembo, mpo Ye alobi: ‘Ntango Nakomona makila, Nakoleka.’ Mo-Yisalaele to te!”

260 Kozala moto na ebongiseli to moto na ebongiseli te, moko to mosusu, bosengeli komitia na nse ya Makila. Metodiste, Batiste, Presbyterien, Pantekotiste, to kozanga ebongiseli, ozala nani, ezali mpo na moto na moto. Osengeli koya na nse ya Makila. Sikawa bolobela Yango kaka te; boyamba Yango! Boyoka ngai! Boyoka ngai! Na Nkombo na Nkolo, boyoka ngai! Bomoni? Esengeli komitia na nse ya Makila!

261 Azalaki na mokumba te na moto nyonso oyo azalaki na nse ya makila te. Nzambe alobaki yango polele ete bato nyonso bakozala na nse ya makila te bakokufa.

262 Nakoki kosalela Maloba na Ye? Bato nyonso bazali libanda na Klisto bakokufa. Bakotaka kati na Klisto ndenge nini? Bakolinti ya Liboso 12: “Na Molimo moko!”

263 Ezali te “na mbote ya loboko, na kalati ya mondimi, na ebongiseli.” Yango nde bazali komeka kosala yango. Bakoki kosala yango.

264 “Kasi na nzela ya Molimo moko, biso nyonso tobatisami na Nzoto moko.” “Soko mwanje na Likolo atei likambo mosusu,” Polo alobaki, “tika alakelama mabe.” Yango nde Nsango, bokota kati na Klisto!

265 Botala, bato nyonso bazalaki libanda na elembo, ezalaki mokumba na Nzambe te. Ezali pe mokumba na Nzambe te mpo na moto nyonso, monene to moke, ayebana to ayebana te, mozui to mobola, moómbo to nsomi, mobali to mwasi; ezali mokumba na Ye te mpo na moto oyo azali na nse ya boyokani ya Elembo te. Ezali mokumba na Ye te.

266 Bokoloba: “Kasi, E Nkolo, nasalaki *boye*. Nabenganaki milimo mabe. Nkolo, nasalaki *boye*. Na—nateyaki Nsango Malamu.”

267 “Bolongwa na Ngai, bino bato na misala na lofundo. Nayebi bino soko moke te.” Akotala bobele Elembo.

268 Boyoki Yango? Boloba: “Amen.” [Losambo balobi: “Amen.”—N.D.E.] Na bongo, sikawa mokumba ezali likolo na bino. Ye . . .

269 Mokolo wana, nazalaki na zamba, pe bandeko bazalaki komituna, balobaki: “Mikolo mibale yango oyo, ozui naino te. . .” Nabetaki naino eséndé moko te. Balobaki: “Likambo nini?” Bomoni, ezalaki nde yango. Bomoni?

270 Alobaki: “Tia yango likolo na bango, likolo na bango.” Alobaki: “Olobelaki—olobelaki Ngai likambo yango.” Bomoni? Ekómi sikawa na maboko na bino. Ekómi na maboko na bino.

271 Akotala eloko mosusu te, bobele Boyokani yango, ya Molimo Mosantu. Pe okoki koyamba Boyokani yango te, bobele soki obikisami, óbulisami, pe na sima óbatisfami kati na Nzoto. Akosala yango te.

272 Okoki kozala na komekola, okoki komiyoka malamumu, kopimbwa *boye*, koloba minoko na sika, pe kobina kati na Molimo. Oyo wana etali Yango te. Boyoka Yango, na Nkombo na Nkolo! Nzambe akotala yango te. Bapagano basalaka yango. Bandoki basalaka yango.

273 Bokoloba: “Nazali moto ya mayele. Nasalaka *boye na boye*, to *boye*.” Mayele na yo mingi etali Ye te. Zabolo pe azali na yango, bomoni.

274 Akotala bobele e—Elembo. Yango nde Nsango ya ngonga! Yango nde Nsango ya mikolo oyo! Yango nde Nsango na tango oyo! Na Nkombo na Yesu Klisto, boyamba Yango!

275 Eloko mo-. . . mosusu te, eloko moko, zabolo akoki kotia likolo na yo; ndakisa bolingo ya lokuta, ekosala ete mobali álinga mwasi mosusu libanda ya mwasi na ye, to mwasi álinga mobali mosusu libanda, to likambo moko ya ndenge wana, likambo moko ya nsoni. Oyo wana ezali bolingo ya solo te. Oyo wana ezali zabolo. Ezali misala na ye. Ezali eloko alingi kopesa yo, na esika na; esengo moko, mpo na komela masanga mpo ósepela na yango, pe óloba: “Nazali komiyoka mawa; nakokende kosomba litele ya lotoko, mpo nabosana makambo.” Ezali nde kufa.

276 Nzambe azali esengo na bino. Nzambe azali makasi na bino. Koyeba Nsango oyo, koyeba Solo, yango nde ekoki mpo na biso lelo. Azali makoki na ngai nyonso. Kati na Ye, nyonso nasengeli na yango ezali kati na Ye. Yango nde makasi na biso. “Lisungi na ngai ekouta epai na Yawe.” Bino Baklisto, boluka esengo na bino epai na Ye, boluka makasi na bino epai na Ye, boluka bomengo na bino epai na Ye. Azali kimia na ngai. Azali esengo na ngai. Azali bolingo na ngai. Azali Bomoi na ngai. Yango nde Boyokani, Elembo likolo na ekuke!

277 Ezali mokumba na Ye te mpo na moto nyonso, moto nyonso, ézala nani, oyo azali na nse na Yango te.

278 Pe bomikanisela, libota mobimba ezuamaki, basanganaki esika moko. Oh! la la! Oh, bomikanisela!

279 Bokoloba: “Ee, papa na ngai azali motei. Ndeko na ngai! Mokengeli na ngai! Oyo ya ngai. . .” Ekoki pe kozala solo, kasi olobi nini mpo na yo moko?

280 Bomikanisela, babatlamaki bobele ntango elembo etiamaki polele! Soki mobali moko azalaki *awa* na nse, pe mwana na ye azalaki na ngambo ya balabala, azalaki na likama. Akokufa.

Papa na ye akobika. To, soki mwana nde azalaki *awa*, bongo papa na ye azalaki kuna, papa na ye akokufa. Bobele elembo! “Ntango Nakomona elembo, Nakoleka likolo na bino.” Eloko bobele yango.

²⁸¹ Bokoloba: “Ee, mwana na ngai azali motei.” Bino bamama bolobaka: “Nazali na mwana mobali malamumu koleka, to mwana mwasi malamumu koleka. Nayebisi bino, bazali bana ya boboto koleka. Batondisami na Molimo Mosantu, pe batondi na bolingo! Bazali na botosi. Naino námona bana ya boye te!” Mama, olobi nini mpo na yo moko?

²⁸² Bokoloba: “Mama na ngai azali na boboto koleka. Nayebi, soki akufi, akokende na Lola, mpo azali mpenza na Elembo, Ndeko Branham.” Kasi olobi nini mpo na yo moko, ndeko mwasi? Libota mobimba esengeli kozala na nse na yango.

²⁸³ Bolembi? [Losambo balobi: “Te.”—N.D.E.] Nako...Midi ekoki...Bozela moke. Nakoki kokata yango pe kokoba na mpokwa. [“Te.”] Kasi soki bo—bolingi kozala mwa moke koleka lisusu, nakomeka sikawa kokende nokinoki. [“Amen.”] Nakokotisa yango mbala moko. Mpo ete, nakanisi, ekozala malamumu bozua yango sikawa, wana bozali na nse na epakweli na yango. [“Amen.”]

²⁸⁴ Bobele ntango Elembo etalisami! Na sima, libota mobimba esengeli kozala na nse ya Elembo yango, Makila. Papa ná mama, nayebi ndenge bozali komiyoka. Ngai pe nazali na bana, esengeli pe námona bango babikisami. Nazali komilobela ngai moko lelo. Bomoni? Nazali na bandeko mibali. Nazali na ndeko mwasi. Nazali na balingami. Na—nalingi pe komona bango babikisami. Kasi, bobosana te, soki Elembo etalisami te, bakokufa. Lisekwa ekozala mpo na bango te. Ya solo. Babungi. Bobele soki Elembo etalisami!

²⁸⁵ Ndakisa, Yoshua, tokokaki kotanga yango soki tozalaki na ntango. Bokoma yango, Yoshua mokapo ya 2; mondimi ya Mabota, mwasi na pite, Laaba.

²⁸⁶ Oh, soki ezalaki ngonga ya libwa. Nalingaki—nalingaki kozua likambo yango pe kotalisa bino lolenge ezalaki kuna, bomoni. [Losambo balobi: “Kamata ngonga esengeli.”—N.D.E.]

²⁸⁷ Mwasi na pite oyo, ya Mabota, botala malamumu, libota na ye mobimba. Azalaki mondimi. Libota na ye mobimba basengelaki kosangana na nse ya nkamba motane wana, elembo wana. Basengelaki kokota na nse na yango, soki te balingaki kokufa. Bayokaki nsango ya nkanda na Nzambe. Bayokaki nsango ya bilembo pe bikamwa Nzambe amonisaki kati na libota na Ye, pe bango basengelaki koyamba yango. Asengelaki koyamba yango. Nzambe, mwanje ya koboma, azalaki koya. Bayebaki yango. Pe Yoshua nde azalaki mwanje yango. Bazalaki na nzela.

²⁸⁸ Ezali pe bongo na bikólo nyonso ya mokili, ezali na nzela ya Kosambisama na Nzambe!

289 Elenge mwasi na pite wana pe, ayokaki. Kondima eutaka na koyoka! Alobaki: “Bikólo nyonso ezali kolenga mpo na bino.” Ya solo.

290 Sikawa, banóngi oyo batindamaki kuna mpo na kobongisa makambo, pe bongo na bongo, amemiaki bato yango. Pe, ye, alingaki kobikisama. Alobaki: “Nayebi ete Nzambe na bino azali Nzambe, pe nayoki nsango ya makambo minene oyo Asali. Nayebi oyo Asali na Og, pe nayebi oyo Asali na bikólo ndenge na ndenge. Pe namoni ete baoyo bayambaka Ye babikisamaka, pe baoyo baboyaka koyamba Ye bakufaka. Pe ngai nalingi kozala na bomoi,” alobaki bongo. Oh! la la! Yango nde. “Nalingi kozala na bomoi.” Mpo ete bango. . .

291 Botala, Yeliko basilaki koyoka nsango ya makambo Nzambe azalaki kosala, kasi baboyaki koyoka likebisi.

292 Pe ezali na ebongiseli moko te kati na ekólo oyo, na nzinganzinga, oyo ezangi koyoka nsango ya makambo Nzambe azali kosala. Bazali koboya koyoka likebisi.

293 Nguya pe bilembo na Ye minene emonisamaki polele. Oyo Ye asalaki, Akatisaki bango mai ya Ebale na Kufa, lokola na mabele ekauki. Ayeisaki, Akelaki biloko, pe magbololo, pe nsili, pe nzinzi pe eyaki kati na mopepe; akelaki yango na Liloba na Ye, na nzela ya mosakoli na Ye. Ezalaki libombami te. Bayebaki yango.

294 Pe Laaba alobaki: “Nayoki nsango yango. Naboi ete kokufa elongo na bazangi kondima oyo. Te, misie!” Ayebaki kosambisama esengelaki kolanda yango, mpo bazalaki mpenza na nzela. Ayebaki yango. Na bongo, bapesaki ye nzela ya kokima.

295 Bango bazalaki na kondima ete ebongiseli na bango monene ya Yeliko ekotelema liboso na nkanda na Nzambe, bomoni, ebongiseli na bango monene.

296 Yango nde mingi kati na bango bazali kokanisa lelo. “Oh, ya solo, Nzambe akosala yango te.” Yango nde Satana alobelaki Ewa. “Oh, ya solo, Nzambe akosala yango te.” Akosala yango, mpo Alobaki ete Akosala yango, bomoni, pe ezali Liloba na Ye. Iyo, misie.

297 “Bobeke soko moto abotami!” “Pe bilembo oyo ekolanda baoyo babotami!” Bomoni? “Na makambo oyo bato nyonso bakoyeba ete bozali bayekoli na Ngai,” pe bongo na bongo, bomoni. Malamu, balingaki kosala yango. Oh!

298 Nini esalemaki? Sikawa bakangisaki bango minoko. “Kolamuka moko ekosalema awa te. Ebongiseli na biso ekosunga likambo wana te. Tolingi bolema ya lolenge wana kati na biso te. Napekisi bino nyonso kokende na liyangani wana.” Oh! Yeliko, ezali na nzela mpo na etumbu!

299 Kasi ezalaki na bandeko, oyo bazalaki koyokisa ba-bande, bamikotisaki na mayele esika moko, mpo na mimboti

ebongisámá liboso. Bamikotisaki kino na ndako na ye pe bayokisaki ba-bande. Akómisaki nda—ndako na ye ndako-yanzambe, mpo na koyamba nsango.

³⁰⁰ Ezali pe lisusu na bato yango, boyebi. Nsango ekokómela Momboto oyo ebongisámá liboso, ata ndenge nini. Toyebi te ndenge nini Ekokómela bango, kasi Ekokómela bango, mpo Bayengebeni bakokufa elongo na bato mabe te. Nzambe azali kokeba na yango, lelo. Iyo, na lolenge moko to mosusu, Yango ekomikotisa. Toyebi te lolenge nini. Ata bato baboyi kosunga Yango, kasi ezali na kuna na Mimboto oyo ebongisámá liboso.

³⁰¹ Moto nyonso ayebi Biblia malamumu, ayebi ete mwasi na pite wana abongisámáká liboso. Azalaki mpenza yango! Ye azalaki te. . . Biblia elobi: “Akufaki elongo na baoyo baboyaki kondima te.” Ya solo. Kasi andimaki nsango ya ntango.

³⁰² Pe Nzambe apesaki ye elembo, na nzela na batindami na Ye. Balobaki: “Ókamata nsinga ya motane pe ókanga yango na . . .” Balobaki: “Óbosana te, soki okangi nsinga yango wana te, to otiki yango wana te, na nzela oyo biso tokimelaki, tokozala na likambo na ndai na biso te.” Pe balobaki: “Soki olongwe na nse na yango, ezali likambo na biso te.” Oh! la la! “Laaba, momboto nyonso ebongisámá liboso, esika oyo, bokende koluka bango. Mema papa na yo ná mama na yo! Mpo ete, touti kobima na Ezipito sikawa, na nse ya mbondi oyo, pe nyonso totiaki na nse ya elembo oyo te ekufaki. Laaba, napesi yo etaliseli. Ezali elembo. Pe nalobi, na Nkombo na Nkolo, nazali kolobela yo, tia yango! Nayebi likambo yango malamumu, ná motindami. Nayebi malamumu mwanje ya nkanda, Yoshua. Azali motindami ya Nzambe mpo na kobebisa. Nayebi ye malamumu, pe ayebi esengeli etaliseli ya elembo ezala. Pe yo kanga yango kuna, pe okobatelama. Nalapi ndai.” Nzambe pe alapaki ndai, ete baoyo bakozala na nse na yango te bakokufa, pe baoyo nyonso bakozala na nse na yango bakozala na bomoi.

³⁰³ Pe sikawa, ndai yango moko ezali lelo, ndenge moko, bomoni, “Ngai nakotika bino kokufa te elongo na baoyo baboi kondima Nsango.” Pe bango. . .

³⁰⁴ Ye ayókáká nsango ya misala esalemaka, pe andimaki yango. Kasi, pene na, azalaki. . . Ye ná tata na ye, ná bandeko na ye, to basusu, bobele bango nde bandimaki yango, kati na engumba mobimba.

³⁰⁵ Bomoni boni bazali moke? Bobele moko *awa* pe moko *kuna*, libota moke ekobima na ekólo moko. Ezali ya solo? [Losambo balobi: “Amen.”—N.D.E.] Ndenge moko sikawa, awa tozali kolobela misala. Bisó. . . Soki bolingi komona bosolo ya likambo, bosengeli liboso komona nini elilingi ezalaki. Bosengeli komona nini elilingi ezali, na sima bokoyeba lolenge likambo ya solo ekozala. Bomoni?

306 Nguya na Ye etalisamaki. Kosambisama ezalaki na nzela. Basengelaki kondima, mpo na kobikisama. Iyo, misie. Pe makambo mike . . .

307 Bato yango bakotaki na kati, batindami yango, pe—pe bazuaki momboto oyo ebongisámá liboso, oyo andimaki. Asalelaki ndako na ye lokola ndako-ya-nzambe, mpo na koyamba batindami yango. Baboyaki kokotisa bango na bandako-ya-nzambe na bango. Iyo, misie. Bomoni? Na bongo ye . . .

308 Bino pe, bakoboya kokotisa bino. Bakobwaka bino libanda soki bolobi likambo mpo na Yango. Iyo. Bomoni?

Baoyo nyonso bandimaki, kati na engumba na ye, bamemaki bango na nse na elembo.

309 Yango mpenza nde tosengeli kosala malamulelo. Soki olingi balingami na yo babikisama, ekozala malamulelo kokotisa bango sikawa. Bomoni?

310 Ntango nkanda na Nzambe ebebisaki engumba monene wana, etaliseli ya elembo ebatelaki ndako na ye. Amen. Nini? Etaliseli ezalaki likolo ya elembo na ye. . . To, elembo ezalaki likolo na ndako na ye, ntango oyo eteni mosusu ya engumba ekweisamaki na nse. Ezalaki nini? Ezalaki nini? Yoshua, motindami na Nzambe! Nzambe Ye moko andimaki nsango ya motindami na Ye. Amen! Etalisaki yango polele. Etalisaki yango polele. Bandimaki nsango yango. Andimaki nsango ya motindami na Ye. Pe ntango eteni mosusu nyonso ya engumba ebukanaki nye, elembo motane ya Laaba ezalaki wana na ekuke, pe bato mosusu nyonso bakufaki.

311 Na bongo, banje na kobebisa bakotaki pe babebisaki nyonso oyo ezalaki na engumba, ata eloko moko te etikalaki. Soki moto moko amemaki eloko moko na biloko yango, asengelaki kokufa elongo na yango. Bakamataki biloko nyonso pe babebisaki yango! “Alakelama mabe moto oyo akomeka lisusu kotonga yango. Mwana na ye ya liboso akokufa ntango akobanda,” pe bongo na bongo. Nzambe alakelaki yango mabe ndenge wana, eloko monene oyo eboyaki ngo- . . . nsango ya ngolu pe ya mawa, bakanisaki bazalaki kobatelama.

312 Lelo, bato mingi bakanisaka: “Mpo nazali mondimi ya lingomba, nazali kobatelama.” Bomeka kondima bolema ya ndenge wana te.

313 Ntango: “Makila ekozala elembo mpo na bino.” Lelo Molimo ezali Elembo mpo na bino, Bomoi oyo ezalaki kati na Makila.

314 Ndenge moko, tokanisa yango, elembo moko basalelaki na Ezipito, elembo moko ya bomoi oyo ezalaki na Ezipito, ezalaki na Ezipito, Nzambe asalelaki elembo yango moko kuna. Yoshua, elilingi ebongi be ya Yesu, azalaki sembo na etaliseli ya elembo oyo batindami na ye bateyaki. Yoshua, ntango alobaki bongo,

alobaki: “Bosimba ndako wana te, to eloko moko kati na yango. Yango ezali mpo na Yahwe.” Amen!

315 Moto na Mabota, mwasi na pite, mwasi ya balabala, kasi ayokaki pe andimaki, pe atiaki elembo.

316 Ata omikotisa kati na masumu ndenge nini, ata osálá nini, ezali na ntina ata moko te. Tia nde Elembo. Ezali mpo na yo. Soki oyoki na motema na yo, eloko moko ezali kobenda, Ezali mpo na yo. Tia nde Elembo. Pe moto monene Yosh- . . .

317 Liloba oyo *Yoshua* elingi koloba “Yawe-mobikisi.” Ndenge moko pe *Yesu*, elingi koloba “Mobikisi.” Pe, *Yoshua*, ntango ayebaki ete batindami na ye. . .

318 Batindami na ye bazongaki, pe balobaki: “Natosaki mitindo na yo. Pe ezalaki na mwasi moko tomonaki, ntango tobetaki bandede, omoni. Tomonaki mwasi moko oyo andimi. Pe tolobelaki ye ete baoyo nyonso bakoya na nse na elembo yango ya motane kuna, elembo, ekokata likambo. Na bongo nateyaki bongo. Ondimi kosalela yango, *Yoshua*?”

“Natindaki bino mpo na kosala yango.” Amen.

319 Pe na bongo, yango, *Nzambe* andimaki yango, ndako yango ebukanaki soko moke te. Na sima ntango *Yosua* atelemaki wana pe apesaki motindo ya kobebisa yango na mobimba, bakendeki semba kuna, pe *Laaba ná bato* na ye nyonso bazalaki wana, ná biloko na bango nyonso, amen, amen, bozui na bango nyonso ezalaki na ndako, ebatelamaki. Bazalaki bobele wana, pe basengelaki kotala libanda te. Bakokaki kotanga *Makomi* ntango etumba ezalaki konginda.

320 Amonani lisusu pe alingamaki, ntango balingaki ye na generale ya mampinga, pe atombolamaki, akómaki na *Beteleme*, pe eteni ya mabele epesamelaki ye kuna kati na bango. Pe abotaki. . . abotaki mwana mobali moko ayebani, pe mwana yango oyo ayebani abotaki mwana mobali mosusu ayebani, pe mwana yango abotaki mwana mobali mosusu ayebani, kino ntango *Mwana* mobali ya lokumu oyo ayebani ayaki. Ezalaki kokita pe elekaki na nzela ya *Obede*, pe na nzela ya *Yisai*, akobaki koya kino na *Dawidi*. Ezali solo, mwasi na pite *Laaba*, mpo andimelaki motindami. Atiaki elembo, pe ndako na ye ebikisamaki, soki te alingaki kokufa wana esika azalaki.

321 Boyoka na bokebi sikawa. Oh, toloba, bososoli yango? Nyonso ezalaki na nse na yango ebikisamaki na *Ezipito*. Nyonso ezalaki na nse na yango ebikisamaki na *Yeliko*. Nyonso ezali na nse na *Yango lelo ekobikisama*. *Ekanganelo* ya makila, mwana na mpate ya makila, ezali elilingi ya *Yesu Klisto*.

322 Na *Baebele* 13:10 pe 20. *Nazali* na ntango ya kotanga yango te. *Bokoma* yango. *Nalingaki* kotanga yango. *Babengi* yango “boyokani ya bileko na bileko.” *Makila* ya *Yesu Klisto* ebengami

“boyokani ya bileko na bileko.” Iyo, misie! “Boyokani ya bileko na bileko.”

³²³ Mpo na nini babengaki yango “boyokani ya Seko” te? Mpo elingaki kozala ya Seko te. Ntango tosikolami, nyonso esili wana. Ezali *bileko na bileko*, elingi koloba “na ntango moko boye,” kino ntango ekosila. Mosusu ekozala soko moke te. Ntango ngonga ekosila, tokosengela lisusu na boyokani te. Kasi kino ntango ekosila, tozali na bosenga ya boyokani.

³²⁴ Sikawa, bomikanisela, Baebele 13:10-20, “boyokani ya bileko na bileko.” Elaka ya Nzambe, oyo ekangami na Makila, ekangoli biso na masumu. Amen! Lisumu ata moko te ezali kati na Ye; lisumu, ngai-ngai, mosuni.

³²⁵ Bokumbamela Ye pe bomonisa nguya na Ye elakamaki! Libota ya boyokani na Nzambe, oyo bakangami na Makila, oyo bakangami na elembo, bazali na Molimo ya Yesu Klisto awa na kati, ete, “Ye oyo akondimaka Ngai, misala Nazali kosala, akosala yango lokola,” kotalisa boyokani. Bomoni?

³²⁶ Kondimana na Sika! *Kondimana* elingi koloba “boyokani.” Ya solo, boye te, Docteur Vayle? *Kondimana* elingi koloba “boyokani.” *Kondimana na Sika* elingi koloba “boyokani ya sika.” Kondimana na Kala ezalaki ya kala, na nse ya mwana na mpate, pe bomoi ekokaki kozongela mondimi te. Kondimana na Sika ezalaki Mwana na mpate ya Nzambe, pe Bomoi na Ye ezali kozongela biso. Bomoi ya Makila! Bomoni? Makila ezali Bomoi na Kondimana na Sika, bomoni, Bomoi euti na Makila ya Mwana na mpate, elingi koloba Kondimana na Sika, boyokani ya sika.

³²⁷ Ete, Nzambe, “Sima na mikolo yango, Nakokoma mibeko na Ngai likolo na bitando ya mosuni na mitema na bango.” Bomoni? Bomoni? “Likolo na bitando ya mabanga te, pe makila ya mwana na mpate, oyo bosengelaki koloba: ‘Ee, na—namemi makila *awa*, bongo yango elobi nini?’ Kasi likolo ya bitando ya mitema na bino, bomoni, boyokani ya Molimo oyo Nakosala na bato.”

³²⁸ Pe Ezali kotalisa nguya na Ye. Yoane 14:12, elobi: “Ye oyo akondimaka Ngai, misala Nazali kosala akosala yango lokola.”

³²⁹ *Kondimana na Sika* ezali “boyokani ya sika,” Bomoi ya sika, elakisi ete Yesu akokiselaki biso bosenga nyonso Nzambe asengaki, mpo na kozongisa biso, na solo, kokómisa biso bana mibali pe bana basi ya Nzambe, na nse ya Makila, wapi ekweli ata moko ezali lisusu te.

³³⁰ Baloma 8:1: “Na boye, sasaipi kosambisama ezali te mpo na bango bazali kati na,” baoyo bazali *kondima* Yango te, “baoyo bazali kati na Klisto Yesu, baoyo bazali kotambola na nzoto te, kasi na Molimo. Pe Liloba na Ngai ezali Molimo pe Bomoi.” Bomoni? Oh, nakokaki kobenda liteya moko uta na yango pe koumela lisusu ngonga mibale to misato. Kasi, totala yango na lombangu, bomoni.

³³¹ Kosambisama ezali lisusu te; tokangolami na masumu, tokangolami na mitungisi ya mokili, ekweli moko te. Mpo na nini? “Mpo na baoyo babatisamaki na Molimo moko, mpo na kosala Nzoto moko.” Wana nde Makila ya Mwana na mpate etiamaki. Nzambe na Lola andimaki yo, pe yo. . . Bomoi na Ye ezali kati na yo, pe bokómi bana mibali pe bana basi ya Nzambe.

³³² Ezaleli na yo ekómi ezaleli ya Nzambe. Elingi koloba nini, moto ya kotenga-tenga? Te, misie! Nzambe azali Nzambe ya kosambisa. Azali Nzambe ya kosembola. Esengeli kozala na molongo. Eloko mosusu te. Yango nde lolenge ya ezaleli yo ozali, mpo ozali ezaleli ya Tata na yo. Bomoni?

³³³ Nini? Bomoi, botala malamú ntango (yango) balongoli bomoi, mpo na kozua makila. Bomoni? Balongoli mpenza bomoi. Bomoni? Bomoi, balongoli yango, mpo na kozua makila. Bomoni? Makila etiamaki, pe bomoi ekokaki kozonga likolo na mondimi te na ntango wana, mpo ezalaki bomoi ya nyama. Kasi bomoi te ya. . .

³³⁴ Kasi, bomoni, esika ya moto, ezalaki Moto oyo aleki, aleki, aleki. Bomoni? Pe sikawa yango ekomisi moto bobele moto te, kasi akómi mwana mbali pe mwana mwasi ya Nzambe, na Bomoi oyo eleki, eleki, eleki, eleki, eleki, oyo ezalaki kati na Ye, pe ezongi likolo na yo; yango nde ebongoli yo longwa na mosumuki, pe makambo ya mokili, mondimi ya lingomba, molandi ya ebongiseli, pe ekómi yo Moklisto oyo abotami mbala mbale, atondisami na Molimo; pe Bomoi na Nzambe ezali kopunjapunja kati na yo, lokola lotótó na móto uta na kotúla, ezali yo kotambola, otondi na nguya, na bolingo, pe na boboto, pe ezali Molimo Mosantu kosala, pe koloba. Oh! la la! Yango nde. Pe ná (ná nini?) koyoka Nsango oyo, komona Likonzi na Móto, pe kozala na ndanga epambolami: “Nasili kolongwa na kufa pe koingela na Bomoi.” Botala, yango wana, kosambisama ezali ata moke te.

³³⁵ “Soki mitema na biso mikokweisaka biso te, na ntango wana tokozua makambo tosengi, bomoni, toyebi yango.” Kasi soki masumu ezali na mitema na biso, yango nde ekokweisa biso, ekozala malamú mpo na bi—bisó ete kobanda naino te. Bomoni? Bosengeli kosikolama na masumu. Pe nzela bobele moko ya kosikolama na masumu ezali kokota kati na Ye. Yango nde ezipeli moko mpo na masumu, ezali Klisto.

³³⁶ Bomikanisela, Makila ya boyokani, Makila ya boyokani ekondimama te kozanga Elembo. Okokoka te. Okondimama te. Okoloba: “Ee, ngai—ngai nabulisámá na makambo mingi.” Yango ezali Elembo te. Ezali Molimo, ezali Elembo, Molimo na Klisto likolo na yo. Bondima yango!

³³⁷ Sikawa, botala, Liloba epesi biso ndanga ya elaka. Nyonso oyo nakomaki awa mpo na koteya. Emonani lokola nakoteya mokolo mobimba, bomoni, likolo na yango. Bomoni? Liloba epesi

biso ndanga ya elaka, mpo Ezali elaka. Liloba ezali Elaka, pe Liloba ezali Nzambe, pe Liloba ezali—ezali mpo na biso. Pe tozali kokóma Liloba, pe Liloba ezali kokóma biso. “Soko bokoumela kati na Ngai, pe Maloba na Ngai ekoumela kati na bino,” na sima, bomoni, ekómi libota moko monene mpenza. Bomoni? Epesi biso ndanga. Mpo na nini? Ee, ezali eteni na biso. Bomoni? Bomoni? Bomoni, Ekómi eteni na biso. Oyo nde liteya! Malamu. Epesi biso ndanga, mpo na elaka.

³³⁸ Elembo ezali kotalisa ete kosombama esalemaki pe endimamaki. Sikawa, okoki kozua elembo ya tiké ya engunduka te soki ofuti naino ntalo na yango te; pe lolenge moko ya kofuta ntalo ezali kofuta yango. Ya solo. Nini? Ndima Yango. Yamba Yango. Botosi mobimba ya Liloba na Nzambe nyonso ekopesa yo makoki ya kozua Elembo. Botosi mobimba! Eteni na Yango te, kosuka epai ebongiseli na bino esuki te, kasi mobimba na Yango. Botosi mobimba ya Liloba, yango nde Klisto, ekokotisa yo kati na Klisto.

³³⁹ Bongo ekozala boni soki ozali mobimba na kati, kasi makolo na yo ezali naino libanda? Ekozala boni soki ozali mobimba na kati, bongo maboko ezali naino? Mobimba na biso na kati, kasi motema ezali libanda? Bomoni? Bomoni? Motema ezali naino na mokili? Bomoni? Kasi biso tosalaka bongo te.

³⁴⁰ Botosi nyonso, mobimba, ekokómisa yo ná Liloba eloko Moko. Ndima Yango, eteni moko na moko. Mobimba na Yango ezala kati na yo, pe otala Yango kosala na nzela na yo.

³⁴¹ Okotambola na bizaleli mabe te. Bomoni? Ozali Moklisto. Ata balobi nini, bakomama yo ata moke te. Ozali kati na Klisto. Ozali kobatelama ndenge esengeli.

³⁴² Ntango kufa ebeti na ekuke, ezali na makasi te, bomoni, ata moke te. Mpo na nini? Ezali bobele kolongola yo *awa* pe kokotisa yo Kuna.

³⁴³ Mbula ezali na ntina moko te. Osili koleka makambo ya mbula. Ozali kati na Seko, mpo ozali kati na Ye. Ye azali Seko. Ezali na ntina moko te, soki ozali elenge, mobange, kati-kati na mbula, to nani. Ózala kitoko, mabe, mokuse, monene, to nini, ezali na ntina moko te. Ata moke te.

³⁴⁴ Ozali kolekisa ntango na yon a makambo yango te. Yo, osili koleka makambo wana. Osili kokufa. Bomo na yo ebombami kati na Nzambe na nzela ya Klisto. Otiami elembo na kati na nzela ya Molimo Mosantu, pe ozali kotambola kati na Klisto. Eloko bobele moko ozali komona ezali Klisto. Esili. Na nzela na Ye nde ozali kotambola. Kasi, Oh! la la! Na kokamwa te tozalaka koyemba loyembo moke oyo!

Tondisa nzela na ngai na bolingo mokolo na mokolo,
Wana ezali ngai kotambola na Ebenga ya lola;

Tika natambola ntango nyonso, na loyembo pe
koseka,
Tondisa ngai . . .

345 Tika ngai názala ndeko mobali. Tika ngai nábika bomoi ya ndakisa oyo Klisto alobaki moto asengeli kozala. Tika ngai názala ndeko mobali mpo na ndeko mobali, ndeko mobali mpo na ndeko mwasi. Tika ngai názala mo—motei mpo na batei. Tika ngai názala ndakisa ya bandakisa. Tika ngai nálakisa na mokili ete Liloba oyo ezali Klisto. Lolenge bobele moko nakoki kosala yango ezali kokota kati na Ye. Mpo ete, nakoki kosala yango ngai moko te, yo pe okoki yango te. Kasi tika Liloba ná yo bókóma eloko Moko, na ntango wana Ekobika bomoi na Yango polele. Okozala mokanda na Yesu Klisto oyo ezali kotambola, ntango Ye akozua bokonzi nyonso, bokonzi likolo na yo, mpo na kosalela Liloba moko na moko.

346 Soki Ayei na nzela *oyo* : “Nalingi kosala Boye,” pe yo olobi: “Te, te, nandimi Yango te,” bomoni, okoti naino kati na Liloba te. Bomoni?

347 Mobimba, sikawa botala malamumu, mobimba, sikawa, botosi mobimba ya Liloba na Nzambe nyonso ekopesa biso makoki ya kozua Elembo. Na bongo, ntango tofuti, tosambeli, tosengeli kozala na Elembo ya kotalisa na libondeli na biso.

348 Soki olobi: “Nabondeli, Nkolo, kasi nazali mpenza te na . . .” Ee, ozali na yango te. Ekozala malamumu otika, bomoni, mpo . . . Kende naino, liboso, kozua Elembo, bomoni, mpo Elembo ezali eloko Ye akoyeba. Bomoni? Iyo, misie!

349 Ntango tozali kobondela, tosengeli bongo kotalisa Elembo: “Nkolo, natosaki Yo, na nyonso. Nabongolaki motema mpo na masumu na ngai. Namiyoki ete Olimbisaki ngai. Nabatisamaki na Nkombo na Yesu Klisto. Molimo Mosantu ezali likolo na ngai. Sikawa nazali na bosenga ya eloko boye mpo na nkembo na Yo. Nkolo, nasengi mpo na yango. Ekómi ya ngai sikawa.” Na bongo eloko moko ekangami *awa* lokola longo, “uh-uh,” ekómi ya yo. Likambo esuki. Bongo nyonso esili. Likambo esili. Ekati likambo. “Nasengi mpo na eloko *oyo*. Nasengi mpo na yango. Nasengeli kozua yango. Bomoni? Bomoni? Na—nalingi yango mpo na nkembo na Yo.” Bomoni? Ee, ezali yango, na sima Akopesa yo yango. Na bongo oyebi ekómi ya yo. Ezali ndenge moko mpo na bana na biso, pe bongo na bongo, tozali kotia Makila, bondima yango. Esili. Malamumu.

350 Na ntango wana Akosala nini? Ntango ozali na, okoki kotalisa Elembo na libondeli na yo, Yango elakisi ete ekómi na botosi mobimba na Liloba na Nzambe nyonso. Ntango ozui Elembo, elakisi ete otosaki Liloba nyonso. Na sima, yo ná Liloba bokómi eloko moko, ozali bobele kosenga eloko oyo yo ozali. Bomoni? Bomoni? Na bongo, ee, oyebi.

351 Soki nalobeli *oyo*: “Yo loboko, tosa ngai, sembolama mpo na kozua muswále wana!” Ekosala yango. Bomoni, loboko etosaki ngai. Mpo na nini? Ezali eteni na ngai. Bomoni?

352 Bongo ntango yo ná Liloba bokómi eloko moko, bilaka nyonso, nkembo na Nzambe, elaka nyonso ezali ya yo. Ekotosa yo. Na bongo okokeba na makambo olingi kosala. Okotia loboko na yo na móto te, mpo na koloba: “Botala ngai kosala yango.” Oh, te, te! Bomoni? Kasi soki eloko moko ezali kati na móto yango, oyo esengeli na ngai kozua yango, ekotosa ngai. Bomoni? Bomoni? Ya solo. Bomoni, okokeba na makambo ozali kosala.

353 Yango nde ntina Molimo Mosantu epesamaka na boike te, pe bongo na bongo, boyebi likambo nalingi koloba, mpo ete. . . Okolinga te ete. . . Mosali na Nzambe ya solosolo amilakisaka te na Yango, bomoni. Ezali bongo. Yango ezali koluka komilakisa.

354 Ntango tozali kobondela, tokotalisa Elembo. Elakisi ete totosaki na mobimba.

355 Polo alobeli biso, ete, “Makila elobaka.” Yango, moto nyonso ayebi ete makila ezali, mpenza, yango moko, ekoki koloba te. Ezali eloko ya kotanga. Boye te? Boni bayebi yango? [Losambo balobi: “Amen.”—N.D.E.] Kasi boni bayebi ete makila elobaka? [“Amen.”] Soki bolingi kokoma yango, Genese 4:10. Nzambe alobaki: “Olobi nini mpo na ndeko na yo?” Alobaki: “Makila na ye ezali kobelela uta na mokili, kotemela yo.” Amen! Boye te? Makila na ye ezali koloba. Aleluya! Nzambe alobaki: “Olobi nini mpo na ye?”

Alobaki: “Ngai nde mobateli na ndeko na ngai?”

356 Alobaki: “Makila na ye ezali kobelela. Makila na ye ezali kobelela.” Ezali elembo. Ezali elembo, kotalisa ete abomamaki. Makila na ye ezalaki kobelela kotemela ye.

357 Sikawa, soki bozui yango na Genese 4:10, bokende sikawa na Baebele 12:24, bobanda kotanga. Na Baebele 10, 12:-4. Alobi: “Makila na Yesu ezali koloba makambo malamumu koleka oyo ya Abele.”

358 Bomoni, Abele azalaki moyengebeni. Akufaki. Akufaki, asalaki mabe te, mpo azalaki na Nzela. Azalaki na Nzela, azalaki sembo na emoniseli ya solo azalaki na yango. Alobaki. Ebelelaki! Makila ya boyengebene ya Abele ebelelaki kotemela Kaina.

359 Kasi Makila na Yesu Klisto, ebelelaki kaka te, Esikolaki pe. Amen! “Ezali koloba makambo malamumu koleka.” Ekómisi bino bana mibali pe bana basi. Ebombi bino na nkanda na Nzambe. Bomoni? Makila ya Abele ekokaki kobomba Kaina te, bomoni, kasi Makila na Yesu ekoki. Amen!

360 Na bongo, yo Kaina ya kala, mibimisa lelo, soki ozalaka konyokola Liloba, pe koloba: “Ntango na bikamwa esila koleka. Makambo yango ezali mpenza bolema, pe nyonso wana.”

361 Ezali kobelela, bomoni. Makila na Yesu Klisto ezali kobelela, kasi bolimbisi ezali kati na Yango bobele soki oyambi Yango. Tokokaki mpenza koumela mwa moke likolo na yango, bomoni, “Makila ezali koloba malamumu koleka.”

362 Ndima, mpo na kobatelama. Na sima tia yango, bomoni. Ndima mpo na . . . Tala ntina osengeli kondima. Bomoni, osengeli kobatelama mpo na yo moko. Ndima mpo na kabatelama na yo, na sima tia Elembo mpo na libota mobimba. Bomoni? Okoloba: “Nakosala yango ndenge nini?” Senga Yango! Soki Etambolaki mpo na yo, na sima yo ná Liloba bokómaki eloko moko. Amen! Amen! Bomoni? Bomoni, Ekotambola mpo na bino nyonso. Yo ná Liloba bozali eloko moko, na sima tia Yango mpo na bana na yo, tia Yango mpo na balingami na yo.

363 Ndenge Laaba asalaki, atiaki elembo mpo na tata na ye, atiaki yango mpo na mama na ye, atiaki yango mpo na bandeko na ye ya mibali pe ya basi, pe akotisaki bango nyonso.

364 Tia Yango, loba: “Nkolo, nakei kozua mwana na ngai ya mobali. Nakei kozua mwana na ngai ya mwasi. Nasengi ye! ‘Satana, tika ye kimia!’ Nayezi kozua ye. Natii Elembo na ngai, Molimo Mosantu. E Molimo Mosantu, oyo efandi kati na ngai, kanga mwana na ngai ya mwasi kuna azali. Nakei epai na ye sikawa, ná epakweli na Yo likolo na ngai.” Akosala yango. Amen.

365 Ezali yango nde basalaki na Ezipito. Yango nde basalaki na Yeliko.

366 Soki bolingi kotanga eteni mosusu, na Misala 16:31. Polo alobaki na kapitene ya basoda: “Ndima! Nazali motindami ya ntango. Ndimela Nkolo Yesu Klisto, pe yo ná bato na libota na yo bokobikisama.” Ezali bongo? Ndimela mpo na libota na yo, mema bango nyonso na nse na yango. “Sikawa omoni Nzambe ya Lola kosala ekamwiseli. Kosambisama ekolanda sima. Ondimi yango?”

“Iyo! Násala nini?”

367 Alobaki: “Telema pe zua libatizi.” Polo amemaki ye libanda pe abatisaki ye, alobaki: “Sikawa ndimela Nkolo Yesu Klisto, pe yo ná bato na ndako na yo bokobikisama.”

368 Ndimela nini? Ndimela Nkolo Yesu Klisto, mpo na bato na ndako na yo, tia Elembo na bato na ndako na yo.

369 Bongo okosala nini ntango okotia Yango na bato na ndako na yo? Okobimisa bosoto nyonso libanda. Okokamata ba-jipe nyonso ya mikuse, bakupe, bakalati, makaya, ba-television, ná biloko mosusu, pe okobwaka yango libanda, ntango okotia Elembo; okosepela na yango lisusu te. Iyo, misie. Bimisa nyonso wana libanda. Mabina nyonso, ba-feti, miziki ya rock-and-roll, bazulunále nyonso ya mabe, ná biloko nyonso ya mokili, bwaka yango libanda, loba: “Tozali kopetola esika oyo.”

³⁷⁰ Ndenge Yakobo asalaki, alobaki, ayebisaki mwasi na ye ná bamosusu nyonso, alobaki: “Bosukola bilamba na bino pe biloko nyonso. Bobuaka banzambe na bino wana.” Amen. Yo- . . .

³⁷¹ Boyebi eloko nini Yoshua alobaki liboso bakatisa ngambo? Alobaki: “Bosukola bilamba na bino; bobelema na basi na bino te, pe bongo na bongo, pe bomilengela, mpo ete kati na mikolo misato tokokatisa Yaladene.” Amen. Azalaki komilengela, azalaki kotia elembo. Amen. Yango mpenza.

³⁷² Bomilengela. Botia Yango. Bondima Yango. Bopetola nyonso. Tika bana na yo, tika libota na yo, tika balingami na yo, bamona Yango kati na yo. Ya solo. Ekosala mosala. Iyo, misie!

³⁷³ Na sima tia Elembo na libondeli, na—na—na eyongi, na kondima. Tia Yango na bolingo mingi, pe bongo na bongo, kino ókoyeba ete ekosalema, ekokokisama. Esili. Tia Yango na motema moko, kondima ete Ekosunga. Ntango okosolola na mwana yango, ntango okosolola na mobali na yo, okosolola na mwasi na yo, okosolola na molingami yango, ndima ete Ekosunga. Telema bobele wana, pe loba: “Nkolo, nasengaki bango. Bazali ya ngai. Nazali kozua bango mpo na Yo, Nkolo.”

³⁷⁴ Tia Yango, pe kela lolenge malamú zongazonga na yo, mpo bákota kati na Yango. Bomoni? Oh, ozali, ozali, soki ozali na Elembo, okokela molimo moko zongazonga na yo, nguya moko, ekosala ete ntango ozali kotambola, bato bakoyeba ozali Moklisto. Bakolinga ólobela bango likambo moko. Bakondima maloba na yo. Bakokangama na makambo okoloba. Bomoni? Ezali bongo.

³⁷⁵ Tia Elembo, na sima tambola na Yango. Senga bato ya ndako na yo. Osengeli kosala yango sikawa. Ezali ntango na mpokwa. Sikawa, boyoki ntango molai, sikawa ezali ntango na mpokwa. Ezali ntango ya kotia yango. Moko na mikolo oyo, nkanda ekobeta, na sima, mbala mosusu, ntango ekosila koleka. Bomoni? Botia Elembo, na motema mobimba.

³⁷⁶ Soki bolingaki kotanga yango, botanga likambo moko awa, Likomi na ngai nakomaki mpo na yango, ezali, botanga Baefese 2:12, soki bolingi kokoma yango. Botala, na Baefese 2:12, ntango bokotanga yango, elobi boye. “Ete tozali kosalela misala na kufa te, kasi tozali kosalela Nzambe na bomoi, na misala ya bomoi.” Amen! Oh! la la! Na misala ya bomoi, bilembo ya bomoi. Bondimaka bilembo ya bomoi? [Losambo balobi: “Amen.”—N.D.E.] Bókoma lisusu, Baebele 9:11-14, soki bolingi kokoma yango. Bilembo ya bomoi, misala ya bomoi, bosalela yango!

³⁷⁷ Bindimeli ya kufa te: “Nakomema mwana na ngai ya mobali na lingomba pe námona ye kokóma moto na lingomba yango.”

³⁷⁸ Elenge Moklisto malamú moko awa, moninga malamú, moninga ya kala, moninga mpenza, a—ayaki awa, pe abatisamaki. Mama na ye alobaki: “Nakanisaki okokende kobatisama na lingomba ya monene koleka, soki olingaki ko—

kobatisama.” Bomoni? Bomoni, ye aboyaki na ye bindimeli ya kala ya kufa pe nyonso wana. Bomoni?

³⁷⁹ Tosalelaka bindimeli ya kufa ná banzambe ya kufa te. Tosalelaka Nzambe na bomoi oyo Makila na Ye esopanaki kuna, pe Elembo etiamaki likolo na biso, mpo biso pe tozala na bomoi. Amen. Iyo, misie!

³⁸⁰ Bósalela bindimeli ya kufa te. Bazali koangana pe makambo lokola Elembo. Balobaka: “Ntango na bikamwa esila koleka. Likambo ya libatisi ya Molimo Mosantu ezalaka te.” Mpo na nini kokota na eloko ya ndenge wana? Bomoni? Bosala yango te.

³⁸¹ Botia Elembo, na sima, “bosalela Nzambe na bomoi,” mpo bozua misala ya bomoi, bilembo ya bomoi; bilembo oyo ebikisaka babeli, esekwisaka bakufi, esakolaka makambo, elobaka minoko na sika, elimbolaka yango, ntango nyonso na lolenge ebongi be, esakolaka pe elobaka ete likambo *boye* na *boye* ekosalema, emonisaka bilembo na Likolo, pe na mabele, bilembo pe bikamwa, amen, oyo elobaka mpenza makambo Biblia elobi ete ekosalema. “Kosalela Nzambe na bomoi,” botia Elembo!

³⁸² Bókendaka na mangomba yango te pe bosangana te na misala ya kala wana ya kufa pe makambo ya ndenge wana, mpo bandimaka te makambo oyo lokola elembo. Kasi biso baoyo tondimi, amen, toyebi ete. . . Balobaka: “Eloko lokola elembo ezalaka te. Yango, oh, oh, ezali bolema. Makambo balobaka kuna, ezali liboma. Ee, makambo yango ezalaka te. Ee, bino basi oyo, oh, bino—bino, ee, bozali te. . . Bilamba na bino ezali na ntina. . .?” Ezali na ntina. Biblia elobi bongo. “Makambo ya suki na bino ezali na ntina. . .?” Biblia elobi bongo.

³⁸³ Yango, yango esika bokeseni ezali, bomoni. “Kozua te, kosimba te, komeka te.” Azali Nzambe. Bomoni? Bongo, ezali mpenza na ntina.

³⁸⁴ Sikawa, bango bakanisi ezali liboma. Kasi mpo na biso baoyo tondimi pe toyebi Solo, toyebi ete Ezali Bozali na Ye ya bomoi, mpo ete Ezali kosala makambo yango moko Ye asalaki ntango Azalaki awa na mokili. Amen.

³⁸⁵ “Oh,” balobaka, “bango bamikaniselaka komona Likonzi na Móto yango.” Ah, te! Ah, te! Tokanisaka eloko moko te.

³⁸⁶ Bakanisaki Polo pe amikaniselaki Yango. Ezipito bakanisaki Yisalaele bamikaniselaki Yango, kasi Ememaki bango na mboka na elaka. Iyo, misie! Bisote. . .

³⁸⁷ Baebele 13:8, boyebi: “Yesu Klisto motindo moko lobi, lelo, pe libela,” soki bokokoma yango, bomoni, ete, “Azali ndenge moko.” E—ezali te—ezali te motindo. . . likaniseli moko boye.

³⁸⁸ Ntango nakomaka Makomi oyo nakomi awa, Nayebi esika Makomi yango ezali, pe ezali bongo nde nasalelaka yango. Bomoni?

389 Toyebi ezali Bozali na Ye ya bomoi, mpo Azali kosala ndenge moko kati na Molimo yango. Sikawa, soki elandanaki na endimeli to ebongiseli moko boye, tolingaki koyeba mbala moko ete ezalaki Klisto te. Boye te? [Losambo balobi: “Amen.”—N.D.E.] Soki namemaki bino kino na endimeli to eloko mosusu, mbele natindamaki na ebongiseli moko. Kasi nazali kopesa bino bindimeli te, pe nazali koteya bino bibongiseli te. Nazali koteya bino Liloba na Nzambe, yango nde nguya ya lisekwa ya Yesu Klisto oyo emonisami, bobele mpo na ngai te, kasi mpo na moto nyonso alingi. Bomoni? Ete bino . . .

390 Ozali ndeko na ngai ya mobali. Ngai nazali moto monene te, pe yo moto moke. Biso nyonso tozali bato mike liboso na Nzambe. Bomoni? Tozali bana na Ye ya mike. Toyebi eloko te, na oyo tosengeli mpenza koyeba. Ye alakisaka biso oyo Ye alingi, pe tozali kotonda Ye mpo na oyo toyebi na mapamboli na Ye. Pe nalingi kozala na yango mpo na ngai moko; nalingi kokabola yango na bino. Bomoni? Nalingi bókota kati na Yango, pe nalingi bóyamba Elembo yango. Pe soki naino bosali yango te . . .Mingi kati na bino, ebele kati na bino, basili kosala yango. Kasi soki bamosusu kati na bino naino basali yango te . . .

391 Bomoni, nazali pe koloba mpo na baoyo bakolanda bande, bososoli. Pe mingi kati na bango . . .Nalobeli baoyo bazali awa na losambo te; nakanisi biso nyonso tokobima. Kasi ezali ntango mosusu na bankoto na nkoto na bato bakoyoka bande oyo, bomoni. Pe, yango, ezali mosala ya koteya. Ekozala na moto moko oyo akokota na Yeliko, boyebi, ná bande moko, na bongo tolingi—tolingi kokanga Momboto ebongisámá liboso wana, ntango yango ekokota kuna, bomoni, mpo nkanda ezali koya.

392 Toyebi ezali Bozali na Nzambe na bomoi, kotalisa ete Nzambe asekwisaki Ye kokokana na Liloba na Ye elakamaki. “Sima na ntango moke, bamokili bakomona Ngai lisusu te. Yeliko, Ezipito, bakomona Ngai lisusu te. Nde bino bokomona Ngai, mpo ete Ngai . . .” “Ngai,” likitana bomei, etalisaka ntango nyonso, bomoni. “Nakozala elongo na bino. Nazali Elembo. Lisekwa na Ngai ezali Elembo. Misala Nazali kosala ekotalisa bino, ekotalisa Ngai kati na bino.”

393 “Ndenge ezalaki na mikolo na—na Lota, ekozala pe bongo na boyei ya Mwana na moto, ntango Nsango na mpokwa ekosakolama.”

394 “Mpo ete Pole ekozala na ntango ya mpokwa. Pene na ntango ya mpokwa, Pole ekomonana.” Oh, nkembo na Nzambe! Nazali komiyoka lokola nakima mbangu koleka mampinga pe napimbua koleka etutu. Bomoni? Bomoni? “Pole ekozala na ntango ya mpokwa.” Ya solo. Mosakoli alobaki bongo.

395 “Nakozala elongo na bino. Nakozala na eleko ya Luther; Nakozala na eleko ya Wesley; Nakozala na eleko ya ba-Pantekotiste; kasi na ntango mpenza ya mpokwa, Pole ekoya.”

Bato ya bibongiseli bakomonana lisusu te, na sima Elembo ekotiana. Pe baoyo nyonso bazalaki na mitema sembo, kati na bileko, kozanga—kozanga bino bango ba—bakokóma na kobonga be te. Kasi kati na bino . . .

³⁹⁶ Ezali lokola motó esengeli kokende, kozua lokolo. Motó esengeli kokende, kozua loboko. Motó esengeli kokende, kozua motema. Motó esengeli kokende, kozua monoko. Bomoni, motó esengeli kokende.

³⁹⁷ Pe sikawa tokómi na ntango oyo elembo etiamaki na libaya ya ekuke, bomoni, pe likolo ya makonzi. “Pe na bongo, ntango Nakomona makila, lokola elembo, Nakoleka likolo na bino.”

³⁹⁸ Nakosala nokinoki sikawa, na lombangu nyonso sikawa. Tobakisa lisusu miniti mitano, to zomi, nde tokosilisa.

³⁹⁹ Ezali kotalisa ete Nzambe asekwisaki Ye longwa na bakufi. Bondimi yango? [Losambo balobi: “Amen.”—N.D.E.] Azali lelo kobika kati na biso. Pe “Ngai” wana ezali Klisto. Ete “Ngai” azali elongo na biso kino na suka ya . . . ezali nde *suka*, elingi koloba “suka ya mokili.” “Ngai” nakozala kino na suka ya mokili,” kokokana na Liloba na Ye elakamaki. Alakaki yango. “Pe misala mizali Ngai kosala bokosala yango lokola.” Yango ezali bolema mpo na biso te. Ezali Elembo. Ezali Elembo.

⁴⁰⁰ Tondimi mbeka ya bulee ya Makila. Tondimi Makila na Ye epesamaki mbeka, na sima epesi . . . Ye oyo apesi biso Bomoi, Elembo, elembo ya elaka na Ye. Baefese 4:30, elobi: “Boyokisa makila mawa te”? Te. “Boyokisa Molimo Mosantu mawa te, oyo bo . . .” [Losambo balobi: “*Botiami elembo.*”—N.D.E.] “Bozali na boyokani, botiami pembeni.” Bozali na boyokani. Bozali yango. Elembo, Molimo Mosantu, ekozala elembo. Ntango eloko ekangami na elembo na kati ya elembo, esengeli kobuka elembo yango te. Ekokoka te, bino, bokoki kobuka Elembo ya Nzambe te. Te. Bomoni? Mpo bozali . . . “Boyokisa Molimo Mosantu na Nzambe mawa te, na yango botiami elembo kino mokolo na lisiko na bino, ntango nzoto ekosekwa.”

⁴⁰¹ Ezali momboto, elembo ete momboto ezuaki bomoi na Bomoi ya Seko, “*Zoe*, ‘Bomoi na Ngai Moko,’ pe Nakosekwiisa yango lisusu mokolo ya suka.” Pe ezali bino kotambola, bozali na ndanga ete Bomoi ya Klisto ezali kati na bino, pe ete bozali kati na Ye. “Biso nyonso tobatisami na Nzoto moko kati na Molimo moko, pe totiami elembo na nzela ya Molimo Mosantu,” kati kati na bandimi lokola oyo, “kino mokolo Yesu akosekwisa biso.” Oh! la la! Botia Elembo. Yango nde ezali na ntina mpo na biso. Tozali kozela Mbeka oyo epesa biso Bomoi, pe Ezali kosala yango. Pe Epesi biso Elembo, pe totié Elembo, yango nde Elembo kino . . . Kozala—kozala basangani na Likambo oyo, litomba monene nini boye, kozala moko na bango, babatisami na Molimo moko, kati na moko oyo emonan- . . . Nzoto oyo esimbamaka te.

⁴⁰² Nalobaki liloba yango malamumu, oyo *esimbamaka te?* Oyo emonanaka te, Nzoto oyo emonanaka te, Nzoto ya Yesu Klisto oyo emonanaka te. Bomoni, Molimo Mosantu alobaki: “Olobi yango mabe.” Moto mpamba lokola ngai, kasi Alobaki: “Olobi yango mabe,” nabengaki yango “*esimbamaka te,*” yango ezali Nzoto ya Yesu Klisto oyo emonanaka te, bomoni, Nzoto ya Yesu Klisto oyo emonanaka te. Ngai. . . Tosengeli na mayele ya kelasi te; tosengeli nde na Molimo Mosantu. Bobele na Ye. Bomoni? Bobele na Ye. Iyo, bomoni, likambo yango ekoki kobetisa moto moko libaku esika moko, molakisi ya kelasi, sikawa nakanisi asosoli yango malamumu. Nzoto oyo emonanaka te! Ntina moko ezali, soki te Alingaki koloba yango te. Bomoni? Azali awa sikawa. Azali mpenza awa na eteyelo. Azali pe kuna. Ezali Ye. Bomoni? Fiou!

⁴⁰³ Pe kati na Ye kufa ezali te. Kati na Ye mawa ezali te. Kati na Ye bolembu ezali te. Kati na Ye masumu ezali te. Kati na Ye bokono ezali te. Kati na Ye kufa ezali te. Tozali kati na Ye! Soki Satana ameki kopesa yo eloko moko, lokola bokono, kamata bobele Elembo na yo pe salela Yango. Oh! la la! Kamata Elembo na yo pe salela Yango, kotalisa ete ezali eloko esombami ya Yesu Klisto. Elembo ezali wana kotalisa ete ntalo efutamaki.

Akoloba: “Soki okufi, obungi.”

⁴⁰⁴ Loba: “Ozali komikosa. Ngai nazali eloko esombami. Nazali eloko esombami. Nazali na Elembo.”

“Elembo nde nini?”

⁴⁰⁵ Ayebi nini Yango ezali. Komeka, komeka kosakana na ye te. Ayebi nini Yango ezali. Bongo, okoki kosolola na batei wana mosusu, pe bakobendana na yo. Satana te; ayebi yango malamumu. Bomoni? Oh, iyo. Abundisaki yango, mbala mibale to misato, boyebi, pe asalaki libunga, na komekama. Satana ayebi likambo nini ozali koloba. Lakisa ye bobele Elembo, akokima. Iyo.

⁴⁰⁶ Mpo ete, ezali nini? Ezali eloko ekangami na elembo. Akoki kofungola yango te mpo akotisa eloko moko ya mabe kuna na kati. Loba: “Longola loboko na yo! Nakangami na elembo.” Oh! la la! Eloko ekangami na elembo! Iyo misie! Osombami. Simba Elembo likolo ya kondima na yo eninganaka te na elaka na Ye, pe tala ndenge akokima. “Libondeli ya nguya ya moyengebeni ekosalaka pe misala!” Bomoni? Bomoni? Kamata Elembo yango. Yango nde ntina na Yango. Satana azali wana mpo na komeka yo.

Azalaki na Ezipito, mpo na komeka.

⁴⁰⁷ Bongo, boyebi, mokolo Laaba atiaki mwasi na pite wana. . . Mwasi na pite atiaki nsinga wana, nsinga wana, nakanisi basoda na bango basekaki pe batiolaki, kolobaka: “Mwasi mobola ya liboma oyo kuna! Abeli liboma te. Botala, atii yango kuna. Ha, ha, ha! Ee, boyoka ndele likambo ya boye? Ee, Docteur Jones, kuna, alobaki: ‘Yango ezali na ntina moke te.’” Kasi ezalaki na

yango, mpo motindami moko uta na Nzambe amemaki nsango pe alobaki bongo.

408 Bokoki kokanisa bato na Ezipito koloba: “Botala ndenge . . . Tala, botala etonga ya bato na maboma oyo ya ndenge wana, bazali kopakola makila! Ha, ha! Ekozala mpenza bosoto, ntango bakosukola yango! Oh! la la! Bandako na bango kitoko nyonso ezipami na makila! Oh, oyo nsolo mabe! Nazali koyebisa bino sima na mikolo ekozala somo. Ekozala na ntina ata moke te. Oyebi mpo na nini? Mpo tata Mosantu *Songolo* alobaki bongo.” Kasi ezalaki na ntina. Ezalaki bongo. Ezalaki na ntina.

409 Ezali na ntina mpo na biso baoyo tondimi Yango. Bomoni? Bobosana te kondima na bino eninganaka te bozali na yango na Liloba oyo! Sikawa, bozali lisusu Ewa te. Bomoni? Bozali lisusu moko na babeti ntembe wana te, pe, ee, oyo bayokanaka na Satana. Simba Liloba na Nzambe moko na moko. Bomoni?

Ewa alobaki: “Ee, Yawe alobaki bongo!”

410 Satana alobaki: “Kasi, oyebi, ya solo, Yawe akosala likambo ya ndenge wana na moto malamumu lokola yo te. Oh, ozali mpenza moto malamumu. Akosala yango te.” Oh, iyo, Akosala yango, lokola. Alobaki Akosala yango.

411 “Ee, tata na ngai azalaki motei. Ngai moko nazali motei.” Na—nakoki kosala lolenge mosusu te. Kozanga Elembo, obungi. Nkanda ezali likolo na yo, omoni, esili, kozanga Elembo. Omoni? Iyo. Alobaki Akosala yango, pe Akosala yango. Yango, ezali kokata likambo. Alobi Akosala yango.

“Oh, ngai nandimaka ete ntango na bikamwa . . .”

412 Iyo, kasi Ye alobaki bongo te. “Nazali ndenge moko lobi, lelo, pe libela,” bomoni, ezali yango nde Azali kotalisa ete Azali.

413 Sikawa, mpo na biso, toyebi yango. Mpo na bango, bandimaka Yango te. Kasi biso tondimaka Yango bongo. Toyebi ezali Solo. Bomoni?

414 Sikawa, ezali biso kati na yango, tokómi eteni na Liloba. Na sima botia Elembo, Molimo, likolo na elaka: “Ngai nazali Yawe oyo abikisaka yo.”

415 Na bongo, bomilengela mpo na liyangani ya lobiko na nzoto ya mpokwa. Bomoni? Botia Elembo, pe bokangisa Yango na Liloba, likolo ya kondima na bino eninganaka te na Liloba oyo, akobima. Bongo, Yango—Yango nde eloko ebengenaka ye, mpo kati na Ye eloko ya ndenge wana ezalaka te.

416 Nakosepela kotatola mwa moke sikawa, na ntina na makambo namoni kosalema na bapóso oyo eleki. Bomoni? Bomoni? Oh, ezali na matatoli mingi nakoki kopesa!

417 Boyebi, Luka alobaki: “Soki makambo nyonso Yesu asalaki ékomamaka kati na babuku, ba . . . ekokaki kozala na babuku ya kokoka te na mokili mpo na kokoma makambo yango.”

418 Bobele makambo oyo namoni na mosala na ngai ya koteya, oyo namoni Ye kosala, esika ekozala te na etumbelo oyo mpo na kotondisa yango na babuku. Soki nakomaki yango na bolai, makambo namonaki Ye kosala bobele na mosala na ngai ya koteya, makambo namoni Ye kosala. Bomoni? Azuaki elonga mingi na mosala na ngai, koleka oyo Azuaki na mosala na Ye Moko. Sikawa, bobosana te, Ye nde azuaki elonga mingi, ngai te; Ye nde. Nkembo! Aleluya!

419 Azuaki elonga mingi na Jeffersonville koleka oyo Azuaki na Nazaleta. Asalaki yango na engumba ya kanza oyo kuna pe na engumba ya kanza oyo. Amen! Nkembo! Mpo ete: “Akokaki kosala bikamwiseli kuna te,” kasi Asalaki yango awa. Na suka, Apasolaki nzela awa. Asalaki yango awa. Ntango mosusu Akokaki komema bato bisika mosusu, kasi A—Asalaki yango, ata bongo. Na bongo, Azuaki elonga mingi awa koleka oyo Asalaki na—na Kapalanauma to—to na Nazaleta, mpo na yango. Asalaki bikamwiseli mingi awa na losambo oyo koleka oyo Asalaki na mosala na Ye mobimba awa na mokili. Ya solo, Asalaki yango. Bongo, ezali ndenge nini mpo na eteni ya mokili etikali? Oh! la la! Sikawa, yango nde makambo Ye asalaki.

420 Sikawa, bobosana te, “Ye” nde asalaki. Sikawa, elobami te ete ngai nde nasalaki yango, bomoni, te, mpo ngai nde nasalaki yango te. Ngai te. Nalingaki bobele Ye pe namipesaki na Ye, pe nalobaki oyo Ye alobaki, pe Molimo Mosantu akendeki epai na bato mosusu pe bandimaki makambo Ye alobaki, na sima Asalaki mosala. Suka wana.

421 Soki Akoki komema biso nyonso kondima yango! Makambo nini Akoki kosala, soki Akoki komema biso nyonso kondima yango bobele sikawa? Moto na bolembu ata moko te akozala lisusu engumba mobimba oyo. Ya solo. Soki Akoki komema bato nyonso kondima yango, makambo nyonso ekosila. Bomoni?

422 Simba Elembo na yo likolo na kondima na yo eninganaka te na Liloba elakami, pe Satana akokima.

Nalingi mpenza kosilisa sikawa.

423 Kalakala Nzambe apesaki mokili elembo mosusu; ezalaki monama. Bomikaniseli yango? [Losambo balobi: “Amen.”—N.D.E.] Azalaka ntango nyonso, ntango nyonso sembo na elembo yango, mpo Apesaki yango lokola elembo. Kati na bankoto na mibu nyonso oyo, naino Azangisa kotalisa elembo yango te. Ezali solo? [“Amen.”] Mpo na nini? Azali komemia yango. Apesaki yango. Apesaki mokili elembo ete Akobebisa lisusu mokili na mpela te. Pe, kobanda mokolo wana, Atalisaka yango ntango nyonso, ntango nyonso.

424 Ezali na biloko moko moko na mopepe, oyo esalaka monama. Soki mbula ebeti, pe moi ebimi, emonisaka yango. Moi ekaukisaka mbula, na bongo Atiaki monama kuna mpo na kotalisa polele ete mai ya mingi koleka ekonoka na mokili te mpo

na kobebisa yango lisusu. Ezali boyokani na Ye. Ezali elembo. Alobaki: “Nakopesa bino yango lokola elembo.”

425 Amemiaki Elembo na Ye. Amemiaki elembo na Ye na mikolo na Nowa. Azali naino kotalisa yango. Amemiaki elembo na Ye na Ezipito. Amemiaki yango na Yeliko. Azali komemia Yango lelo. Amemiaka Elembo na Ye ntango nyonso, ntango etalisamaka.

426 Kati na bankoto na mibu nyonso oyo, Asepelaki kotalisa elembo yango. Abosanaka yango soko moke te. Abosanaka elembo na Ye te. Bongo, ata mokili ekobongwana boni, monama ezali bobele wana. Bomoni, Azali komemia elembo yango.

427 Ezali pe bongo sikawa, Azali komemia Elembo na Ye. Ata lingomba ebongwani boni, ata ezali kosala *boye*; Nzambe azali kokoba komemia Elembo na Ye, bobele Yango. Ezali kotalisa biso ete Azangaka komemia makambo Asalaka pe Alobaka soko moke te. Bisu tondima pe totosa Yango. Yango nasalaka.

428 Azali kotalela biso pe totalisa Elembo na Ye likolo na kondima na biso, liboso na Satana pe ba-losambo ná bibongiseli na ye nyonso oyo ezangi kondima, kotalisa ete tondimi elaka na Ye ezali solo, pe Akosala makambo Alakaki Akosala. Yango wana nde Lingomba.

429 Ezali likambo ya kokamwa te ete bakoki kolonga te, ndenge tolobaka; bolimbisa ngai mpo na elobeli yango. Ezali likambo ya kokamwa te ete bakokóma mosika te kasi bakozonga na ebongiseli mpo na kosala etonga ya bato balataka bilamba eleki kitoko, batángá mingi, bato na mayele, bato bayekólá. Bakómaka mosika te, mpo yango nde batalisaka: “Nazali Metodiste. Nazali Presbiterien.” Nyonso wana bango bazali.

430 Kasi bandimi bazuaka Elembo! Pe makambo Yesu abandaki kosala na Galilea, Azali kokoba kosala yango sikawa na nzela ya kotalisa polele Elembo na Ye, Molimo Mosantu oyo ezongi na Lingomba. Mpo, ezalaki misala ya bantoma te, ezalaki misala ya Molimo Mosantu kati na bantoma, pe yango ezalaki Elembo.

431 Bato balobaki basengelaki kokeba na Petelo ná Yakobo, lokola bango. . . Petelo ná Yoane, ezalaki bango koleka liboso ya ekuke ebengami Kitoko, bamonaki ete bazalaki bato bayekoli te. Ntango mosusu bazalaki koloba: “Hit, hain’t, tote, tear, fetch, carry. Nakolobela bino ntina na likambo *oyo*.” Bomoni? [Ndeko Branham azali kopesa ndakisa ya maloba na ngelesa na ye ya Kentucky—N.D.E.] Ntango mosusu bazalaki kosalela grammairé ya ndenge na ndenge bakokaki kososola te. Ntango mosusu bayebaki bokeseni te, ya ma—ma. . . ya matematiki nyonso ya Liloba. Kasi basengelaki koyeba ete bango bazaláká elongo na Yesu. Bakokaki kotalisa Elembo yango, mpo ete Molimo moko oyo ezalaki likolo na Ye, liboso na kobakema na ekulusu, ezalaki likolo na bango sima na lisekwa. Amen!

432 Yango nde ekomisi Ye Baebele 13:8, “Yesu Klisto ndenge moko lobi, lelo, pe libela.” Tala lolenge toyebi ete Azali na bomoi.

Mpo, mpo na nini? Ndenge nini toyebi ete tozali na bomoi? Mpo Ye azali na bomoi. Pe lokola toyebi tozali na bomoi, ezali mpo ete tozali lokola Ye, pe tozali kati na Ye. Pe Ye alobaki: “Mpo Ngai nazali na bomoi, bino pe bozali na bomoi. Ngai nazali Ye,” kati na Emoniseli, “oyo akufaki, pe azali na bomoi libela na libela.” Pe soki—soki tokufi na biso moko, pe tokómi na bomoi kati na Ye, tozali na bomoi libela na libela. Na bongo, Bomoi na Ye kati na biso ezali mpenza lokola bomoi ya eloko mosusu nyonso, Ezali kotalisa oyo Ye azalaki. Pe yango ekomisi Ye lolenge moko lobi, lelo, pe libela.

⁴³³ Sikawa, ekosalema ndenge nini, ntango bazali koangana Yango? Bozali komona te “misala na kufa”? Bosalela Nzambe na bomoi, boyokani ya Seko. . . nalingaki koloba boyokani ya bileko na bileko, ya Bomoi oyo ezalaki kati na Makila ya Yesu Klisto. Sikawa tokoba, mpo na kosilisa, ngai. . . Ee, nakanisi, tokosukisa awa. Bomoni, kotalisa polele Elembo ya ngolu na Ye, ya bolingo na Ye! Sikawa, kozanga kotia Elembo oyo. . .

⁴³⁴ Sikawa, ezali Elembo. Elembo ezali nini? Elembo ezali etaliseli ya nyongo esili kofutama. Ntalo oyo esengamaki esili kofutama. Ntalo ya lobiko na biso ezalaki nde kufa, bomoni, pe moto moko te akokaki kofuta yango, bobele Klisto. Ezali te mo—molimo ya ebongiseli, molimo ya pápa te, molimo ya moto moko to ya mosantu moko te; kasi Molimo ya Yesu Klisto, likolo ya Lingomba, ezali Elembo kotalisa ete nyongo esili kofutama pe Ye akokisaki bosenga nyonso Nzambe asengaki, pe biso na Ye tokómi eloko moko. “Na mokolo yango, bino bokoyeba ete Ngai nazali kati na Tata, Tata kati na Ngai; Ngai kati na bino, pe bino kati na Ngai.”

⁴³⁵ Botia Elembo! Botia Elembo ya lisekwa na Ye. Yango, mpo Ye asekwaki mpo na kolongisama na biso, Asekwisaki pe biso elongo na Ye. Pe sikawa tofandi na bisika na Likolo, kati na Klisto Yesu, na nse ya boyokani ya Elembo.

⁴³⁶ Lokola Yisalaele bafandaki kuna, pe bato bazalaki koganga, na balabala, bango bazalaki na ntina ya komitungisa ata moke te. Likambo bobele moko ezalaki koyeba malamumu ete makila, elembo, ezalaki komonana.

⁴³⁷ Yango nde likambo moko tosendeli komitungisa mpo na yango sikawa. Mpasi ezali na—na nzela, ezali koya, bandeko. Ekoumela lisusu te, mpasi ekobeta. Boyebi yango. Boyeba malamumu ete Elembo ezali komonana. Pe Elembo ezali Molimo Mosantu. “Mpo ete na nzela na Molimo moko, biso nyonso tobatisami na Nzoto moko, pe tokomi eteni ya nkembo na Ye,” kokende na Mboka na biso, na Ekólo na biso, kotambola sikawa kno na Mboka na elaka.

⁴³⁸ Bolingaka Ye? [Losambo balobi: “Amen.”—N.D.E.] Bondimi Elembo? [“Amen.”] Boni bakolinga koloba: “Oh, Ndeko

Branham, bondela mpo na ngai, mpo naya na nse na Elembo yango”? [“Amen.”]

Togumba motó.

439 Nkolo Yesu, Yo Oleki na Boboto! Ntango mokili ezalaki kati na masumu, pe moto moko te akokaki kosunga yango, Nzambe, na mawa na Ye, atalisaki, na elilingi, ete Elembo moko ekoya, oyo ekolongola masumu; bobele kozipa yango te, kasi ekoki kolongola yango. Pe Yesu ayaki na ntango ebongi, pe Asopaki Makila, Bomoi na Ye moko, akamataki. . . asalelaki biso mbondi mpo na masumu na biso, na sima Azongisaki Ye lisusu na lolenge ya Molimo Mosantu, oyo ezali sikawa Elembo oyo esengeli kotikala na Lingomba kino ekoya Ye. Mpo Ntoma Petelo alobaki: “Elaka yango ezali mpo na bino, bana na bino, pe bango nyonso bazali mosika, baoyo nyonso Nkolo Nzambe na biso akobianga.”

440 Nkolo, na ngolu na Yo, na lisungi na Yo, nazali kosenga moto nyonso oyo ayoki Nsango oyo. Nazali kosenga bango mpo na Nzambe, nabondeli Yo, Nkolo, mpo na baoyo bazali awa na ntongo ya lelo pe baoyo bakoyoka yango na bande. Pe soki Momboto moko ezali esika moko, oyo ebongisámá liboso, Nkolo, mpo na koyoka Liloba ya ntango na suka oyo, tika baya sikawa, na boboto pe na komikitisa, bakitisa mitole na bango na ekulusu, to bamipesa bango moko, lokola mitole ya ngolu na Nzambe oyo abiangi bango. Pe tika batondisama na Molimo Mosantu pe batalisa Elembo ya Bomoi ya Yesu Klisto kati na lisekwa na Ye, na ntango nyonso oyo bakozala awa na mokili. Kokisa yango, Nkolo.

441 Maloba oyo, Nkolo, ntango mosusu nalobi yango malamumu te. Pe soki ezali bongu, nabondeli ete Molimo Mosantu akamata Maloba yango pe apesa yango na lolenge oyo esengelaki kopesama, mpo bato basosola pe bayeba, na mayele mabe te. Pe tika bayeba ete bolingo esembolaka. Pe bakoka koyeba ete ezali mpo na ntango oyo tozali kobika na yango, pe boyei na Nkolo ebelemi, pe tozali komona minda mitane minene kopela, na mokili mobimba, kotalisa ete ntango ekómi pene.

442 Tika bato bazua Molimo Mosantu lelo! Nabondeli, pe napesi bango epai na Yo, na Nkombo na Yesu Klisto. Pe tika Yango ezala Elembo mpo na biso ntango nyonso tokozala na bomoi, ndenge Olakaki ete Ekozala. Ezali pete kosenga yango, mpo Olakaki ete Ekosalema, pe nayebi Ekosalema. Tobondeli na Nkombo na Yesu. Amen.

Sikawa, ndenge togumbi mitó, miniti mwa moke.

443 Na kondima, na kondimaka, nabondeli mpo na bino, nyonso oyo nakokaki. Na—nabondelaki na bosembo nyonso, na ndenge nyonso nakokaki kobondela mpo na yango.

444 Botala, nasosoli yango. Boyebi? Nabikaka na moko na zomi ná makabo na bino. Ezali lisungi na bino, awa na losambo oyo,

nde nazali na bato oyo nakoki koteya bango. Ezali bolingo na bino, ná ba “amens” na bino, ná boyokani na bino. Pe maloba na bino malamau bipai nyonso bozali kokende, na mokili, na bituka ndenge na ndenge ya ekólo oyo, ezali maloba na bino nde ezali kosunga mpo na kopalanganisa Nsango oyo. Ezali nde bino. Tozali basali elongo kati na yango, elongo na Klisto. Tozali bandeko mibali pe basi, pe Ye azali Mokonzi na biso. Pe ngai nalingi bino. Ngai—ngai—ngai—ngai, epai nazali, nalingi bino pe bozala wana. Natambolaka na motuka na ekólo mobimba, mpo na kosolola na bino mbala mibale to misato. Nazalaka na mposa makasi kokutana na bino awa na ntongo mokolo ya lomingo. Nalingi bino. Nalingaka bino ntango nyonso. Ntango mosusu esengelaka na ngai koloba makambo makasi, kasi ezali bobele mpo na kosembola. Bomoni, ezali bobele mpo nalingi bino, bomoni, pe nalingi te bozanga Yango. Bino, bosengeli kosala yango te.

⁴⁴⁵ Sikawa, na boboto pe na komikitisa mpenza, na motema na bino mobimba, na kati na yango mpenza, boyamba Yango. Boloba: “Nkolo Yesu, bobele sikawa, kamata mpenza nyonso oyo ezali kati na ngai, oyo ekesani na Yo, pe tika nabimisa lolendo na ngai nyonso, nyonso oyo ezali kati na ngai. Mbindo nyonso, kozanga kondima nyonso oyo ezali kati na ngai, na—naboi yango sikawa, Nkolo. Nabwaki yango libanda. Pe tika Molimo Mosantu ya bopolo ya Nzambe, lokola ebenga, ekita kati na ngai. Na—nalingi kobika Seko na seko, Nkolo, pe na—nalingi Osunga ngai na ntango oyo. Kokisa yango sikawa.”

⁴⁴⁶ Na ntango bozali kobondela, tokoyemba loyembo oyo na nse ya mongongo, to tokoyemba na mongongo ya nse, elongo, *Nalingi Ye*. Pe, bobosana te, eyaka na nzela ya bolingo, mpo Azali bolingo. Na ntango nazali kotia maboko likolo ya misuále oyo, mpo bato bakoki kozua yango liboso na mpokwa oyo.

Nalingi Ye, nalingi Ye
Mpo Alingaki ngai liboso
Asombi lobiko na ngai
Likolo na Ekulusu

Nalingi Ye, nalingi Ye.
Mpo Alingaki ngai liboso,

Sikawa, pesa Ye bomoi na yo mpenza.

Asombi lobiko na ngai
Likolo na Eku- . . .

⁴⁴⁷ Bolinga, bolinga, bolinga Ye. Botala oyo Ye asalaki mpo na bino. [Ndeko Branham abandi koyemba na nse ya mongongo *Nalingi Ye*—N.D.E.] Ezali likambo ya bolingo. Bolingo ememaka botosi. Bolingo ememaka masolo ya bolingo. Bolingo ememaka libala. Pe kuna nde tozali kokende, na Elambo ya Libala ya Mwana na mpate. Nazali koyoka Mobikisi na ngai kobenga, ete Ye pe alingi ngai. Ngai pe! Ngai . . .

448 Na motema na yo mobimba, yoka mpenza Eloko moko ya bopolo kokota kati na yo. Yango nde Molimo Mosantu.

Mpo Alingaki ngai liboso
Asombi lobiko na ngai
Likolo na Ekulusu.

449 Soki . . . Nakotombola maboko na ngai, elongo na liyangani, miziki ezali kobeta. Soki nasalaki masumu, soki nasalaki likambo moko ya mabe . . .

Nakobondela mpo na bino sikawa, pe mpo na ngai moko.

450 Soki nasalaki eloko moko ya mabe, natomboli loboko na ngai epai na Yo, Nkolo, kotalisa ete nayoki mawa. Natomboli loboko na ngai epai na Yo, Nkolo, kotalisa ete nalingi—nalingaki kosala yango te. Pe nayebi nazali kokufa, Nkolo. Esengeli natika mokili oyo, na lolenge ya nzoto. Nalingi kokutana na Yo. Loboko na ngai elingi koloba, kamata yango, Nkolo. Tondisa ngai na Molimo. Pesa ngai Elembo ya bolingo na Yo likolo na ngai, Molimo Mosantu, oyo ekosala ete nabika na boboto, na bopolo, oyo ekosala ete nabika Bomoi oyo ezalaki kati na Klisto; ete motema na ngai ekopela moto mpo na bamosusu, ete na moi to na butu, názala na kimia mpenza te, kino nazua bato nyonso nakoki kozua. Nakozala lokola batindami na Yeliko; nakokende epai na bato nyonso nakokoka, pe kotala soki nakoki komema bango koya na nse ya boyokani ya Makila, na nse ya Makila ya Mwana na mpate, mpo bakoka kozua Elembo.


451 Bomoni, Makila epetolaka. Molimo ezali Elembo kotalisa ete Makila esili kotiamana. Bomoni? Molimo ezali Elembo kotalisa ete Makila esili kotiamana. Kino Makila ekotiamana, mo—Molimo akoki koya te. Kasi ntango Makila etiami, na ntango wana Molimo ezali Elembo, oyo ezungisami epai na yo, kotalisa ete kondima na yo na Makila esili kondimama, ete tiké na yo efutami. Tiké na yo efutami. Nyonso esili. Likambo esuki. Ozali Moklisto. Ozali mondimi. Klisto azali kati na yo, pe yo ozali kati na Klisto.

. . . Alingaki ngai liboso
Asombi lobiko na ngai
Likolo na Ekulusu.

452 Ná mitema na bino egumbami sikawa liboso na Nzambe; nakotikela mokengeli na bino, Ndeko Neville, maloba ya suka pe makambo alingi koloba.

453 Bobosana te liyangani ya mpokwa oyo, liyangani ya lobiko na nzoto. Boya na ntango malamumu. Tóbanda na ngonga ya nsambo, mpo námata na eteyelo na ngonga ya nsambo na ndambo. Ndeko Neville, ezali malamumu bongo? [Ndeko Neville alobi: “Ezali malamumu.”—N.D.E.] Bongo tokozala na elambo, bomoni, na mpokwa. Boya!

⁴⁵⁴ Na sima na nzánga oyo, bokoba kokangama na Yango. Botika Nsango oyo kotangwa na bino te. Bobosana te, botika soko moke te ete Nsango oyo etangwa na bino!

⁴⁵⁵ Makila ekozala Elembo kotalisa ete Bomoi epesamaki. Bomoni? “Pe ntango Nakomona Makila, Nakoleka likolo na bino.” Molimo Mosantu ezali Elembo kotalisa ete Makila etiamaki na motema na yo, pe Ezali Elembo kotalisa ete Makila etiamaki. Soki etiamana naino te, na bongo Elembo ekoya pe te. Bososoli? Boloba: “Amen.” [Losambo balobi: “Amen.”—N.D.E.] Esengeli Makila etiamana, na sima Elembo ekoya. Ezali Elembo kotalisa ete Makila ya lisiko etiamaki pe tiké na yo efutamaki. Nzambe apambola bino. Ndeko Neville. 

ELEMO LIN63-0901M
(Token)

Liteya oyo ya Ndeko William Marrion Branham, eteyamaki liboso na Ngelesa na lomingo na ntongo, mokolo mwa 1, sanza ya libwa, na mobu 1963, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org